

MATYIW

Jiysis Krays Minim Tep Matyiw

Tikak

Minim Nind Niņep

Baybol buk day “Matyiw” apun biy, Jiysis binuk Matyiw tikak. Nuk nind bi takes dep bap mindyngip. Yimb nuk bap Liypay. Kesim tikak kun biy biynimb nuk Jiwda kay riyt gi niņiy, Jiysis mey bi kiņy yomb key yimb kond mindyngipun anep niņniņiy aņgiy tikak.

Minim Ar Keykey Mindip Rek:

Jiysis Krays nusind nupis nuk gok tikey amiy apiy giy, nup tikyak kesim ak mindip, chapta 1:1–2:23.

Jon bi niņg pikñemb ak woņg kiñiņ gi gak minim ak mindip, chapta 3:1-12.

Jon Jiysis nup niņg pikñak minim ak sek, Seytan Jiysis nup tom gak minim ak sek mindip, chapta 3:13–4:11.

Jiysis miñmon Galiyliy woņg kiñiņ gi gak minim ak mindip, chapta 4:12–18:35.

Jiysis Galiyliy nimb woņg gindand Jerusalem amnak minim ak mindip, chapta 19:1–20:34.

Jiysis niņ nuk ak maņ giy wiyk nokom bap mindakniņ, Jerusalem sek, yep maņ kun okok sek aņñiraņgek minim ak mindip, chapta 21:1–27:66.

Jiysis kumiy tikjakek biynimb kuņaynep misen niņyak minim ak mindip, chapta 28:1-20.

Yerer Giy Tik Dand Apiy Jiysis Nup Tikyak

¹ Jiysis Krays nop nusind yes nuk gok tikey amiy apiy gek nup tikyak rek angning gispiyn. Biyomb Ebrahim tikek tik dand amiy, kiyn Depiyt nup tikeyak mey; Depiyt nund tikek tik dand amiy mey, Jiysis Krays nup tikyak.

² Kun giyak: Ebrahim Aysek nup tikak. Aysek, Jekop nup tikak. Jekop nund pen, Jiwda nup tikiy, numam onep anqip ak tikiy gak. ³ Jiwda nuk biyn Tema yip mindiy, Peres yip Sera yip kuyip tikak. Peres, Hesron nup tikak. Hesron, Aram nup tikak. ⁴ Aram, Amiynadap nup tikak. Amiynadap, Nason nup tikak. Nason, Salmon nup tikak. ⁵ Salmon, Bowas nup tikak. Bowas nonim nuk ak Reyap. Bowas, Obet nup tikak. Obet, nonim nuk ak Rut. Obet, Jesiy nup tikak. ⁶ Jesiy, kiyn Depiyt nup tikak. Depiyt, Solomon nup tikak. Solomon nonim nuk ak nind binak Yiwraya nup dek kumek, kisen Depiyt nup diy, Solomon nup tikak. ⁷ Solomon, Riyabowam nup tikak. Riyabowam, Abaysa nup tikak. Abaysa, Esa nup tikak. ⁸ Esa, Jospet nup tikak. Jospet, Joram nup tikak. Joram, Asaya nup tikak. ⁹ Asaya, Jotam nup tikak. Jotam, Ewas nup tikak. Ewas, Hesekeya nup tikak. ¹⁰ Hesekeya, Manase nup tikak. Manase, Emos nup tikak. Emos, Josaya nup tikak. ¹¹ Josaya, Jekoyakiyn nup tikiy, numam gunap tikiy gak. Nin kun ak, Babiylon biynimb ap, Yisrel biynimb kuyip kalambis ay, dand Babiylon amniyak.

¹² Dand ameyak, Jekoyakiyn kun okok mindiy, Siyaltiyel nup tikak. Siyaltiyel, Serababel nup

tikak. ¹³ Serababel, Abayat nup tikak. Abayat, Eliyakim nup tikak. Eliyakim, Yisow nup tikak. ¹⁴ Yisow, Sedak nup tikak. Sedak, Ekim nup tikak. Ekim, Elayat nup tikak. ¹⁵ Elayat, Eleysa nup tikak. Eleysa, Matan nup tikak. Matan, Jekop nup tikak. ¹⁶ Jekop, Josep nup tikak. Josep mey, biyn Mariya nup ñeyak, nuk yip ma kinak won ak, Mariya koŋgiy mindiy mey, Jiysis bi kiyn yomb key yimb kond mindyngipay ak nup tikak.

¹⁷ Kun ak, basind chin Ebrahim nund tikek tik dand, amiy apiy giy mey, basind kiyn Depiyt nup wanjrem piskind ak tikyak. Tikey Depiyt nund pen tikek amiy apiy gek, kunep wanjrem piskind ak amek, Babiylon kay ap kuyip kalambis ay dand miñmon kiyk ak amniyak. Dand ameyak, kisen pen tip ak tik dand amiy apiy giy, Krays nup wanjrem piskind ak tikyak.

Mariya Jiysis Nup Tikak
(Luk 2:1-7)

¹⁸ Jiysis Krays nup tikyak minim ak tikning gispiyn: Jiysis nonim Mariya, Josep nup ñeyak, yip ma kinrik ñin ak niñyak; Mariya ñapan koŋgiy mindek. Gor Kawnan nuk ak key gek, ñapan koŋgiy kun ak mindek. ¹⁹ Pen Josep bi suñ-tep ak mey, minim yomb ma angak. Ñapan koŋgiy mindip kun ak, biynimb okok angñeningayn, nup nambin giningamb. Kun ak nup kapkap angyokiyn angiy niñak ak pen, ²⁰ kisyim biyan wisin niñak: enjol bap angak, “Josep, Depiyt ñinuk! Biyn kun ak yenen dinim angiy gos ak ma niñnimin; monmon dinimin. Ñapan koŋgiy mindip ak, Gor Kawnan anep gek mindip.

²¹ Kisen ñi ak tikek yomb giy, biynimb nuk gok gach kuyip ak wiykyokiy, di Nop yip jimñiy ayniᅅgamb ak mey; yimb nup Jiysis aᅅgnimin aᅅgak.” ²² Aᅅgak kun ak, bi Gor minim aᅅgep bap giniᅅgamb aᅅgiy tikak rek nep gak. ²³ Nuk aᅅgak: “Biyn piñ bi yip ma kiniᅅgamb bap, ñapan koᅅgiy mindiy, ñi bap tikeᅅniᅅgamb; yimb nup ak Yimanwel aᅅgniᅅgambay aᅅgak.”
Yimanwel minim kiñiᅅ ak, Gor chin yip mindip apay.

²⁴ Pen Josep, enjol minim aᅅgak ak diy, biyn Mariya nup dinim aᅅgiy niᅅgak. ²⁵ Kun ak Mariya ñi ak tikek, Josep ñi kun ak yimb Jiysis aᅅgiy, kisen mey; Mariya nup pisnep dak.

2

Bi Gap Niᅅep Gok Ap Jiysis Nup Niᅅyak

¹ Pen kiᅅᅅ Herot mindek ñin ak, Mariya Jiysis nup tikak miñmon sikoy Betliyhem; Jiwdiya propens namb okok. Tikek, bi gap niᅅep gok, pumb limᅅip tam okok nimb ap Jerusalem apiy aᅅgyak, ² “Jiwda biynimb, kiᅅᅅ chin apay ak nup tikpay! Miñiy dayey mindip akay? Miñmon chin okok mindiy niᅅbun; gap ak limᅅamb niᅅiy mey, nup lotiw giniᅅᅅ aswun aᅅgyak.” ³ Kun aᅅgeyak, kiᅅᅅ Herot minim kun ak niᅅiy, ñapan kun ak nup gosimb niᅅiy yip kirginiᅅᅅiy rek ayip aᅅgiy, gos kuᅅay niᅅgak. Jerusalem biynimb kunep, gos kuᅅay niᅅyak. ⁴ Pen kiᅅᅅ Herot, bi Gor nup simboᅅep yomb gok sek, bi low tiysa gok sek kuyip suk aᅅgek apeyak aᅅgak, “Bi kiᅅᅅ yomb key yimb ak nup tikniᅅᅅgambay miñmon akay?”

⁵ Angek angyak, “Bi Gor minim anjep bap minim tikiy angak rek: nup tikningambay miñmon sikoy Betliyhem. Bi Gor minim anjep kun ak tikiy angak,

⁶ ‘Jiwdiya propens namb okok, miñmon keykey kunay mindip, miñmon Betliyhem niñey sikoy rek ayingamb ak pen; Biyomb ak miñmon kun ak nimb apiy, biynimb yand Yisrel kay kuyip kond mindeningamb. Kun giningamb rek Betliyhem yimb yomb mindeningamb angak.’ ”

⁷ Kun anjepyak, kiñ Herot niñiy, am bi gap niñep gok kuyip kapkap suk angek apeyak angak, “Ñin akay rek gap kun ak lingak?” ⁸ Angek, nup minim kun ak angneyak; kuyip Betliyhem angyokning, tom giy angak, “Nimb am ñapan kun ak piyow niñrep giy, yip ap angem, yand kunep am nup lotiw ginim.” ⁹ Angek kiyk san diyakniñ, gap ak nind nind gakniñ; kiyk kisen giyak. Gap ak am am, ñapan ñañ ak korip mindek namb siñak nep aland gak. ¹⁰ Kun gek kuyip tep yimb gakniñ, ¹¹ korip miñgan biyan amiy niñyak: ñapan ñañ ak nonim Mariya yip minderik. Am koñgim yimiy, nup lotiw giy, wand kiyk gok anjiy, nup gol gunap, pawil kuyrep wip rek gunap, wel kuy wip rek gunap ñiyak.

¹² Pen kiniy wisin niñyak: Gor angak, “Andkind Herot ker ma amnimimb angak.” Kun anjek niñiy, kinjen par bap amiy, korip kiyk amniyak.

Josep, Biyn Amiyminay Ak Poñind, Pirik Yijip Amnak

13 Pen kiyk kun giy amey, Josep wisin niñak: enjol bap apiy nup angak, “Herot ñapan ñaṅ ak pikayin anḡiy, piyow niñning gisap. Kun ak ñapan ñaṅ amiymñay ak kasek poṅind, pirik Yijip amninin. Pen winimin anḡen nep, tip ak andkind winimin anḡak.”

14 Anḡek, Josep kisyimnamb biyaṅ nep tikjakiy, ñapan ñaṅ amiymñay ak poṅind Yijip amnak.

15 Poṅind amnak kun ak, bi Gor minim anḡep gok giniṅgamb anḡiy tikyak rek nep gak. Tikiy anḡyak, “Ñi yand ak Yijip nimb suk anḡen winiṅgamb anḡip anḡyak.”

Pen Josep amyong apyong am Yijip mindey, Herot kumek, tip ak andkind wiyak.

16 Pen Herot bi gap niṅep gok kuyip anḡak rek ma geyak; nup milukrimey yimb yapek anḡak, “Yip gipay kun ak, ñiṅaṅ biyomb mindning gisap ak yergiy pik aynim anḡak.” Pen gos bap niṅiy anḡak, “Ñiṅaṅ kun ak kisen tikyak ñin ak, gap ak limgek, yip anḡrep giy amniyak. Kun ak yand niṅbiyn: Betliyhem ñiṅaṅ tikey, simiy omiṅal yinimb gok sek, ñiṅaṅ kisen tiksipay gok sek pikjirikiy mey, ñi kun ak sek pikjirik ayniṅgambun anḡak.” Kun anḡiy, binuk gunap anḡyokek am ñiṅaṅ Betliyhem maṅ okok mindeyak gok maṅgiysek pikjirik aydiyak.

17 Betliyhem ñiṅaṅ pikjirik ayak kun ak, bi Gor minim anḡep Jeriymaya giniṅgamb anḡiy tikak rek nep giyak. Jeriymaya minim kun ak tikiy anḡak:

18 “Miñmon Rama simb gek, kilpul yomb anḡiy, siy yomb anḡniṅgambay. Biyn Resel tikek,

tikey amiy apiy giningamb gok, simb gek siy angningambay. Pen biynimb gunap, kuyip angedep rek ma ayningamb angak.”

Josep, Biynuk Amiymıñay Yip Tip Andkind Wiyak

¹⁹ Pen kisen biyomb Herot kumek, Josep miñmon Yijip kiniy wisin niñak: enjol bap apiy nup angak, ²⁰ “Bi ñapan ñañ pikayning giyak gok kumbay ak mey; biyn amiymıñay ak poñind, andkind miñmon Yisrel amninin angak.” ²¹ Angek, Josep biyn amiymıñay ak poñind, andkind Yisrel amnak. ²² Pen amjakek, minim bap angyak, “Herot kumek, ñinuk Akeleyas, Jiwdiya biynimb kuyip kond mindip angyak.” Angeyak Josep nuk Akeleyas mindip ak yergiy miñmon kun ak amnim angyiy pirikak ak pen, kiniy wisin niñak: Gor nup angak, “Jiwdiya propens ma andkind amninin; Galiyliy propens amninin angak.” ²³ Angek, Josep Jiysis amiymıñay kuyip poñind am miñmon Nasaret mindyngip. Amnak kun ak, bi Gor minim angedep gok giningamb angyiy tikyak rek nep gak. Kiyk angyak, “Nup bi Nasaret nimb angningambay angyak.”

3

*Jon Bi Ñing Pikñemb Ak Minim Anğñak
(Mak 1:2-8; Luk 3:1-18; Jon 1:19-28)*

¹ Nasaret mindeyak ñin namb kun ak, Jon bi ñing pikñemb ap Jiwdiya miñmon nep namb okok mindiy, biynimb gok kuyip Gor minim tep ak anğñiyngip. ² Kuyip anğñiy angyngip, “Mañ

mindip; Gor biynimb diy kond mindeningamb ak mey; tap siy tap timey gipim ak yenen kun gipun angyi kirgiy, Gor nup nep gosimb niñnimimb angyingip.”³ Jon angak kun ak, bi Gor minim angep Asaya wosrey giningamb angyi tikak rek nep gak. Asaya minim kun ak tikiy angak, “Bi bap biynimb kuñay ma mindpay namb okok suk yomb angyi angningamb, ‘Per biyomb ak asaw angyi, biynimb gok kinjeñ pindrep giy, kond mindey opay. Kun ak rek, nimb Biyomb ak asaw angyi, tap siy tap timey gipim ak kirgiy, nup kond mindenimimb angningamb,’ angak.”

⁴ Pen Jon nuk kanj kamel kas diy giyak chech ak ay, ler ak namb ak pimbrikyingip. Tap nuk ñimbyingip ak; jon golbind ak sek, bum ñing ak sek. ⁵ Ñin kun ak, Jerusalem biynimb diy, Jiwdiya miñmon namb okok mañgiysek diy, Joden ñing mañ okok mindeyak gok diy, Jon mindek ak apiy, ⁶ tap siy tap timey giyak gok anğ yikyakniñ, kuyip Joden ñing namb ak ñing pikñak.

⁷ Pen Peresiy biynimb gok sek, Sanjiwsiy biynimb gok sek kuñaynep, Jon chinup ñing pikñan angyi apeyak, kuyip anğ giy angak, “Nimb siyñ saraw ñapan guniy! Yerip gos ak niñiy pirik opim? Ñing pikon, Gor biynimb gunap kuyip anğ giningamb ñin ak, chinup ma anğ giningamb angyi, pirik opim?” ⁸ Ñing pikniñ, tap siy tap timey gipim ak kirgiy, mindrep gem mey, Gor nup gosimb niñbay angyi, nimbip ñing pikñinim. ⁹ Pen nimb gos bap niñiy; chin basind yes Ebrahim ñapan nuk mindpun angyi ma angnimimb. Ebrahim ñapan nuk apim ak tap yikop! Gor

kamb guniy diy, Ebrahim ñapan nuk gok gayning gaypikop!

¹⁰ “Niñrep ginimimb! Gor mon ak junj sek timbjiwning, tiw ak mamb giy mindip. Mon siñok, mangiy ñiñemb tep gunap ma piyip gok, timbek amek, di mon yinjav ak yokningamb.

¹¹ Nimb tap siy tap timey gipim ak yenen kun gipun angiy kirgiy, Gor nup gosimb niñem mey, nimbip ñiñg pikñimbiyn. Pen Bi kisen winingamb ak biyomb yimb: yand bi yikop. Tomb tirup nup tungasikying tap nup gok marik ginim rek ma ayip; yip nambin gip. Yand nimbip yikop ñiñg pikñimbiyn; Bi kun ak apiy, nimbip Gor Kawnan ak sek, mon manlan rek ak sek ñiningamb.

¹² “Nuk wiyt mangiy pik gek gipay rek ak gining gisap. Wiyt mangiy tep ak key ay, day day ak key ay giningamb. Kun giy, wiyt mangiy tep gok dam korip miñgan ayingamb; day day gok dam mon per yin mindip ak yokningamb angak.”

*Jon Jiysis Nup Ñiñg Pikñak
(Mak 1:9-11; Luk 3:21-22)*

¹³ Ñin kun ak, Jiysis Jon yip ñiñg pikñan angiy, miñmon Galiyliy kirgiy, Joden ñiñg mindek ak amiy, ¹⁴ angak, ‘Yip ñiñg pikñan.’ Angek Jon angak “Nand nep mey, yip ñiñg pikñimbinap. Pen yand nip yergiy ñiñg pikñinim?”

¹⁵ Angek Jiysis angak, “Nand aspan ak kirgiy, yand apiyn rek gey mey, Gor anqip anqip rek nep giningambur angak.” Angek Jon “Niñind apan” angiy, Jiysis nup ñiñg pikñak.

¹⁶ Pikñek, Jiysis ñiñg gol siñak apiy niñak: semb biyon miñgan yikiy, Gor Kawnan ak yakir kochir

rek nup ker wiñind wak. ¹⁷ Kun giy wakniñ, minim bap semb biyoñ nimb apiy angak, “Ñi kun ak, Ñi mapin yand. Nup niñen, yip tep yimb gip angak.”

4

*Seytan, Jiysis Nup Gos Ñen Tap Siy Tap Timey
Ginimuj Angiy Niñak
(Mak 1:12-13; Luk 4:1-13)*

¹ Ñin kun ak Gor Kawnan ak, Seytan biynimb gok kuyip per gip rek, nup kunep ginimuj angiy, Jiysis nup poñind, miñmon nep namb okok amnak. ² Poñind amek, Jiysis miñmon nep namb kun okok tap ñimbiy mer; yikop nep mindek ñin nokom jiwiy, andikiy onep ar piskind ak amnak. Kun giy yikop nep mindek, nup yiwan yomb yimb ak gek, ³ Seytan apiy nup angak, “Nand Gor Ñinuk mindiy ker, kamb biy diy anğey, biret ayek ñiñan.” ⁴ Anğek Jiysis pen angak, “Baybol buk ak tikiy anğyak, ‘Biynimb gok, tap ñiñemb nep ñimbiy ma mindeniñgambay; Gor minim anğip ak niñiy mey, per mindeniñgambay anğak.’ ”

⁵ Kun anğek, Seytan Jiysis nup dand Jerusalem amiy, dam Gor anğniñep korip yiy akyoñ giyak ar ak ay angak, ⁶ “Yand Gor Ñinuk mindpiyn angiy, pindenğ man biyañ ayan. Baybol buk ak tikiy anğyak, ‘Gor enjol nuk gok anğek, ñin kind nip ak di mindeniñgambay mey, kamb tomb nip ma piñiyningamb anğyak’ anğak.”

⁷ Anğek Jiysis anğak, “Baybol buk ak minim gunap sek tikiy anğyak, ‘Gor Biyomb ak nup ñiñloñ ay ma anğniñnimimb anğyak’ anğak.”

⁸ Angek, Seytan Jiysis nup dand dum yomb bap amiy angak, “Miñmon tep tep biyomb keykey kond mindpay guniy niñan! ⁹ Nand kongim yimiy yip lotiw geniñgamban, miñmon kun guniy nip manjiysek angninçayn angak.”

¹⁰ Angek Jiysis Seytan nup angak, “Nand key okok amnoñ! Baybol buk ak tikiy angyak, ‘Biyomb Gor nup nep angninçiy, woñg nup gok nep ginimimb angyak.’ ”

¹¹ Angek Seytan Jiysis nup kirgiy amnakniñ, enjol gunap ap Jiysis nup kond mindeyak.

Jiysis Miñmon Galiyliy Kiñiñ Giy Gor Minim Anğñak

(Mak 1:14-15; Luk 4:14-15)

¹² Niñ kun siñak, Jon bi niñg pikñemb ak nup kalambis ayeyak, Jiysis minim kun ak niñiy, miñmon Galiyliy amnak. ¹³ Amiy miñmon nuk Nasaret ma am mindek; am mindek miñmon Kapaniyam, Galiyliy chemb gol ak. ¹⁴ Biynimb miñmon kun okok kuyip minim tep ak anğñi mindyñgip ak mey; bi Gor minim anğep Asaya giniñgamb ançiy tikak rek nep gak. Nuk angak:

¹⁵⁻¹⁶ “Miñmon Sebyiwlan Naptalay, Galiyliy chemb pis biy sek, biynimb Jiwda mer Joden niñg kind bindoñ mindpay gok sek melik ak niñniñgambay. Kisyim okok mindiy kumniñgiy rek ayniñgamb ak pen; melik yomb yimb ak niñniñgambay angak.”

¹⁷ Jiysis niñ kun ak kiñiñ giy, biynimb okok kuyip Gor minim tep ak anğniyiñg angak, “Tap siy tap timey gipim ak yenen kun gipun ançiy kirgiy, Gor nup gosimb ak niñnimimb. Yenen

Gor biynimb diy kond mindeningamb ñin ak man yimb asaw angak.”

Jiysis Bi Omiñal Omiñal Kuyip, Yip Kondim Angak

(Mak 1:16-20; Luk 5:1-11)

¹⁸ Jiysis Galiyliy chemb gol ak apiy niñak: bi piys dep mamiymiñay ak, wimben yokiy, piys derik. Bi mamiymiñay kun ak, numam bap yimb nuk Enjriw; numam bap Saymon. Saymon nup ñin gunap, Piyta angyigipay. ¹⁹ Jiysis kuyipmiñay niñiy angak, “Yip kindik ger mey, nirip angen, bi piys dep mer, biynimb dep omiñal ak mindeningayr angak.” ²⁰ Angek, angak rek niñiy, piys derik wimben ak kirgiy, Jiysis chirup angñirep ginimuñ angiy nuk yip tangyigipiy.

²¹ Pen won bap tapin amiy niñak: Jemis yip, Jon yip, nop Sebediy yip bot miñgan ak apyonon mindyinq, wimben ak girep geyak. ²² Jiysis niñiy kuyipmiñay suk angek, wimben gok kirgiy, Jiysis chirup angñirep gan angiy yip amniyak.

Jiysis Okok Tangiy Minim Angñak

(Luk 6:17-19)

²³ Jiysis miñmon Galiyliy namb okok girangyinq, Jiwda lotiw korip miñgan okok amiy; Gor biynimb diy kond mindeningamb minim tep ak, kuyip angñiyinq, biynimb tap gak gok sek, tap yerip yerip gak gok sek gek suñ ayinqip.

²⁴ Kun gek, Siyriya biynimb miñmon sikoy okok mañgisek minim kun ak niñiy, biynimb tap keykey gak gok dand apey, nuk gek suñ ayak. Biynimb kun gok, gunap yikop tap gak; gunap windin mayn apek apyap pikiy jep diyinqipay;

gunap ñin tomb kalaw gak. ²⁵ Pen Jerusalem biynimb diy, Jiwdiya biynimb diy, Joden ñiņg taw akdoņ ken mindeyak biynimb gok diy, kuņaynep Jiysis amnakniņ, kisen amniyak.

5

Jiysis Am Dum Biyoņ Mindiy, Minim Aņgñak (Luk 6:20-23)

¹ Jiysis, biynimb kuņaynep kun gok niņiy, am dum biyoņ binuk onep wimiņgan ak yip bișiņg mindyiņg, kuyip minim aņgñak.

Biynimb Miñmiñ Giniņgambay

- ² Nuk kuyip aņgñiyiņg aņgak:
- ³ “Biynimb Gor minim niņrep ma gipun aņgiy, yingeprek mindpay gok, Gor kuyip diy kond mindeniņgamb ak mey, miñmiñ giniņgiy.
- ⁴ “Biynimb siy apay gok, Gor kuyip aņgdiniņgamb ak mey, miñmiñ giniņgiy.
- ⁵ “Biynimb sayn kapkap mindpay gok, kiyk mankumb diniņgambay ak mey, miñmiñ giniņgiy.
- ⁶ “Gor biynimb tep nuk mindenjun aņgiy, niņbay gok kuyip kond mindeniņgamb ak mey; miñmiñ giniņgiy.
- ⁷ “Biynimb simb niņbay gok, Gor kuyip pen simb niņiy diniņgamb ak mey, miñmiñ giniņgiy.
- ⁸ “Biynimb Gor nup gosimb nokom niņbay gok, Gor nup niņniņgambay ak mey, miñmiñ giniņgiy.

9 “Jimñiy mindenjun angyiy gipay biynimb gok, Gor kuyip ñapan yand angnıngamb ak mey, miñmiñ giniñgiy.

10 “Biynimb suñ-tep mindey kuyip timey gipay gok, Gor kuyip diy kond mindeniñgamb ak mey, miñmiñ giniñgiy.

11 “Nimbip Jiysis biynimb nuk angyiy, gi timey giy, minim yesek angyiy anjjiweniñgiy, miñmiñ yimb ginimimb. 12 Bi Gor minim anğep wosrey gok kuyip, ar kun ak nep giyak. Kun ak nimbip kunep giyakniñ, gos yomb ma niñnimimb; Gor chinup direp giniñgamb angyiy miñmiñ yimb ginimimb.

Gor Biynimb Nuk Gok Melik Tep Rek Ak Mindpay

(Mak 9:50; Luk 14:34-35)

13 “Nimb biynimb mankumb biy sol kiyk rek mindpim. Pen sol ak yindik nuk ak amdek, pisnep timey gip angyiy diyokey, tawsimbjakpay.

14 “Dawin yomb dum biyoñ mindiy, wey-giniñgiy rek ma ayniñgamb; misen yimb mindeniñgamb. Kun ak rek biynimb yand gok. Nimb biynimb gunap melik kuyip ak mindpim. 15 Lam ak danğiy tiyn miñgan okok ma aypay; biynimb niñrep giyañ angyiy, ar siñbiyoñ tik aypay. 16 Kun ak rek, nimb mind tep gem, biynimb niñiy, Nap semb biyoñ mindip anup yimb ak dand araniñgiy.

Low Minim

17 “Nimb yip angnıngambim: Gor low minim, Mosis anğak gok sek, bi Gor minim anğep gunap angyak gok sek kirginimimb angnıñg wip

aᅅgningambim ak pen; ak mer! Yand winik ak, bi Gor minim aᅅgep gok giningamb aᅅgiy aᅅgyak rek, maᅅgiysek ginimuᅅ aᅅgiy winik. ¹⁸ Yand nimbip niᅅind yimb apiyn. Semb biyoᅅ sek, mankumb biy sek pisnep kurginimuᅅ rek ayip ak pen; Gor minim nuk ak ma kurginingamb; perper nep mindeningamb. Minim yerip yerip aᅅgak ak, aᅅgak rek nep giningamb.

¹⁹ “Kun ak biynimb an Gor low minim ak niᅅiy, minim sikoy won bap kirsipiyn aᅅgiy, biynimb gok sisker aᅅgᅅey kirginingambay ak; Gor biynimb diy kond mindeningamb ᅅin ak, yimb kuyip apyowningamb. Pen biynimb an Gor low minim niᅅiy, niᅅrep giy, biynimb gok kuyip aᅅgᅅirep giningambay ak; Gor biynimb diy kond mindeningamb ᅅin ak, yimb kuyip ak araningamb. ²⁰ Bi Peresiy gok sek, bi low tiysa gok sek ‘Tep gipun’ apay ak pen; biynimb suᅅ-tep ma mindpay. Kiyk gipay rek nep gem amningamb ak; Gor miᅅmon tep nuk ma amningambim.

*Biynimb ᅅaᅅgep Nimb Gok Yip, Minim Aᅅg Jimᅅiy Ay Mindenimimb
(Luk 12:57-59)*

²¹ “Wosrey napis nasind yes gok, Gor low minim aᅅgyiᅅipay ar ak nimb niᅅbim. Kiyk aᅅgyiᅅipay, ‘Biynimb ma ᅅaᅅgnimimb. Biynimb bap, biynimb bap nup ᅅaᅅgayningamb ak, kor niᅅningamb aᅅgyiᅅipay.’ ²² Minim kun ak niᅅbim ak pen, nimbip miᅅiy aᅅgᅅep giningayn. Biynimb bap, biynimb bap nup miluk niᅅningamb ak, kor giningamb. Biynimb bap, biynimb bap nup aᅅgiweningamb; Jiwda kanjsol

gok ap nan-giy, nup minim yomb anjningambay. Biynimb bap, biynimb bap nup pen anjningamb, 'Nand bi sakiy sek yimb' anjningamb ak, mon key yinjap mingan ak amningamb.

²³ “Kun ak nimb tap dam Gor nup kamb bind ar ak simboŋg ñining; mam ay gunap kuyip gipik rek minim mindip anjgiy, ²⁴ am kuyip minim anjrep giy apiy nep, tap kun ak Gor nup simboŋg ñinimimb.

²⁵ “Tap yerip timey giningambim ak, nimbip kor gining, dand kinjenamb okok kisen amniyakni, kiy yip minim kun ak anj sayn giy, jimñiy mindenimimb. Mer ak, dam biyomb kor niŋep ak nup ñeningambay, nuk pen nimbip di poliys kay kuyip ñek, nimbip dam kalambis ayningambay. ²⁶ Nimbip niŋind yimb apiyn: tap day nimb ak pisnep day paŋg diy rek, mis ambikip.

Biyn Siy Bi Siy Gipay

²⁷ “Pen nimb niŋbim; minim bap anjyak ‘Biyn siy bi siy ma ginimimb anjyak.’ ²⁸ Pen yand nimbip aspiyn: bi bap biyn bap nup niŋiy, nup dipnip anjgiy gos niŋningamb ak, Gor niŋek bi kun ak gosimb nuk namb biyan, tap siy giningamb. ²⁹ Kun ak, windin maŋgiy yipund pis ak niŋiy, tap siy tap timey gep rek ayonimun, windin piskind kun ak tunjjiwyoknimimb. Pen windin nimb ak simb niŋningambim ak; tap siy tap timey giy, mon key yinjap ak amnimimb rek ayip. ³⁰ Pen ñin yipund kind ak kunep, tap siy tap timey gining gonimun, timbrik yoknimimb. Kun giy mey, ñin piskind ak nep mindiy kim amningambim. Yikop ak, mon key yinjap ak amningambim.

³¹ “Nimb niñbim; minim bap angyak, ‘Bi bap biynuk nup kirgining, biyn biy pisnep kirsipiyn angyi, ñiwkil band bap tikiy biyn kun anup ñiy mey, pisnep kirginingamb angyak.’ ³² Pen yand nimbip aspiyn: bi biyn kiyk gok wañ siy dey mer, yikop nep angyokey am bi kisen dingingambay akan yergeningambay, bi kun gok minim yomb dingingambay. Pen kisen bi biyn angyokningambay kun ak dingingambay ak, kunep timey giningambay.

*Minim Niñind Yimb Apun Apay
(Mat 19:9; Mak 10:11-12; Luk 16:18)*

³³ “Wosrey minim bap angyak ak kunep niñbim. Minim kun ak angyak, ‘Gor nup tap bap giningayn angyi, angnimimb rek nep ginimimb; nup minim nep ma angnimimb angyak.’ ” ³⁴ Pen nimbip aspiyn: minim bap angning, Gor windin mangiy ar ak niñind aspiyn angyi, ma angnimimb. Semb biyon mindip rek, niñind apiyn angyi ma angnimimb. Ak Gor miñmon nuk yimb. ³⁵ Lum biy mindip rek niñind apiyn angyi ma angnimimb. Ak Gor miñmon sikoy nuk bap mey kun ak. Jerusalem mindip rek niñind apiyn angyi ma angnimimb. Ak Biyomb ak miñmon nuk bap mey kun ak. ³⁶ Jun won yand mindip rek, niñind apiyn angyi ma angnimimb. Nimb key gem, jun kas nimb ak, sum akan mosimb jakningamb? ³⁷ Kun ak, giningayn angyi, giningayn nep angnimimb. Pen ma giningayn angyi, ma giningayn nep angnimimb. Minim kilis yimb angyun angningambim ak, Seytan nimbip gos ñek angningambim.

38 “Pen minim bap angyak, ‘Windin mangyi ak piñiy jiweningiy, kuyip pen kunep piñiy jiwningimimb. Meñg kamb pikpangeningiy, kuyip pen kunep pikpangnimimb angyak.’ 39 Pen nimbip aspiyn: Bi bap nimbip timey gonimuñ, nup pen ma timey ginimimb. Bi bap nimbip mikem piksil gonimuñ; andikem piskind ak kunep piknimuñ. 40 Nimbip kor giy, tingliys nak ak yip sanj gan angonimuñ, tingliys nep ma ñinimimb; kolsiyor ak sek ñinimimb. 41 Nimbip tap wand biy dam tip siñak yokiy wan angey; yiruk ma niñnimimb; tip angningiy siñak silgiy, yesek tip ak yokiy winimimb. 42 Chinup tap gunap ñim angeningiy, monmon ñinimimb. Pen chinup tap gunap yikop ñem; kisen nimbip tip ak ñiningambun angeningiy, ma kirginimimb, monmon ñinimimb.

Biyimb Ñanğep Nimb Gok Kuyip Wasemb Aynimimb

(Luk 6:27-28, 32-36)

43 “Minim bap angyak, ‘Buñgiy nimb gok kuyip wasemb aynimimb; biynimb penpen ñanğep nimb gok kuyip miluk niñnimimb angyak.’ 44 Pen nimbip aspiyn: Biynimb penpen ñanğep nimb gok kuyip wasemb ay; biynimb nimbip gi timey gipay gok Gor nup angninem kuyip kond mindonimuñ.

45 “Kun giningambim ak, Nap semb biyoñ ñapan nuk yimb mindiy mey, kun giningambim. Nuk biynimb mindrep gipay gok sek, biynimb mindrep ma gipay gok sek simb niñimb rek, gek pumb niñiy miñmon pikiy tap woñg kuyip gok jakip.

46 Biynimb nimbip wasemb aypay gok nep kuyip

direp giniᅇgambim ak; bi takes dipay gok gipay rek nep giniᅇgambim. Kun ak Gor nup yergiy tep gek, nimbip kond mindrep giniᅇgamb. ⁴⁷ Bunᅇiy nimb gok kuyip nep ñin piksakniᅇgambim ak, biynimb Gor nup gosimb ma niᅇbay gok gipay rek nep giniᅇgambim. Kun gem, Gor nup yergiy tep giniᅇgamb?

⁴⁸ “Kun ak Nap semb biyoᅇ mindrep yimb gip rek, nimb kunep ginimimb.

6

Biynimb Gok Kuyip Tap Monmon Ñinimimb

¹ “Pen nimb biynimb windin yirik ar ak nep mindrep ginjun aᅇiy, gem amniᅇgamb ak; Gor nimbip yergiy direp giniᅇgamb. ² Biynimb Gor nup gosimb niᅇbun aᅇiy tom nep gipay gok, gipay rek ma ginimimb. Kiyk biynimb simbgeprek gok kuyip maniy ñiniᅇ nan-gep korip biynimb kuᅇay mindpay namb ak akaᅇ, kinjeᅇ yomb okok nep ñimbay. Yimb yomb dun aᅇiy gipay kun ak, Gor kuyip direp ginimuᅇ rek ma ayip.

³ “Pen nimb biynimb simbgeprek gok kuyip tap ñiniᅇ, misenᅇ ma ñinimimb; ⁴ kapkap weyᅇiy ñinimimb. Tap weyᅇiy gipun gok Bapiy Gor niᅇimb ak mey, giniᅇgambim kun ak niᅇiy, nimbip direp giniᅇgamb.

Gor Nup Kun Giy Aᅇniᅇep

(Luk 11:2-4)

⁵ “Nimb Gor nup aᅇniᅇniᅇ, biynimb yesek gunap gipay rek ma ginimimb. Kiyk biynimb gunap chinup niᅇey yimb yomb diniᅇgambun aᅇiy, am lotiw korip namb ak mindiy akaᅇ,

am kinjenram okok mindiy, Gor nup angninbay. Yimb yomb dining gipay kun ak, Gor minim kuyip ak ma ninningamb. ⁶ Kun ak nimb Gor nup angninng; korip niluk mingan ak amiy, kinjen giñiy, Bapiy nup angninmimb. Tap kapkap gipim ak mangiysek ninimb rek, minim kun ak niniy, angninngambim rek giningamb.

⁷ “Biynimb Gor minim ma ninbay gok, nup angninng, minim paryomb yimb apay. Gos kiyk ak minim paryomb angon mey ninningamb apay!

⁸ Pen nimb kun ak rek ma ginimimb. Minim yerip Gor nup angninng gipim gok, nuk nind ninimb.

⁹ Nup angninng, kun giy angnimimb:

‘Bapiy yomb semb biyon; yimb nand yiy ar biyon mindip. ¹⁰ Nand chinup diy kond mindenimin; semb biyon angek ninbay rek ak, chinup gey kun ak rek ninjun. ¹¹ Chinup tap ninemb minek minek nimbun rek ak ninimin. ¹² Biynimb gunap chinup timey gey niniy kirpun rek, tap siy tap timey chin gipun gok niniy kirginimin. ¹³ Chin yikop mindiy, tap siy tap timey giningambun rek ayip ak; chinup kond mindey, timey ma ginjun.’

¹⁴ “Pen biynimb gunap nimbip timey gey, niniy kirgeningambim; Gor tap siy tap timey nimb giningambim gok niniy kirginingamb. ¹⁵ Pen nimb niniy ma kirginingambim ak, Gor pen tap siy tap timey nimb giningambim gok niniy ma kirginingamb.

Tap Bul Gipay

16 “Nimb tap ñiñemb kirginiñg, biynimb yesek gok per gipay rek, ma ginimimb. Kiyk apay, miluk mer mer mindon, biynimb niñiy añgñingambay, Gor nup gosimb niñiy, tap ñiñemb kirgiy mey, miluk mer mer mindpay añgñingambay. Nimbip niñind yimb aspiyn: biynimb chinup niñyanñ anggiy giniñgambay kun gok, yimb kuyip dand araniñgambay ak pen, Gor kuyip direp ma giniñgamb. 17 Nimb pen tap ñiñemb gok kirginiñg ginimimb ak; miluk mer mer ma mindenimimb. Ñiñg pik tep giy, wel ay, kom giy mindenimimb. 18 Kun geniñgambim, biynimb gunap nimbip tap keñmañgiy bul gipay anggiy, ma niñniñgambay; Gor nep tap weygiy gipun gok mañgiyseki niñimb rek, nimbip niñiy direp giniñgamb.

Am Gor Yip Mindenjun Anggiy Niñyiñg Mindenimimb

(Luk 12:32-34)

19 “Pen man ar biy tap tep tep gok di nan-ginjun anggiy gos ak ma niñnimimb. Tap kun gok nan-geniñgambim; bi siydep apiy siy diniñgambay akan; simbsis giy, siplep siwiñ giniñgamb. 20 Kun ak tap tep nimb rek gok semb biyoñ nan-gem; simbsis ma ginimuñ, siplep ma siwnimuñ, siy ma diniñgiy, mindnep mindonimuñ. 21 Tap tep nimb gok man ar biy di nan-geniñgambim, gos nimb ak mindeniñgamb man ar biy; semb ar biyoñ nan-geniñgambim; gos nimb ak amniñgamb kun biyoñ.

22 “Windin mañgiy chin ak mey, lam rek mindip. Windin mañgiy ak tep mindek; melik

tep gamb niñrep gipun. ²³ Pen timey gek; kisyim apek ma niñbun. Biynimb melik ma niñbay gok, kisyimnamb okok mindpay.

Gor Yip, Maniy Tap Gok Yip

²⁴ “Bi nokom bap, biyomb omiñal wong giñinimuñ rek ma ayip. Yenen: biyomb bap nup niñek tep geniñgamb, bap nup kirginiñgamb: akan bap nup niñek tep geniñgamb, bap nup kirginiñgamb. Kun ak rek, nimb maniy tap tep lum ar biy mindip gok niñem tep gek, Gor nup kirginiñgambim rek ayip ak; niñrep ginimimb.

*Gos Yomb Ma Niñnimimb
(Luk 12:22-31)*

²⁵ “Ar kun ak mey nimbip aspiyn: tap yerip ñimbiy mindenjun; chech akay nimb ay mindenjun angyi, gos yomb ak ma niñnimimb. Gor nimbip gayek mindpim ak; tap sikoy kun gok ma ñiniñgamb? ²⁶ Nimb niñbim: yakir gok tap yin ma yimbay; wiyt, rays, tap gok ma tik dap nangipay. Bapiy semb biyon ak kuyip kond mindek tap ñimbay. Yakir tap yikop ak tap ñek ñimbay; nimbip kunep giniñgamb. ²⁷ Akan, gosimb kuñay niñiy mey, tapin mindiy kumniñgambun angyi niñbim?

²⁸ “Pen yenen chech tap gok gos kuñay niñbim? Tap key jakip gok, chech napnap tap gok giniñgiy rek ma ayip ak pen, sumsum teprep yimb gok mindip. ²⁹ Kiyñ Solomon tap kuñay mindek ak pen; mokyan tep kun gok rek ma gak. ³⁰ Tap kaskas ak tap yikop. Per mindiy mer; miñiy rek mindiy, toy rek danjiypay. Pen Gor tap yikop

kun gok gay mokyan giñimb ak, yenen chinup ma kond mindeningamb angyi niñbim?

³¹ “Kun ak ñiñg akay ñiñjun; tap yerip ñiñjun; chech akay nimb ayjun angyi, gos yomb ak ma niñnimimb. ³² Biynimb Gor minim ma niñbay gok, tap kun gok dun angyi gos yomb kun ak rek niñbay. Pen nimb niñbim: Bapiy chin semb biyon mindip ak tap nimb yerip tikdip ak niñimb. ³³ Kun ak, Gor biynimb gunap diy kond mindeningamb ak, chinup sek dek biynimb suñ-tep nuk gok mindonjun angyi, nup gos nokom niñiy gem amek mey; tap yikop kun gok dinengambim. ³⁴ Kun ak toy yergiy mindenjun angyi gos yomb ak ma niñnimimb; Gor nimbip minek minek nep kond mindip.

7

Biynimb Gunap Kuyip Kun Gipim Kun Gipim Ma Angnimimb

(Luk 6:37-38, 41-42)

¹ “Chin biynimb tep angyi, biynimb gunap kuyip gos timey niñningambim ak, minim kun ak andkind nimbip ker winingamb. ² Kun ak niñrep ginimimb. Nimb biynimb gunap kuyip giningambim rek, Gor nimbip pen kun ak rek giningamb. ³ Mon bopis windin nimbip pik yiwgiy mindip ak, yenen niñangiy mer, namam tap achip mindip ak nup niñapim? ⁴⁻⁵ Mon bopis yomb windin nimbip pik yiwgiy mindip kun ak diyokiy, windin niñrep giy rek, namam tap achip mindip ak nup, diyokan angyi apim.

⁶ “Gor tap suŋ-tep nuk gok, kayn ayndik gok kuyip ma moknimimb; kumbap milip gok kanj sakiy mindeniŋgiy kiñiŋ sinjak monmon ma ginimimb. Kun giy monmon gem; kiyk tawpaŋg pikey amek, andkind apiy nimbip siwningambay.

*Gor Nup Anŋniŋgambim Rek Nep Giniŋgamb
(Luk 11:9-13)*

⁷ “Tap yerip tikdonimuŋ, Gor nup anŋniŋem nimbip ñiniŋgamb. Pen tap gunap piyow niŋiy niŋniŋgambim. Kinjeŋ yikan anŋiy pik giy-giw gem, nimbip yikniŋgamb. ⁸ Biynimb nup anŋniŋbay gok, anŋniŋbay rek gip. Tap piyow niŋbay ak kuyip ñimb. Kinjeŋ ak yikan anŋiy pik giygiw gey, apay rek niŋiy yikip. ⁹ Nimb bi ñapan sek gok, ñapan nimb bap biret nen anŋek, kamb bap di ñimbikip? ¹⁰ Akan pen, piys nen anŋek, siyŋ bap ñimbikip? Ak kun ma gipkip. ¹¹ Nimb biynimb tep mer ak pen; ñapan nimb gok, kuyip tap tep gok nep ñimbim. Bapiy semb biyoŋ, bi tep yimb ak, nimbip yesek ar ak ma giniŋgamb; nimbip tep giniŋgamb ar ak nep giniŋgamb.

¹² “Pen biynimb gunap, chinup kun giyaŋ anŋiy niŋbim rek nep, biynimb gok kuyip ginimimb. Gor low minim Mosis tikayak ak sek, bi Gor minim anŋep gunap tikayak ak sek kiñiŋ mey kun ak.

*Kinjeŋ Achimb Diy Amiy Perper Mindeniŋgambay Ak
(Luk 13:24)*

¹³⁻¹⁴ “Mon key yinjap kinjeŋ yomb ak; misen niŋiy amrep gipay. Biynimb kuŋaynep miŋgan

kun ak ambay. Kun ak nimb niñrep giy, permindep kinjen sikoy ak diy amnimimb. Kinjen sikoy kun ak kosyam tapay. Biynimb nokom nokom nep, kinjen sikoy par kun ak piyow niñiy ambay.

Gor Minim Yesek Anğñiningambay Rek Ayip Ak Niñrep Ginimimb

(Luk 6:43-46; Luk 13:25-27)

¹⁵ “Pen biynimb Gor minim aspun anğiy yesek apay gok, kanj siypsiyp sayn tep rek silok ay winiğambay ak pen; ap mindyinq kayn ayndik biynimb siw ayip rek ak nimbip giniğambay.

¹⁶ Kun ak miñ giniğambay ak niñiy, kiyk biynimb yerip rek mindpay ak niñrep giniğambim. Nimb niñbim: Miñ ñiwñiw sek yikop gok, tap mañgiy ñiñemb ma piyiniğamb. Mon gok kunep giniğamb. ¹⁷⁻¹⁸ Mon ñiñemb bind gok, mañgiy ma ñiñemb gok ma piyiniğamb. Mon mañgiy ma ñiñemb bind gok ñiñemb gok ma piyiniğamb.

¹⁹ Pen mon bind mañgiy tep ma piyiniğamb gok, timb dam mon yinjap ak yokniğambay. ²⁰ Kun ak miñ giniğambay ar ak niñiy, biynimb gok tep, biynimb gok timey anğiy niñniğambim.

²¹ “Biynimb yip Biyomb chin, Biyomb chin, apay gok Gor kuyip mañgiyseki diy kond mindeniğamb anğiy ma anğnimimb. Bapiy semb biyon anğip rek gipay gok nep kuyip diy kond mindeniğamb. ²² Nin kisen ak apek, biynimb kuñaynep yip anğniğambay, ‘Biyomb chin mey nand nep. Minim tep wonğ nip ak ginuk. Yimb nip nep anğiy, tap biynimb ambañ ayak gok anğyokiy, tap mageprek gok giy ginuk anğniğambay.’ ²³ Yip kun anğniğambay ak

pen, kuyip angninḡayn, ‘Nimbik biynimb yand mer: timey nep gipim! Key okok amnimimb angninḡayn.’

*Bi Omiḡal Korip Girik
(Luk 6:47-49)*

²⁴⁻²⁵ “Bi gos niḡep yimb bap, korip nuk ak giniḡ, kamb ar ak gak. Kisen yinḡen yomb diy, miḡmon yomb pikiy, ḡniḡ wilik apiy gak ak pen, korip nup ak ma pikjiw dand amnak. Kun ak rek mey, biynimb minim yip niḡiy dipay gok.

²⁶⁻²⁷ “Pen bi gos niḡrep ma gak bap, korip nuk ak giniḡ lum sayn ar siḡak gak. Kisen yinḡen yomb diy, miḡmon yomb pikiy, ḡniḡ wilik apiy, korip nup ak pisnep pikjiw dand amnak. Kun ak rek mey, biynimb minim yip niḡiy kirpay gok anḡak.”

²⁸⁻²⁹ Jiysis minim kun ak anḡjiwakniḡ, biynimb kuḡaynep ap mindeyak gok wal anḡiy anḡyak, “Bi low tiysa chin gok apay rek ma anḡip; nuk bi minim niḡrep yimb giy anḡip anḡyak.”

8

*Jiysis Bi Soy Ayndik Ayak Ak Gek Suḡ Ayak
(Mak 1:40-44; Luk 5:12-14; Luk 13:25-27)*

¹ Jiysis dum biyoḡ mindek ak kirgiy, mak biyaḡ apyowakniḡ, biynimb kuḡaynep kisen giyak.

² Pen bi soy ayndik ayak bap, Jiysis mindek maḡ siḡak amiy, koḡgim yimiy, jiy kuyaḡgiy anḡak, “Biyomb. Nand yip gey suḡ ayniḡ, gey suḡ ayniḡgamb anḡak.” ³ Kun anḡek, Jiysis nup diniḡyiḡ, “Nip suḡ ayaḡ anḡak.” Anḡek, won kun anep suḡ ayakniḡ anḡak, ⁴ “Nip gen suḡ ayip kun

ak, biynimb gunap kuyip ma angninimin. Am bi Gor nup simbonjep gok kuyip nep yomiy, ‘Yip sun ayip angnimin!’ Kun angyi, Mosis angak rek, yakir dam Gor nup pik simbonj ninimin. Kun geningamban, biynimb gok ninij, nup sun ayip ak mey kun gisap angningambay angak.”

Bi Amiybi Yomb Ak Nup Wong Giñiyingip Ak Jiysis Gek Sun Ayak
(Luk 7:1-10)

⁵ Jiysis miñmon Kapaniyam amnaknij, amiybi gok kuyip kond mindyingip biyomb bap ap Jiysis nup angak, ⁶ “Bi yip wong gip anup tap yomb giy, yiwur nembnemb gek, kawin kaskas ma giy; korip ak kum mindip angak.” ⁷ Angek Jiysis angak, “Am nup gen sun ayingamb.” ⁸⁻⁹ Angek amiy biyomb kun ak angak, “Ninjind apan ak pen, yand bi tep rek korip yip ak amninimin. Yand ninbiyn ak, amiy biyomb gunap yip kond mindey, yand pen amiybi gunap kuyip kond mindiy; amnimimb anjen, ambay sek; winimimb anjen, opay sek. Bi yip wong gip ak nup, wong gok kun kun giy ginimin anjen gip angak.” ¹⁰ Kun angek, Jiysis gos kuñay yimb ninij, biynimb kisen ameyak gok kuyip angak, “Bi kun biy par okok nimb ak pen, Gor gip rek ninrep yimb giy kun anjip. Bi chin Yisrel nimb bap, Gor nup gosimb ninij anjip kun ak rek anjey, yand ma ninjik. ¹¹ Kisen biynimb par okok nimb gok, Ebrahim, Aysek, Jekop biriwin yip Gor biynimb diy kond mindeningamb namb ak amiy; miñmiñ giying mindeningambay ak pen; ¹² biynimb chin Yisrel nimb gok, am namb kun ak ma mindeningambay

rek ayip. Gor kuyip angyokeningamb, am mindeningambay mis kisyim owip ar biyan angak.”
¹³ Jiysis kun angyi, amiy biyomb kun anup angak, “Nandkaw amnon! Apan rek nep giningamb angak.” Kun angek, korip amiy ninak: binuk tap gak ak, Jiysis angak won kun ak nep suñ ayak.

Jiysis Piyta Numok Nup Gek Suñ Ayak

¹⁴ Pen Jiysis Piyta korip amiy ninak; Piyta numok nup mumbwak okok mon rek yinek kum mindek. ¹⁵ Ninjiy am dinijek, won anep suñ ayek tikjakiy, Jiysis binuk gok yip kuyip tap keñmangiy gayrep gak.

*Jiysis Biynimb Kunaynep Gek Suñ Ayak
 (Mak 1:29-34; Luk 4:38-41)*

¹⁶ Dunjep won ak, biynimb kichekiy amban ayak gok sek, biynimb tap gak gok sek dand Jiysis mindek ak apeyak, nuk kichekiy gok anj mis yokiy, biynimb tap gak gok gek suñ ayak. ¹⁷ Nuk gak kun ak, bi Gor minim anjep Asaya, nind giningamb angyi tikak rek nep gak. Nuk tikiy angak:

“Tap chinup gip gok gek suñ ayingamb. Tap yerip yerip chinup timey gip gok angyokek mind tep giningambun angak.”

*Yand Yip Tangoningambur Angak
 (Luk 9:57-62)*

¹⁸ Jiysis biynimb kunaynep ap nup pinjiy kus kus geyak ninjiy, binuk gok kuyip angak, “Ñing chemb kind bindon amnun angak.” ¹⁹ Kun angakniñ, bi low tiysa bap apiy nup angak, “Tiysa. Nand miñmon akay amningamban ak, yand yip

nep amningambur.” ²⁰ Angek Jiysis angak, “Yakir gok, tip kiyk kinbay ak mindip. Kayn sakiy gok, man mingan okok kinbay; pen Bi bap Ñinuk kinimur mingan ak ma mindip angak.”

²¹ Pen bi Jiysis minim ninyingip bap angak, “Yand nand yip amjur ak pen, yip yaw angey, bapiy nup kumek komiy, nand yip giranjonjur.”

²² Angek, Jiysis angak, “Bi yip gosimb ma ninbay gunap kumeningiy, bi yip ma ninbay gunap dam komningiy; nand apey yand yip tanjonjur angak.”

*Jiysis Angek Yinžen Yomb Ak Kirgak
(Mak 4:36-41; Luk 8:22-25)*

²³ Jiysis bot diy amning gek, binuk gok yip san diyak. ²⁴ Ñing namb sijak amniyakniņ, day yinžen yomb sikerek ak diy, ñing paņg apiy, bot ak tungandikniņ rek gak. Pen Jiysis nuk kinek rek, ²⁵ binuk gok am nup angey tikjakek angyak, “Biyomb! Yinžen yomb ak chinup tungandikek ñing ñinjun rek ayip ak, angey kirgan angyak.”

²⁶ Angeyak kuyip angak, “Yenen piriksipim? Gor nup gosimb ak ma ninbim rek ayip!” Kun angyi tikjakiy, yinžen dek ak angek kirgiy, ñing paņg apek ak wilekiy gak. ²⁷ Kun gek, kiyk gos kuņay niņiy, “Biyomb biy yergiy angek, yinžen ak kirgiy, ñing paņg apamb ak kirgiy gip angyak.”

Bi Malñiluk Sek Omiņal Ak Jiysis Gek Bi Yimb Ayrik

(Mak 5:1-17; Luk 8:26-37)

²⁸ Jiysis ñing tikiy, miñmon Gadara pis bindon amjakakniņ, bi sakiy kichekiy amban ayak omiņal ak, chip komyiņgipay kamb mingan okok

nimb apchakrik. Bi omiñal kun ak kuyip kichekiy ambañ ayak rek, bi kilis yimb mindyĩngipiy. Biynimb bap mindyĩngipiy kinjen tam kun ak ma amyĩngipay. ²⁹ Pen kiyk omiñal apchakiy, Jiysis nup angrik, “Gor Ñinuk! Chirup yergining aswan? Ñin nand chinup anğ miñmon timey yokningamban ak ma wip angrik.”

³⁰ Pen won kun ak, kanj kuñaynep amil ñimbeyak yep gol kun sinak ak mey, ³¹ kichekiy bi omiñal kun ak kuyip abañ ayak gok, Jiysis nup nembnemb giyĩng anğyak, “Chinup anğyokning ginimin ak, anğey am kanj mindpay gindon kuyip molik sikun anğyak.”

³² Anğeyak, amnim anğek, bi omiñal kun ak kuyip kirgiy, am kanj gok kuyip molik sikeyak; kanj gok pirik miñmon mindun pis okok amiy, gindam ñiñ mañgiy chemb biyañ pikiy, ñiñ ñimbey mañgiysek kumdiyak.

³³ Pen bi kanj mokyĩngipay gok gak kun ak niñiy, kasek miñmon dawin yomb ak amiy, Jiysis yerer gak minim ak, biynimb okok kuyip anğñiyak. ³⁴ Anğñeyak kiyk mañgiysek Jiysis nup niñun anğiy, ap nup niñiy, nembnemb giyĩng anğyak, “Miñmon chinup biy kirgiy, key okok amnon anğyak.”

9

Jiysis Bi Ñin Tomb Kalaw Gak Ak Gek Suñ Ayak (Mak 2:1-12; Luk 5:17-26)

¹ Jiysis tip ak bot diy, ñiñ tikiy miñmon nuk kind bindon amnak. ² Pen biynimb gunap, bi ñin tomb kalaw gak bap Jiysis gek suñ ayniñgamb

angiy yirar ay dand mindek ak wiyak. Pen Jiysis gek sun ayniᅅgamb anᅅiy niᅅyak rek, bi ñin tomb kalaw gak kun ak nup anᅅgak, “Ñiyand. Gos sek mindenimin. Tap timey gipan gach ak miᅅniy niᅅiy kirsipiyn anᅅgak.” ³ Anᅅgek bi low tiysa gok, gunap anᅅgyak, “Bi biy Gor nup anᅅjiwyiᅅᅅg asap anᅅgyak.” ⁴ Pen Jiysis gos niᅅyak kun ak key niᅅiy anᅅgak, “Nimb yenen yip gos timey niᅅiy kun aspim? ⁵ Nup tap timey gipan gach ak wiykyokpiyn anᅅᅅen, nimbip tep giniᅅᅅgamb akanᅅ, tikjakiy amnonᅅ anᅅᅅen, nimbip tep giniᅅᅅgamb? Akanᅅ minim yerip ak anᅅᅅen, nimbip tep giniᅅᅅgamb? ⁶ Nimb niᅅbim. Yand Bapiy minim nup ak diy mey, man ar biy apiy, tap siy tap timey gipay gach ak wiykyokpiyn anᅅgak.” Jiysis kun anᅅᅅiy, bi ñin tomb kalaw gak anup anᅅgak, “Tikjakiy, minj nak ak diy, dand korip amnonᅅ!” ⁷ Anᅅgek tikjakiy minj band ak dand korip nuk amek, ⁸ biy nimb gok niᅅiy, anᅅgyak, “Bi man ar biy nimb bap kun ak rek gek ma niᅅnuk;” nuk Gor nep anᅅgek ap gisap anᅅᅅiy, gos kuᅅay niᅅiy, yimb nup ak dand araniyak.

Jiysis Binuk Matyiw Nup Dak

⁹ Jiysis miᅅᅅmon kun ak kirᅅiy, wikan bap amiy niᅅak: bi takes dep ak, woiᅅᅅ giyiᅅᅅᅅip opiys miᅅᅅan ak biᅅiᅅᅅ mindek. Bi kun ak yimb nuk Matyiw. Jiysis nup niᅅiy anᅅgak, “Yip kondan.” Anᅅgek, nup kondak.

¹⁰ Pen bi takes dep gok diy, bi tap timey giyak gok diy, Jiysis binuk gok sek ap Matyiw korip ak tap niᅅyak. ¹¹ Ñimbeyak, bi Peresiy gok niᅅiy, Jiysis binuk gok kuyip anᅅgyak, “Tiysa nimb ak

yenen, bi takes dep gok sek, bi tap siy tap timey gipay gok sek yip jimñiy tap ñinjimb?”¹² Angeyak, Jiysis minim kun ak ninjiy angak, “Biynimb tap ma gip gok, dokta niñning ma ambay; biynimb tap gip gok nep dokta niñning ambay.”¹³ Pen Gor minim bap angak ak junj ak niñrep giy, niñyng mindenimimb. Nuk angak, ‘Yip tap sim-bong ñem, tep ma giningamb; biynimb gok simb niñeningambim, yip tep giningamb angak.’ Pen yand winik ak, biynimb suñ-tep gunap piyow niñning ma winik; biynimb tap siy tap timey gipay gok diyn angiy winik angak.”

Tap Bul Gep

(Mak 2:18-22; Luk 5:33-39)

¹⁴ Ñin bap, Jon bi ñing pikñemb ak binuk gok Jiysis mindek ak apiy angyak, “Chin yip bi Peresiy gok yip, ñin gunap Gor nup nep gos niñun angiy, tap ma ñimbun. Pen bi nand gok yenen kunep ma gipay?”

¹⁵ Angeyak, Jiysis kuyip angak, “Biynimb gok, biyomb kiyk ak yip mindeningambay ñin ak, miñmiñ giy tap niñningambay; pen biyomb anup ñang pikayningambay ñin anep, simb gek tap bul giy ma niñningambay angak.”

¹⁶ Pen Jiysis nind giyngipay ar ak key, miñiy angen giningambay ar ak key angiy, kuyip minim bap paydon ay angak, “Chech kim ak diy, chech wor ay pungrikningamb tam ak ma ñangdiningambay. Yenen: kun giy yim tanzey, tam yomb sikerek ak pungrikningamb.”¹⁷ Pen ñing wayn ak kunep; wayn kisenimb ak giy, di meymey wak milip miñgan ak ma pang

ayningambay. Yenen: kun geningambay, ñing wayn kim ak taniy, biñ yimb angyi, meymey wak ak pungrikiy, songningamb. Kun ak ñing wayn kim ak diy, meymey wak kim nimb mingan ak dayey nep mey, tep giningamb angak.”

*Biyn Bap Sek, Paskoy Bap Sek Suñ Ayak
(Mak 5:22-43; Luk 8:41-56)*

¹⁸ Jiysis minim kun ak angakniñ, Jiwda biyomb bap mindek siñak ap kongim yimiy angak, “Pañ yand ak pisnep kumimb ak pen, nand am nup diniñey, tikjaknimuñ angak.” ¹⁹ Angek, Jiysis binuk gok yip tikjakiy, bi kun ak yip amniyak.

²⁰⁻²¹ Pen biyn bap nup, biyn kinjen pandikakniñ mindek, simiy yin ayak wimingan ak. Kun gek gos nuk anep niñiy Jiysis chech paryomb nup gol okok nep diniñen yip suñ ayingamb angyi, Jiysis amnakniñ kund okok ken amiy, chech nup ak diniñak. ²² Diniñek, Jiysis tungandikiy biyn kun ak nup niñiy angak, “Yip gosimb niñban rek, nip gen suñ ayip. Gos sek mindenimin angak.” Angek, tap nup giyingip ak won kun ak nep suñ ayak.

²³ Pen Jiysis am am, biyomb korip ak amjakiy niñak: biykul pungying, minim kilpul yomb yimb angeyak. ²⁴ Niñiy kuyip angak, “Key okok amnim! Pañ biy ma kumimb; yikop wisin kinjap angak.” Kun angek nup sik angeyak, ²⁵ kuyip ang mis yokiy, korip ñiluk mingan biyan amiy pañ kumak anup, ñin kind ak dek, tikjakak. ²⁶ Kun gek minim kun ak ying dand miñmon okok mangyisek amniyak.

Jiysis Bi Windin Koy Gak Omiŋal Ak Gek Sun Ayak

²⁷ Pen Jiysis miñmon kun ak kirgiy amnakniŋ, bi windin koy gak omiŋal ak nup kisen giying suk angyiŋg angrik, “Depiyt Ñinuk! Chirup simb niŋnimin angrik.” ²⁸ Kun angerik, Jiysis nuk korip kinak miŋgan ak amnakniŋ, bi omiŋal kun ak apiy korip miŋgan amer, kuyipmiŋay angak, “Nir-miŋay, chirup gek sun ayan angyi, yip aspiyr?” Angek angrik, “Yaw! Chir niŋbur, nand chirup geniŋgamban sun ayniŋgamb angrik.” ²⁹ Angerik Jiysis windin kuyipmiŋay ak diniŋiy angak, “Yip gosimb niŋbiyr ak, apiyr rek ginimuŋ.” ³⁰ Angek windin kuyipmiŋay ak sun ayek niŋrikniŋ, kuyipmiŋay angrep giy angak, “Jiysis gamb chirup sun ayip angyi ma angnimiyr angak.” ³¹ Kun angak ak pen; kiykmiŋay amiy biynimb miñmon namb kun ak maŋgiysek angnirik.

Bi Minim Ma Angyiŋgip Bap Tip Ak Minim Angak

³² Pen kiymiŋay amnirikniŋ, biynimb gunap, bi tap aban ayek minim angep rek ma ayak bap, dand Jiysis mindek ak apeyak, ³³ tap nup amban ayak kun ak angyokek, minim angak. Kun gek, biynimb gok wal angyi angyak, “Miñmon Yisrel biy, bi bap kun ak rek gek ma niŋnuk angyak.”

³⁴ Pen bi Peresiy gok angyak, “Nuk kichekiy malñiluk tap gok nop kiyk Seytan kilis ak diy mey, kun gisap angyak.”

Jiysis Biynimb Gok Kuyip Simb Niŋak

³⁵ Pen Jiysis nuk, dawin sikoy okok sek, dawin yomb okok sek giranġiy, Jiwda nan-gep korip okok amiy, kiyn yomb key yimb ak biynimb diy kond mindeniġamb minim tep ak aṅṅniyiġip. Biynimb gok kuyip tap yerip yerip gak ak kunep gek suṅ ayak. ³⁶ Nuk biynimb kun gok niṅak: kanj siypsiyp gok bi kond mindep kiyk bap ma mindip rek ak mindeyak. Gos yomb niṅiy kosyam mindeyak ak, kuyip simb niṅiy, ³⁷ binuk gok kuyip aṅgak, “Tap keṅmaṅġiy kuṅay yimb nep woṅ day ak wos gi mindip ak pen; biynimb pipanġ dand winiṅġiy ak kuṅay ma mindpay. ³⁸ Kun ak nimb Bi woṅday nop nimb ak nup aṅṅniem, bi pipanġ dand owep gunap yokek, pipanġ dand nup ker winiṅġiy aṅgak.”

10

*Jiysis Aṅgak, “nimbip Aspiyn Rek Kichekiy Tap Gok Anġyokniṅgambim Aṅgak”
(Mak 3:13-19; Luk 6:12-16)*

¹ Jiysis binuk onep wimiṅan ak suk aṅgek apey aṅgak, “Yand key nimbip aspiyn ak mey, kichekiy malṅiluk tap gok aṅyokniṅġ, aṅyokniṅgambim. Biynimb tap yerip yerip giniṅamb gok kunep gem, suṅ ayniṅamb aṅgak.”

² Bi Jiysis minim dand amemb onep wimiṅan kun ak, yimb kiyk mey; Bap Saymon, yimb nup bap Piyta aṅġyiṅipay. Bap Enjriw: Piyta numam nuk ak. Bap Jemis: Sebediy ṅinuk. Bap Jon: Jemis numam nuk ak. ³ Bap Piyliyp. Bap Batlomiwiw. Bap Tomas. Bap Matyiw. Nuk takes diyiṅip. Bap Jemis: Alpiyas ṅinuk. Bap Taydiyas. ⁴ Bap

Saymon: yimb nup bap Selot angyingipay. Bap Jiwdas: nuk mey, kisen Jiysis nup mimunḡ gak.

*Jiysis Binuk Gok Kuyip Anḡ Keykey Yokak
(Mak 6:7-13; Luk 9:1-5)*

⁵ Jiysis binuk kun gok kuyip minim tep wong ak ginimimb anḡiy, anḡ keykey yokyong anḡak, “Nimb Samariya kay mindpay namb okok sek, biynimb Jiwda mer namb okok sek ma amnimimb. ⁶ Pen nimb am biynimb chin Yisrel, Gor nup gosimb ma niḡbay gok kuyip anḡñiyong anḡnimimb, ⁷ ‘Gor biynimb diy kond mindeningamb ñin ak maḡ wip anḡnimimb.’ ⁸ Kun anḡyong biynimb tap ginimunḡ gok gem suḡ ay, biynimb pisnep kumningiy gok gem, tip ak tikjakningiy. Biynimb soy ayndik aynimunḡ gok, biynimb kichekiy malñiluk abanḡ aynimunḡ gok gem, suḡ aynongiy. Bapiy chirapiy, nimbip per yikop wong gipur rek, nimb biynimb kun gok kuyip yikop wong giñnimimb. ⁹ Maniy gunap dand ma amnimimb. ¹⁰ Wand, chech, tomb tirup, yirkondim, tap gok, dand ma amnimimb. Yenen: biynimb wong giñimbay gok, pen tap ñey ñimbay.

¹¹ “Pen dawin akanḡ, miñmon bap amjakiy, biynimb nimbip sik anḡdiningiy rek gunap niḡiy, kiy yip nep mindiy, miñmon bap key amning nep kuyip kirgiy amnimimb. ¹²⁻¹³ Kun ak korip bap amiy, nimb mindpim anḡgem, yaw mindpun anḡgeningiy, korip miḡgan kun ak amnimimb. ¹⁴ Pen nimbip ma sik anḡdeningiy; kiring amning, silkul tom beḡ nimbip chingdiy mindonimunḡ ak, pipal pikem yapek amnimimb. ¹⁵ Nimbip niḡind yimb apiyn: kor yomb ñin ak, Sodom Gomora

biynimb yiwur siskoy diniᅅgambay; biynimb nimbip ma diniᅅgambay kun gok, yiwur yomb yimb ak diniᅅgambay.

*Miker Kuᅅaynep Winiᅅgamb
(Mak 13:9-13; Luk 21:12-17)*

¹⁶ “Pen niᅅim! Yand nimbip kanj siypsiyp rek ak, yoksipiyn: biynimb kayn ayndik rek mindpay namb okok. Kun ak gos niᅅrep giyiᅅg, kapkap mindrep giy kuyip aᅅᅅniᅅimimb.

¹⁷ “Pen biynimb gunap nimbip chichiy diy, dam Jiwda nan-gep korip ak amey, kanjsol kiyk gok ap kor giy, nimbip pikniᅅgambay. Kun ak niᅅrep ginimimb. ¹⁸ Nimbip Jiysis binuk aᅅgiy, lipiᅅg dand gapman biyomb mindeniᅅgambay ak amey, minim tep yip ak, biyomb gok sek, bi miᅅmon paryomb okok nimb gok sek kuyip aᅅᅅniᅅgambim. ¹⁹⁻²⁰ Nimbip kor giniᅅgambay kun ak, minim yerip aᅅjun aᅅgiy pirikiy, gos kuᅅay ma niᅅnimimb. Apikniᅅ, Nap Gor Kawnan nuk nimb yip mindip ak, gos tep ᅅeniᅅgamb, minim nimbik ar ak key ma aᅅniᅅgambim; minim yipund giy yimb anep aᅅniᅅgambim.

²¹ “ᅅin kun ak numam gunap tikjakiy, numam gunap kuyip pikayaᅅ aᅅgiy, biyomb gok kuyip ᅅiniᅅgambay. Nop gok tikjakiy, ᅅapan kiyk key gok pikayaᅅ aᅅgiy, biyomb gok kuyip ᅅiniᅅgambay. ᅅapan gok, nonim nop sikop kuyip kunep giniᅅgambay. ²² Yip ker mindeniᅅgambim rek, biynimb okok maᅅgiyseᅅ nimbip niᅅey, miluk yowniᅅgamb. Pen biynimb kilis giy yip ker nep mindeniᅅgambay gok; ᅅin kisen ak apek, Gor kuyip diniᅅgamb. ²³ Pen wikan bap amem,

nimbip gi timey geniᅇgiy, pirik wikan bap pen amnimimb. Nimbip niᅇind aspiyn: Yisrel biynimb kuyip sayn nep aᅇᅇem amnakniᅇ, Bi bap Ñinuk ak winiᅇgamb.

²⁴⁻²⁵ “Ñapan sikul apay gok yomb mindey; tiysa kiyk gok sikoy ma mindpay. Pen tiysa mindip rek mindon aᅇgiy mey, sikul apay. Biynimb wong giᅇimbay gok yomb mindey, biynimb kuyip kond mindpay gok sikoy ma mindpay. Wong gipay ak, biynimb yomb mindpay rek mindon aᅇgiy, wong gipay. Kun ak rek, biynimb yand gok yand mindpiyn rek mindon aᅇgiy gipay. Pen yip aᅇjiwiy, Seytan yimb nup bap ay, ‘Belsiybul’ apay ak, nimbip timey yimb giniᅇgiy rek ayip.

Gor Nup Nep Pirikep
(Luk 12:2-9)

²⁶ “Biynimb kun gok kuyip niᅇiy ma piriknimimb. Minim yerip miᅇiy yiwgiy mindip ak, kisen misenᅇ mindeniᅇgamb. Tap yerip kapkap gipay gok, kisen misenᅇ niᅇniᅇgambay. ²⁷ Minim nimbip weygiy apiyn gok, nimb am misenᅇ aᅇᅇinimimb. Nimbip mimuᅇᅇ tikiyᅇᅇ apiyn gok, korip ar biyone amiy, aᅇᅇem niᅇniᅇgiy.

²⁸ “Nimb biynimb sinjrimey pikpay gok kuyip niᅇiy ma piriknimimb. Kiyk yikop wak band anep pikayniᅇgambay; mindmaᅇgiy ak sek timey giniᅇgiy rek ma ayip. Piriᅇniᅇᅇ mey, Biyomb biynimb mumbwak ak sek, mindmaᅇgiy ak sek pikay, miᅇmon mon key yinjap yokniᅇgamb anup piriknimimb. ²⁹ Yakir sikoy gok, tap yikop. Maniy gach won nokom nep yokiy, omiᅇal dipay. Tap yikop ak pen, Gor kuyip niᅇmindip ak, yikop ma

yap pikpay. ³⁰ Jun kas nimbip ak, Gor maŋgiysek ñin paŋgip. ³¹ Kun ak ma piriknimimb. Yakir gok ma kond mindep rek kond mindip.

³² “Biynimb yip ker mindiy, biynimb okok kuyip misen aŋñiniŋgambay gok, yand pen Bapiy yomb semb biyon mindip ak nup, yip ker mindpay aŋgiy, misen aŋñiniŋgayn. ³³ Pen biynimb an yip aŋgiy mindeniŋgambay namb ak, bi kun ak yand ma niŋbiyn aŋniŋgambay gok, yand pen Bapiy semb biyon anup, biynimb guniy yand ma niŋbiyn aŋniŋgayn.

Penpen Giniŋgambay

(Luk 12:51-53; Luk 14:26-27)

³⁴ “Yand man ar biy opiyn ak, kapkap mindrep giniŋgambun aŋgiy, gos ak ma niŋnimimb. Yand winik rek, minim yomb aŋgiy, penpen giniŋgambay. ³⁵ Ñi gok tikjakiy, nop yip penpen giniŋgambay. Pañ gok tikjakiy, nonim yip penpen giniŋgambay. Ñi biyn gok tikjakiy, nupis yip penpen giniŋgambay. ³⁶ Kun giniŋgambay kun ak, korip keykey mindpay rek nep penpen giniŋgambay.

³⁷ “Biynimb nop nonim kuyip akan, ñi pañ kiyk gok nep gos niŋiy, yip ma niŋniŋgambay ak; biynimb yand rek ma ayniŋgamb. ³⁸ Biynimb yip gosimb niŋniŋg, pen pikayniŋgambay rek ayip aŋgiy kirginiŋgambay ak, biynimb yand rek ma ayniŋgamb. ³⁹ Biynimb keynep mindiy, mind tep giniŋgayn aŋniŋgambay gok, mon key yinjab ak amniŋgambay. Biynimb Jiysis ker minden, yip pikayniŋg pikayniŋgiy aŋniŋgambay gok, perper mindeniŋgambay.

*Gor Kuyip Pen Kunep Kond Mindeningamb
(Mak 9:41)*

⁴⁰ “Nimb amem, biynimb nimbip wasiw angdiningambay gok, yip diningambay. Pen yip diningambay rek, Bi yip yokek winik ak nup diningambay. ⁴¹ Biynimb bi Gor minim anjep bap ninjiy, Gor wonj gip rek, nup diningambay ak, tep yimb giningambay ak mey; Gor bi minim nup anjep ak direp giningamb rek, kuyip kunep giningamb. Biynimb Gor biyn bi suņ-tep nuk bap ninjiy, Gor biynimb suņ-tep nuk anjiy diningambay ak, tep yimb giningambay ak mey; Gor biynimb suņ-tep nuk ak direp giningamb rek, kuyip kunep giningamb. ⁴² Pen biynimb yip yikop yimb bap ninjiy, Jiysis ker mindip anjiy ñiņ marik giningambay gok; Gor niņek tep gek, pen sakiy ma giningamb.”

11

*Jon Binuk Gunap Anjyokek Jiysis Nup Niņning
Wiyak
(Luk 7:18-35)*

¹ Jiysis binuk onep wimingan ak kuyip, kun kun giy ginimimb anjiy anjñirep giy, miñmon kun ak kirgiy, dawin yep maņ kun okok amiy, biynimb gok kuyip minim anjñak.

² Pen Jon bi ñiņg pikñemb ak kalambis mindiy, Krays yerer gak minim ak ninjiy, binuk gunap anjyokek Jiysis mindek ak amiy, ³ nup anjñiņiy anjyak, “Nand mey bi kiņ yomb key yimb anjiy per kond mindpun ak nep opan akan, bi kisenimb kun ak key kond mindonjun?”

⁴ Anǵeyak Jiysis kuyip anǵak, “Nimb Jon mindip amiy anǵnimimb, ‘Chin amiy niᅇbun: ⁵ bi kun ak biynimb windin koy gip gok gamb windin niᅇbay. Biynimb timund miᅇgan pil gip gok gamb gos niᅇbay. Biynimb tomb timey gip gok gamb kinjeᅇ taᅇgrep gipay. Biynimb soy ayndik ayip gok gamb milip gip. Biynimb kumbay gok gamb tip tikjak-pay. Biynimb simbgeprek gok kunep Gor minim tep ak anǵek niᅇbay anǵnimimb.’ ⁶ Pen minim bap anǵnimimb, ‘Biynimb yip gosimb niᅇiy, gosow gosow ma niᅇbay gok, miᅇmiᅇ yimb giniᅇiy anǵnimimb anǵak.’”

⁷ Kun anǵek, Jon binuk gok amniyakniᅇ, Jiysis biynimb ap mindeyak gok kuyip, Jon minim ar ak anǵiy anǵak, “Nimb nind miᅇmon nep namb okok amnimbik ᅇin ak, yerip giniᅇ ambik? Sund par nokom bap yiᅇgen diy, dand amiy apiy gek niᅇniᅇ ambik? ⁸ Akan yenen ambik? Bi chech teprep nep aypay gok niᅇniᅇ ambik? Bi chech teprep dun anǵiy niᅇbay gok, biyomb korip kil-rimey okok kinbay. ⁹ Pen tap yerip ak niᅇniᅇ ambik? Yikop ma ambik. Jon bi Gor minim anǵep ak niᅇniᅇ ambik. Bi Gor minim anǵep wiᅇniᅇgamb anǵiy kond mindyiᅇgipim mey, bi kun ak. ¹⁰ Nup anǵiy Baybol buk ak tikiy anǵyak:

‘Bi minim anǵep yand ak anǵen nind amiy, biynimb gok anǵrep gek, kisen ᅇiyand ak anǵen niᅇniᅇgamb anǵiy tikiyak.’

¹¹ Nimbip aspiyn: Jon biynimb man ar biy, maᅇiysek wiyniym gip ak pen; Gor biynimb yikop yimb diy kond mindeniᅇgamb gok, Jon rek ma mindeniᅇgambay; Gor biynimb tep nuk yimb

gok mindeningambay. ¹² Jon bi ñiņg pikñemb ap minim tep aņgñak ñin ak tikiy, biynimb gok Gor chinup diy kond mindonimuņ aņgiy, kilis gi dand apiy, miñiy kunep kilisrimey yimb gipay.

¹³ “Mosis low minim tikak ak sek, bi Gor minim aņgep gunap minim tikiyak ak sek kiñiņ ak mey, Gor Kiyņ yomb key yimb ak nup yokek, nuk biynimb gok kuyip diy kond mindeningamb. Minim kun ak aņg dand apey apey mey, Jon owak. ¹⁴ Pen minim aņgriņg gispiyn ak diniņgambim akan ma niņbiyn. Gor Jon nup aņgek ap biynimb gok kuyip minim aņgñak ak; Baybol buk ak tikiy giniņgamb aņgyak rek nep gak. Tikiy aņgyak,

‘Bi Gor minim aņgep Yilayja rek bap nind apek; bi kiyņ yomb key yimb ak kisen winiņgamb aņgyak.’

¹⁵ Nimb biynimb gos timund sek gok, minim kun ak niņnimimb.

¹⁶ “Biynimb miñiy ñin biy mindpay gok yand niņbiyn: kiyk ñapan ñaņ gunap, ñapan ñaņ gunap kuyip apay rek ak mindpay. ¹⁷ Ñapan ñaņ gunap meņg miņgan dand araniy apay, ‘Chin akil puņgon, nimb yenen kamep ma apim? Kamep siy aņgep rek ak aņgon, nimb yenen siy ma apim apay?’ ¹⁸ Kun ak rek Gor Jon nup yokek apiy, ñin gunap tap ma ñimbiy, ñiņg wayn ak ma yimb ñimbiy gek aņgyak, ‘Bi kun biy nup tap yerip ak ambaņ ayek kun gip aņgyak.’ ¹⁹ Bi bap Ñinuk pen apek apay, ‘Bi tap yomb ñimbiy, ñiņg wayn kuņay ñimbiy, bi takes dipay gok yip, bi tap siy tap timey gipay gok yip taņgip apay.’ Apay kun ak, biynimb gosimb ma mindip gok rek apay aņgak.”

Minim Yomb Diniŋgambay

(Luk 10:13-15)

²⁰⁻²¹ Jiysis miñmon yomb gunap nind giranġiy, tap mageprek gek niñyak ak pen; yenen tap siy tap timey gipun anġiy, nup chinġiy mindrep ma giyak. Kun gey, Jiysis kuyip kuñay yimb anġiy anġak, “Korasin biynimb gok diy, Betsayda biynimb gok diy tap mageprek gok gen niñiy kirpay rek, minim yomb yimb diniŋgambay. Taya biynimb gok sek, Saydon biynimb gok sek kuyip tap mageprek kun gok nind rek gembiniñ niñiy, chech bek band rek gunap yimiy, tun mañġiysek giy mindembiyap. ²² Kun ak kor yomb ñin ak, Taya biynimb sek, Saydon biynimb sek minim sikoy rek diniŋgambay; Korasin biynimb gok sek, Betsayda biynimb gok sek minim yomb yimb ak diniŋgambay.

²³ “Pen ñin kun ak Kapaniyam biynimb gok, semb biyoñ ma amniŋgambay; pisnep mon key yinjap kaw miñgan ak amniŋgambay. Sodom biynimb, nimb timey yimb gipim rek ma giyak ak pen, kuyip mon yinak. Nimbik tap mageprek gok gen niñbik ak pen, Gor nup gosimb ak ma niñbim. ²⁴ Ar kun ak yand nimbip niñind yimb aspiyn: kor yomb ñin ak apek, Sodom biynimb gok minim sikoy rek diniŋgambay; nimb Kapaniyam biynimb gok, minim yomb yimb ak diniŋgambim anġak.”

Yand Bapiy Nup Niñbiyn, Nuk Yip Niñimb

(Luk 10:21-22)

²⁵⁻²⁶ Ñin kun ak Jiysis Nop nup anġak, “Bapiy nand Biyomb. Semb biyoñ sek, man biy sek kond

mindpan ak, gos nand key niñey tep gip rek, biynimb gos tipañgiy niñbun apay gok kuyip kirgiy, biynimb ñapan ñañ rek mindpay gok kuyip gos tep ñimban ak, nip tep aspiyn angak.”

²⁷ Kun angiy angak, “Bapiy kilis nuk mindip rek, yip ñimb. Biynimb gunap yip ma niñrep gipay; Bapiy nep yip niñimb. Yand nep Bapiy nup niñrep gipiyn. Pen biynimb gos tep ñiyn angiy niñbiyn gok, gos tep ñen, nup niñbay angak.”

²⁸ Kun angiy angak, “Nimb biynimb mindrep ma giy kosyam mindpim gok mangiysek, yip ker apem, gen kapkap mindrep giniñgambim. ²⁹ Yand bi sayn tep kapkap mindpiyn rek, yand yip nep tangiy miñ yand ak niñrep giy mey, mind tep giniñgambim. ³⁰ Minim yip niñiy yand yip tangem mey, nimbip miker per gip rek ma giniñgamb angak.”

12

Jiwda Lotiw Ñin Ak, Wiyt Manjiy Tik Ñiñyak (Mak 2:23-28; Luk 6:1-5)

¹ Jiwda lotiw ñin ak, Jiysis binuk gok yip wiyt wong namb ak amyiñg, binuk gok yiwan gek, wiyt manjiy kun gok gunap diy, wak pikyokiy ñimbyiñg ñimbyiñg amniyak. ² Kun geyak, bi Peresiy gok niñiy, Jiysis nup angyak, “Binak gok yenen lotiw ñin wong magep biy, wiyt manjiy tik wak pikyokipay angyak.”

³ Angeyak kuyip angak, “Depiyt wosrey binuk gok yip yiwan gek, ⁴ Gor angninep korip ak amjakiy, biret Gor windin yirik ar ak ay, bi yikop ma ñimbay: bi Gor nup simbonjipay gok nep

ñimbay biret ak kuyip angninek nup ñey, binuk gok yip ñinyak. Pen yiwan gek giyak kesim kun ak, Baybol buk biyan tikyak ak nimb ma niñbim?

⁵ “Nimb Mosis Baybol buk tikak ak ma niñbim rek ayip. Nuk tikiy angak, ‘Bi Gor nup tap simbonjep gok, lotiw ñin ak Gor angnep korip ak mindiy, niñind wong gipay angak.’ ⁶ Pen lotiw korip kun ak tap yikop: Bi bap Ñinuk ap mindip biy Biyomb yimb. ⁷ Pen minim bap Baybol buk tikyak ak, niñrep ma gipim rek ayip. Minim kun ak tikiy angyak, ‘Biynimb yip tap simbonj ñimbay ak, tep ma gip; biynimb gok kuyip simb niñbay ak yip tep gip angyak.’ Minim kun ak niñiy ma gipim ak mey, bi yand gok mindrep giyakniñ, kuyip ang gipik. ⁸ ‘Lotiw ñin Lotiw ñin’ apim ak, Bi bap Ñinuk nep kond mindip angyi niñnimimb ak pen, gos kun ak ma niñbim angak.”

*Jiysis Bi Ñin Pipich Gak Ak Gek Sun Ayak
(Mak 3:1-6; Luk 6:6-11)*

⁹ Jiysis miñmon kun ak kirgiy, miñmon bap amiy, Jiwda nan-gep korip miñgan ak amnak. ¹⁰ Pen korip miñgan kun ak bi ñin pipich gak bap mindek. Biynimb ap mindeyak gok, Jiysis minim gunap angek nup dand kor amnun angyi, nup angyak, “Lotiw ñin ak, biynimb sun ayan angyi gep akan mer?”

¹¹ Angeyak, Jiysis kuyip angak, “Kanj siypsiyp nimb bap lotiw ñin ak kaw miñgan ameningamb, yingpang yokningambim akan mer? Yingpang yoknimimb rek ayip. ¹² Pen kanj siypsiyp ak tap yikop. Biynimb ak tap yimb. Lotiw ñin gok sun

ayan angyi giningambun ak, minim ma mindip angak.”

¹³ Jiysis kun angyi, bi ñin pipich gak ak nup angak, “Ñin almil ayan!” Angek, ñin almil aysipiyn angak, pisnep suñ ayak.

¹⁴ Kun gek ninjiy, bi Peresiy gok am nan-giy angyak, “Nup kun kun giy pikayjun angyi, minim kapkap angayrep giyak.”

Jiysis, Gor Bi Wong Giñemb Nuk Yimb

¹⁵ Kun angeyak ninjiy, nuk miñmon kun ak kirgiy, wikan gunap amning sandakniñ, biynimb kunaynep kisen giyak. Kun geyak, nuk biynimb tap gak gok gek suñ ayakniñ, ¹⁶ kuyip angak, “Bi ak kun kun gip angyi, ma angnimimb angak.”

¹⁷ Jiysis gak kun ak, bi Gor minim angep Asaya giningamb angak rek nep gak. Nuk tikiy angak:

¹⁸ “Bi yand pisnep yiñ dipiyn biy, wong yip giñimb. Bi kun ak yip niñen tep yimb gip. Kawnan yand ak nup bak ayek, minim tep yip ak biynimb miñmon keykey mangiysek angniningamb.

¹⁹ Pen nup miluk yapek minim yomb yimb ma angningamb. Biynimb mindpay okok yip nep niñningiy angyi, menñ miñgan dand araniy ma angningamb. ²⁰ Biynimb ma ninbay gok kuyip kapkap angrep giningamb. Lam sungning gek, kalasin pangey yin nep mindip rek ak kuyip angningamb. Nuk kun giy gi dand amiy, Gor anqip rek pis ak arane; tap siy tap timey gep pis ak pisnep apyowningamb.

21 Biynimb miñmon okok nimb gok kunep, nup gos sek kond mindeningambay angak.”

Jiysis Nup Belsiybul Kilis Dip Angyak

(Mak 3:20-30; Luk 11:14-23; Luk 12:10)

22 Bi kichekiy ambañ ayek, windin koy giy minim ma angyingip bap dand apeyak; Jiysis kichekiy ak anğ mis yokek; windin yimb niñiy, minim angyi gak. 23 Biynimb mindeyak gok, gak kun ak niñiy, wal angyi angyak, “Bi kun biy basind Depiyt Niñuk per kond mindpun ak rek ayip angyak.”

24 Pen bi Peresiy gok minim kun ak niñiy, gos kiyk okok nep niñiy angyak, “Bi kun ak Gor nup anğniñiy ma angyokip; nuk kichekiy malñiluk tap gok nop kiyk Belsiybul kilis ak diy angyokip angyak.”

25-26 Pen gos niñyak kun ak Jiysis key niñiy, kuyip angak, “Seytan tikjakiy, biynimb nuk gunap angyokningamb ak; yergiy biyomb mindeningamb? Miñmon bap penpen angyi asik keykey ayingambay ak; apyap pikningambay. Miñmon yomb bap akan biynimb kiñiñ nokom bap, penpen angyi asik keykey ayingambay ak; apyap pikningambay. Nimb kun ak rek aspim ak pen; Seytan layn nuk key gok kuyip ma angyokningamb.

27 “Yip kichekiy malñiluk tap okok nop kiyk Belsiybul kilis ak diy angyokip apim ak pen; yip anğem niñyin: biynimb nimb gok key Belsiybul kilis ak diy angyokpay? Kiyk key nimbip anğningambay, ‘Biynimb bap kun giniñiy rek ma ayip anğningambay.’

²⁸ “Pen Gor Kawnan ak yip kilis ñek angyokpiyn ak, yenen Gor binuk biynimb diy kond mindeningamb ak wip biy angyi ma niñbim.

²⁹ “Bi kalrimey bap mindek, tap nup gok dining, yikop ma ambay. Nup miñ tiwning ay nep, am tap nup gok dipay.

³⁰ “Biynimb yip ker mindpay gok, biynimb gok kuyip dand yip ker opay. Biynimb yand mer gok, biynimb yip ker wining gipay gok kuyip yuk dam yokpay. ³¹ Kun ak nimb niñrep ginimimb. Biynimb gok tap timey geningambay akan, Gor nup minim deningambay, nuk niñiy kirginimuñ rek ayip; pen Gor Kawnan ak nup minim dey; kuyip niñiy kirginimuñ rek ma ayip. ³² Bi bap Ñinuk ak nup minim timey angeningambay, Gor niñiy kirginingamb. Pen Gor Kawnan ak nup minim timey angeningambay; ñin biy kunep, ñin kisen ak kunep niñiy kirginimuñ rek ma ayingamb.

*Minim Key Apim Ar Ak Nimbip Kor Giningamb
(Luk 6:43-45)*

³³ “Yip yenen, ‘Seytan amban ayek, wong tep ak gip apim?’ Mon tep gok mangyi timey ma piyip; mon timey gok mangyi tep ma piyip. ³⁴ Pen nimb siy saraw ñapan tikpay gok mey kun apim. Nimb biynimb timey kun ak rek, yergiy minim tep angingambim? Biynimb minim apay rek niñiy gos yerip niñbay ak, niñningambun. ³⁵ Biynimb tep gok gos tep niñiy mey, tep gipay; biynimb timey gok, gos timey niñiy mey, timey gipay. ³⁶ Niñrep ginimimb. Kisen kor yomb ñin ak, Gor biynimb gok kuyip mangyisek minim mon-mon angyi akan, timey angyi giyak rek, yenen

kun gipik angyiy, kuyip angninngamb. ³⁷ Kun ak minim angninngambim rek ninjiy, biynimb gok sun-tep, biynimb gok yiwur dep angninngamb.”

*Tap Mageprek Gey Ninun Angyak
(Mak 8:12; Luk 11:29-32)*

³⁸ Bi low minim ninjep gok sek, bi Peresiy gok sek ap Jiysis nup angyak, “Tiysa! Tap mageprek bap gey, chin ninjiy mey, nip Gor nep yokek wip angninngambun angyak.”

³⁹ Angeyak angak, “Nimb biynimb tap siy tap timey nep gipim. Tap mageprek bap gey ninun apim ak pen; nimbip tap bap gen ma ninngambim. Bi Gor minim anjep Jona nup gak ar ak nep yip gek, ninning ninngambim.

⁴⁰ Wosrey piys yomb ak Jona nup kal ayek, kongiy namb akyan ñin omiñal nokom mindiy, andkind owak. Kun ak rek, yand kunep ñin omiñal nokom man namb okok mindiy, andkind winingayn. ⁴¹ Wosrey Jona am Niyniypa biynimb kuyip angek, tap siy tap timey giyak gok kasek kirgiy, Gor nup gosimb ninjak. Jona bi yikop ak angek ninjak; nimb pen biyomb yimb miñiy mindip biy, minim ankip ak ma dipim. Kun ak kor yomb ñin ak, miker yomb yimb dinngambim.

⁴² “Biyn Kiwiyn yomb, miñmon Siyba nimb ak, wosrey gak rek ak ninbim. Miñmon nuk par okok nimb ak pen, Jiwda kiyñ yomb Solomon minim nup ak ninning owak. Solomon bi yikop ak nup kun gak; pen yenen biyomb miñiy mindip biy minim ankip ak ma ninbim. Kun ak kor yomb ñin ak, minim yomb dinngambim angak.”

*Gor Nup Deniŋgambim Kichekiy Tap Gok Tip
Kiyk Ma Mindeniŋgamb
(Luk 11:24-26)*

⁴³ “Seytan layn nuk kichekiy tap gok bap biynimb aban ay mindiy, mis amiy, biynimb gu-
nap kuyip aban ayin angyi, niŋrang mer niŋiy,
⁴⁴ andkind apiy niŋniŋgamb: bi nind kiring
amniŋgamb ak, Gor Kawnan ak yip ma min-
deniŋgamb; tip teprep ak nep mindeniŋgamb.
⁴⁵ Nuk niŋiy, bi timey nuk rek mer, timey yimb
onep ar ak poŋind apeniŋgamb, bi kun ak nup
molik sikniŋgambay. Kun gey, nind tep tep
mindek rek mer; kisen pisnep mind timey yimb
giniŋgamb. Kun ak rek mey, biynimb ñin namb
biy mindiy, alemb alemb ñi mindpay gok.”

*Jiysis Nonim Numam Sikop
(Mak 3:31-35; Luk 8:19-21)*

⁴⁶ Jiysis biynimb gok kuyip minim angakniŋ,
nonim numam nuk yimb gok mis biyan apiy
angyak, “Chin Jiysis nup minim angning aswun.”
⁴⁷ Angeyak bi bap korip miŋgan amiy, nup angak,
“Nanim namam nak gok, nip minim angning ap
mindpay mis biyan angak.”

⁴⁸⁻⁴⁹ Angek biynimb nuk yip korip miŋgan
biyan mindeyak gok kuyip niŋkus giy angak,
“Niŋind apan ak pen, biynimb korip miŋgan
mindpay guniy kunep amiy yand, mam yand gok
nep mindpay. ⁵⁰ Biynimb Bapiy yomb semb biyon
angip rek niŋbay gok, amiy, mam, ay yand gok
nep mindpay angak.”

13

Jiysis, Gor Minim Niñrep Giyan Anjiy Paydon Ayak

(Mak 4:1-9; Luk 8:4-8)

¹ Ñin kun ak, Jiysis korip kun ak kirgiy am Galiyliy chemb gol ak bisgiy minim anğñining gek, ²⁻³ biynimb kuñay yimb nep ap nup piñiy kus kus geyak, nuk am bot ar ak bisgiy, am ñiñg namb siñbindoñ mindyiñg; kuyip minim paydoñ ayiñg anğñak.

Anğñiyiñg anğak, “Bi bap wiyt jakan anjiy, wiyt mañgiy ak dam woñgday okok yokek, ⁴ gunap kinjeñ kosemb ar ak yapek, yakir gok apiy ñiñningambay. ⁵ Gunap kamb ar man siskoy ayningamb okok yapiy kasek gup giningamb ak pen, kindiy am wos ma giningamb rek, ⁶ pumb niñiy milip giyowningamb. ⁷ Pen gunap kikasik dindbilij namb okok yapiy jakningamb ak pen, miñ kun ak saw giy pikñimbek, milip giningamb. ⁸ Pen gunap lum teprep ar okok yapiy, jak tep yimb giy, mañgiy kuñay yimb nep piyningamb. Gunap ñin jiwiy rek piyningamb; gunap ñin jiwiy omiñal rek piyningamb; gunap ñin jiwiy kaw bap rek piyningamb anğak.” ⁹ Jiysis kun anjiy anğak, “Nimb biynimb gos timund sek mindenimimb gok, minim aspiyn biy niñnimimb anğak.”

Yenen Minim Paydon Ay Anjiyñigip

(Mak 4:10-12; Luk 8:9-10)

¹⁰ Jiysis kun angek, binuk gok apiy, nup anğniñiy angyak, “Biynimb gok kuyip, yenen minim paydoñ ay nep apan?”

¹¹ Anǵeyak anǵak, “Gor biynimb nuk diy kond mindeningamb minim weygiy mindyǵip ak, nimbip gos ñek niǵningambim; pen biynimb yikop gok ma niǵningambay. ¹² Biynimb minim yip niǵiy dipay gok minim gunap sek niǵiy, junj ak niǵrep giniǵambay; pen biynimb minim yip niǵiy ma dipay gok, minim sikoy niǵbay ak pisnep kurginiǵamb. ¹³ Kuyip minim paydon ay apiyn ak; kiyk windin sek, gos timund sek ak pen, anǵip mey ak anǵiy, ma niǵbay.

¹⁴ “Gipay kun ak, bi Gor minim anǵep Asaya nind giniǵamb anǵiy tikak rek nep gipay. Minim kun ak tikiy anǵak:

‘Minim niǵningambay ak pen, minim anǵip kun anǵiy ma niǵningambay. Windin niǵningambay ak pen, tap bap ma niǵningambay. ¹⁵ Biynimb guniy minim yand apiyn ak kuyip yiruk gek ma yimb niǵbay. Gor minim niǵon chinup gek biynimb nuk mindenjun rek ayip anǵiy, timund pilgiy, windin jukiya nep mindpay anǵak.’

¹⁶⁻¹⁷ “Kun ak kiyk ma niǵbay; Gor nimbip gos tep ñek niǵbim ak, miñmiñ ginimimb. Biynimb Gor nup chingyak gok sek, minim nup anǵep gok sek kunaynep Kiyǵ yomb key yimb ak nup niǵun anǵyǵipay ak pen, yip ma niǵiy, minim yip ma niǵiy giyak. Miñiy nimb minim yip niǵiy, yip niǵiy gispim ak, miñmiñ ginimimb.

Jiysis Tap Yiǵ Paydon Ay Anǵak Ak Misen Anǵñak

18 “Pen minim paydon ay anğambiyn junj ak nimbip angen niñim. 19 Wiyt mañgiy gunap kinjeñ kosemb ar ak yapeningamb, yakir gok ñimbdiningambay apiyn ak; biynimb gok, Gor biynimb diy kond mindeningamb minim tep ak niñning gey, Seytan gek sakiy giningambay anğiy apiyn.

20-21 “Pen mañgiy gunap kamb ar man siskoy ayingamb okok yapiy, kasek gup giningamb ak pen kindiy am wos ma gek, pumb niñiy milip giningamb apiyn ak; biynimb gok minim yip ak kisen niñningambay won ak niñiy miñmiñ giningambay ak pen; won ak sakiy giy gos ar gunap niñningambay anğiy apiyn. 22 Mañgiy gunap yowningamb kikasik dindbilin namb okok apiyn ak; minim yip ak niñningambay ak pen; wonğ wariy, korip kanj, tiw minan, maniy tap gok nep gos niñiy; Gor minim tep ak kir-giningambay anğiy apiyn. 23 Pen mañgiy gunap man tep ar ak yapiy, jak tep giy, mañgiy kuñay piyningamb apiyn ak; biynimb gok minim yip ak niñiy, yip chingrep yimb giningambay. Gunap mindrep giningambay, gunap mindrep yimb giningambay, gunap mindrep giy ar kun ak key yimb giningambay anğiy apiyn anğak.”

Biynimb Yikop Gok, Gor Biynimb Nuk Gok Yip Wilikiy Mindpay

24 Jiysis kuyip minim bap sek paydon ay anğak, “Gor biynimb diy kond mindeningamb ak kesim dispiyn biy rek giningamb. Biyomb bap wiyt mañgiy gok jakan anğiy, dam wonğday nuk okok yokningamb. 25 Pen kisyim biyan kin

amningambay won ak, bi timey bap tap yin timey gunap dand apiy, namb kun okok yokiy amningamb. ²⁶ Pen wiyt yin tep gok jakakniñ, tap yin timey gok sesek jakningamb. ²⁷ Kun gek, bi wonq giñemb gok apiy anqningambay, ‘Biyomb! Tap yin tep gok nep dam wonqday ak yokpan; tap yin timey gok yergiy namb kun okok sesek jaksap?’ ²⁸ Anqey kuyip anqningamb, ‘Bi yip miluk niñimb bap dap yokip.’ Anqek anqningambay, ‘Chin am tap yin timey jakip kun gok tunqjiw yokjun akan?’ Anqey bi wonqday nop nimb ak anqningamb, ²⁹⁻³⁰ ‘Mer! Ñin biy, tap yin timey kun gok tunqjiwim anqen, am tap yin tep gunap sek tunqjiwnimimb rek ayip ak, kirgem omiñal giy jaknimun. Pen jakiy mangiy piy, dep ñin ak apek ker, bi yand gok anqen, tap timey gok tunqjiwiy, dam mon dangiyey yin simbok amek; wiyt mangiy gok nep di nan-giy, dam korip miñgan yip ak yokningambay anqningamb.’ ”

*Jiysis Mon Mastet Yin Ak Paydon Ay Anqak
(Mak 4:30-34; Luk 13:18-21)*

³¹⁻³² Jiysis kuyip minim bap pen paydon ay anqak, “Bi bap mon mastet yin ak dam wonqday nuk ak yokningamb. Mon yin kun ak mangiy sikoy ak pen; jak yomb giy, alik tep ak pikek, yakir gok ap alik keykey korip giningambay. Kun ak rek mey, Gor biynimb diy kond mindeningamb minim tep ak anqak.”

Jiysis Yiis Minim Ak Paydon Ay Anqak

³³ Minim bap pen paydon ay anqak, “Biyn gok tap yiis ak di pilaw sek tunqandik mandik giy

daŋgiyey yin yomb yimb tanimb. Kun ak rek mey, Gor biynimb diy kond mindeningamb minim tep ak aŋgak.”

Jiysis Biynimb Gok Kuyip Minim Paydoŋ Ay Nep Aŋgñak

³⁴ Jiysis biynimb gok kuyip minim guniy aŋgñining misen ma aŋgyiŋgip; paydoŋ ay nep kuyip aŋgñiyiŋgip. ³⁵ Gak kun ak, bi Gor minim aŋgep bap nind giniŋgamb aŋgiy tikak rek nep gak. Nuk minim kun ak tikiy aŋgak:

“Miñmon alwol gayak ñin ak tikiy mind dand apiy miñiy mindpun ñin biy, minim ma niŋyak ak; kuyip paydoŋ ay aŋgñiningayn aŋgak.”

Jiysis Kuyip Tap Yiŋ Rek Paydoŋ Ayak Minim Kiñiŋ Ak Aŋgñak

³⁶ Jiysis biynimb gok kuyip kun aŋgiy, korip miŋgan amnakniŋ, binuk onep wimiŋgan gok apiy nup aŋgyak, “Tap yiŋ timey woŋgday namb okok jakip aŋgiy paydoŋ ay apan ak, chinup aŋgey niŋun aŋgyak.”

³⁷ Aŋgeyak aŋgak, “Bi tap yiŋ tep woŋgday okok yokip apiyn ak, Bi bap Ñinuk. ³⁸⁻³⁹ Woŋgday apiyn ak, mankumb biy maŋgiysek. Tap yiŋ tep apiyn gok, Gor biynimb diy kond mindeningamb gok. Bi tap yiŋ timey dap yokek jakak apiyn ak, bi yip miluk niŋimb Seytan nup apiyn. Tap yiŋ timey jakip gok, Seytan biynimb nuk gok kuyip apiyn. Pen wiyt maŋgiy pik giniŋgamb ñin apiyn ak, ñin kisen ak apiyn. Bi tik dand owep apiyn ak enjol gok kuyip apiyn. ⁴⁰ Tap monmon jakip gok tunŋgiw di mon yinjap yokniŋgambay apiyn

ak: ⁴¹ Bi bap Ñinuk enjol gok kuyip angek, am biynimb Gor biynimb nuk gok yip yingonng giy mindyinq, key timey gipay rek, biynimb gunap kuyip gey timey gipay ak, ⁴² anq mon sinjrimey yinimb ak yokey, yiwur gakniq, menq siwbirikiy siy anqningambay anqiy apiyn. ⁴³ Ñin kun ak Gor biynimb suq-tep nuk gok nuk yip mindiy, mindrep giy, sup melik pik mindeningambay. Nimb biynimb gos timund sek gok, minim kun ak niqnimimb.

Gos Nokom Niñiy Gem Amnimuq

⁴⁴ “Pen Gor biynimb diy kond mindeningamb gok, kesim ar biy rek mindip. Bi bap amiy niqningamb, maniy kes wosrey weygiyak bap mindeningamb. Nuk niñiy tap gunap di aybirik tep giy korip amiy, tap nuk gok mañgiysek mon-mon yokiy maniy diy, maniy kun ak dand amiy tip wikan kun ak tawiy, am maniy kes kun ak diningamb.

⁴⁵⁻⁴⁶ “Bi sikyim gep gok kunep kumbap piyow niqrañgiy kumbap milip yimb bap niñiy korip amiy, tap kiyk gok mañgiysek yokiy maniy diy, am kumbap kun ak tawningambay.

Jiysis Wimben Minim Ak Paydoñ Ay Angak

⁴⁷ “Gor biynimb diy kond mindeningamb ak; bap mey kesim ar anqning gispiyn biy rek. Biynimb gunap wimben dand amiy, ñing mañgiy chemb ak yokey, piys kuñaynep apiy miñgan kun ak ambay. ⁴⁸ Kun gey wimben ak lipiñg dand gol okok amiy, piys tep gok yipruñg piys ayep baket miñgan ak ay, piys timey gok diyokpay. ⁴⁹ Ñin

kisen ak kun ak rek giningamb. Gor enjol nuk gok angyokek apiy, biynimb sun-tep gok key ay, biynimb tap siy tap timey gipay gok key ay,⁵⁰ dam mon yinjap ak yokeningambay; menj siwbirikiy, siy ang mindeningambay angak.”

⁵¹ Kun angyiy angak, “Minim aspiyn gok ninbim?”

Angek, binuk gok, “Yaw. Ninbun angyak.”

⁵² Angeyak angak, “Basind sikop Gor minim angyingipay ak ninjiy, Gor biynimb diy kond mindeningamb minim yand apiyn ak ninjiy gipim ak mey, biynimb gunap angñining; minim tep nind-nimb ak sek, kisenimb ak sek angñiningambim angak.”

Nasaret Biynimb Jiysis Nup Ma Diyak
(Mak 6:1-6; Luk 4:16-30)

⁵³ Pen Jiysis paydon ay minim angak kun gok angyiwiy, miñmon nuk amiy,⁵⁴ Jiwda nan-gep korip ak amiy biynimb gok kuyip minim angñek ninjiy, wal yimb angyak. Kisen pen angyak,⁵⁵⁻⁵⁶ “Bi kun biy nop nonim, numam nunay nuk gok, chin yip mindpay ak, nuk yergiy biyomb rek mindiy, minim key angyiy, tap mageprek gok gisap. Nop nuk ak bi kapenda; nonim Mariya; numam nuk gok; Jemis ak, Josep ak, Saymon ak, Jiwdas ak. Kun ak nuk yergiy ap kun asap?”

⁵⁷ Kun angyiy, nup miluk ninyak.

Pen Jiysis kuyip angak, “Bi Gor minim anjep gok biynimb miñmon par okok amiy anjep, ninjind apay angyiy ninbay ak pen korip miñmon kiyk key ak anjep, yesek apay angyiy kirpay rek ak nimb gispim angak.”⁵⁸ Minim angak ak ma

ninĕyak, miñmon kun ak tap mageprek tapin ginimuñ rek ma ayak.

14

*Jon Bi Ñiñg Pikñemb Ak Kumak
(Mak 6:14-29; Luk 3:19-20; 9:7-9)*

¹ Pen gapman biyomb miñmon Galiyliy kond mindep Herot, Jiysis nuk yerer gak minim ak niñiy, ² am binuk gok kuyip angak, “Jiysis tap mageprek gip ak, nuk bi bap key mer; nuk Jon bi ñiñg pikñemb anep. Nup pikaynik ak pen; tip ak tikjakiy ap mindip rek, niñind tap mageprek kun gok gisap angak.”

³⁻⁵ Pen Jon nup kalambis ay, pikyak minim kiñiñ ak kun giy mindip: Herot nuk tikjakiy numam Piyliyp biyn nup ak di gek, Jon angak, “Ak girep ma gip.” Kun angek nup sen tiwningiy, dam kalambis ay, pisnep pikayen kumañ angiy gos niñak ak pen; biynimb gok Jon nup bi Gor minim angep chin angyak rek, pirikiy kirgak.

⁶ Pen kisen Herot nup nonim tikak ñin ak apek, biynimb kuñaynep ap nan-giy patiy geyak, Herodiyas panuk ak, ap namb kun ak deniys gek, Herot niñek tep yimb gak. ⁷ Kun gek, nuk pañ kun anup minim angay angak, “Yand niñind aspiny. Nak tap bap angnineningamban; monmon ñiningayn angak.” ⁸ Angek, pañ kun ak, nonim angak rek niñiy angak, “Jon bi ñiñg pikñemb jun won ak piler ar ay, dap ñinimin angak.”

⁹⁻¹⁰ Kun angek Herot niñek simb gak ak pen; biynimb gok niñmindyakniñ, pañ kun anup misen minim angay, “Tap bap angnineningamban

monmon ñiningayn angak” rek niñiy, bi gunap angyokek, Jon kalambis mindek ak amiy, jun won nup ak timbrikiy, ¹¹ di piler ar ak ay dapiy pañ kun ak nup ñeyak, nuk pen dand amiy, nonim nup yomek niñiy, ak niñind apay angyi niñak.

¹² Pen Jon nup kun giy kuñam timbrikeyak, binuk gok apiy, nup dam komiy, am Jiysis nup anğñiyak.

*Jiysis Payp Tawsin Biynimb Ak Tap Ñek Ñiñyak
(Mak 6:31-34; Luk 9:10-17; Jon 6:1-13)*

¹³ Jiysis minim kun ak niñiy, am miñmon wikan bap key minden angyi bot diy, miñmon kun ak kirgiy sanđak. Pen biynimb gok, Jiysis amnakniñ kisen amnun angyi, miñmon kiyk gok kirgiy, lum ar amiy, Jiysis amniñg gek okok amniyak.

¹⁴ Jiysis amjakiy bot ak kirgiy gol okok apiy niñak: biynimb kuñaynep mindeyak. Kuyip niñek simb gek, biynimb tap gak gok gek, suñ ayak.

¹⁵ Pen duñgek wakniñ, binuk gok mindek ak apiy nup angyak, “Kisyim asaw. Akniy miñmon nep namb ak; biynimb kuñaynep guniy anğey, korip namb akniy amiy, keñmanğiy kiyk gunap tawiy ñiñyan angyak.” ¹⁶ Kun anğeyak kuyip angak, “Nimb kuyip tap keñmanğiy ñinimimb angak.” ¹⁷ Anğek angyak, “Chin tap keñmanğiy kuñay ma mindip; yikop biret onep mamind ak, piys omiñal sek mindip angyak.”

¹⁸ Anğeyak Jiysis angak, “Tap kun gok dand wim.” ¹⁹ Kun angyi, biynimb gok kuyip anğek, tap kaskas ar okok bis giyakniñ, biret kamb ak diy, piys omiñal ak diy, kuyonğiy niñiy, Gor nup tep angyi, biret ak tipanğiy binuk gok kuyip ñakniñ,

kiyk diyıng biynimb gok kuyip bilok ñiyak. Piys ak kunep giyak. ²⁰ Kun giy bilok ñeyak, ñimb gey gey tapin ayek day day kirgiyak gok, binuk gok wand onep wimıngan ak di yıngey pisnep arachakak. ²¹ Biynimb tap ñınyak kun ak, biyn gok sek, ñapan sikoy gok sek mer; bi gok nep mey, payp tawsin rek amnak.

*Jiysis Ñıng Kas Ar Ak Tawind Wak
(Mak 6:45-52; Jon 6:15-21)*

²² Jiysis binuk gok kuyip pis bindon amniyan angyi, angek bot diy sanıdyakniı, biynimb gok kuyip angyokiy, ²³ nuk key Gor nup angnııning, miñmon dum bap amnak. Dungek wakniı, nuk dum kun ak asiı mindek. ²⁴ Pen binuk gok bot dand ñıng namb yomb sıak amniıakniı, yıngen yomb sikerek ak apiı, bot ak tungandikniı rek gak. ²⁵ Won kun ak miñmon yownıng gek ak mey, Jiysis ñıng kas ar ak tawind apiı, mindeyak maı sıak apek niııı, ²⁶ ak chip kawnan bap asaw angyi, jel pirikiı wal angyak.

²⁷ Jiysis pen kuyip angak, “Ma piriknimimb! Yand nep aswiın angak.”

²⁸ Angek Piyta angak, “Biyomb! Nand nep apiı ker; yip angeı, ñıng kas ar ak tawind kayan ak niın angak.”

²⁹⁻³⁰ Angek Jiysis angak, “Kun ak owan angak.”

Angek, Piyta bot ar ak kirgiı, ñıng kas ar ak tawind Jiysis mindek sıak amiı niıak: yıngen yomb sikerek ak apiı, nup ñıng namb akyan pongek yownıng rek gek pirikiı, “Biyomb! Ak-ey angak.”

³¹ Kun angek, Jiysis kasek nup chichiy diy angak, “Yip gosimb ninban ak pen, yenen gos ominjal ninamban angak.”

³² Kun angyi, bot mingan ak amnirikniñ, yingen yomb dek ak kirgak. ³³ Kun gek niñiy, binuk bot mingan biyan bising mindeyak gok, Jiysis nup lotiw giying angyak, “Nand Gor Ninuk yimb angyak!”

Genesaret Biynimb Tap Gak Gok Jiysis Gek Sun Ayak

(Mak 6:53-56)

³⁴ Pen kiyk niñg tikiy miñmon Genesaret pis bindoñ amjakeyak, ³⁵ biynimb kun gok Jiysis nep wip angyi, biynimb mañ kun okok mangyisek suk angey, biynimb tap gak gok dand wiyak. ³⁶ Dand apiy, Jiysis nup nembnemb giying angyak, “Chinup yaw angey ker, biynimb tap gip guniy, chech nip gol okok nep diniñey sun ayañ angyak.” Angeyak yaw angek, biynimb nup diniñyak gok kuyip mangyisek sun ayak.

15

Peresiy Kay Nupis Nusind Sikop Angyinigipay Rek Kindik Giyingipay

(Mak 7:1-13)

¹ Pen nin kun ak, bi Peresiy gunap, bi low tiysa gunap Jerusalem nimb apiy, Jiysis nup angyak, ² “Bi nand guniy, yenen apis basind sikop minim per ak kirgiy, nin kiyk niñg ayokiy mer, yikop nep tap nimbay?” ³ Angeyak Jiysis angak, “Nimb yenen Gor minim nup ak kirgiy, nimb key gipim rek giniñgiy aspim? ⁴ Gor angak, ‘Nap nanim

anġnimiyr rek niġdinimimb! Pen ma niġdey, kuyip pikayniġgiy anġgak.’⁵⁻⁷ Pen nimb minim kun ak yipund giy ma anġñimbim. Biynimb gunap nop nonim kuyip kirginiġ, ‘Bapiy amiy kuyip tap ñimbinup ak pen, maniy biy Gor nup ñiniġgambun rek kirsipun anġey,’ nimb niġiy, ‘Tep apay’ apim. Kun ak, yesek yimb apim. Biynimb nep minim anġaypay gok anġñiyiġ, Gor minim aspun apim. Nimb biynimb minim anep anġrapim gok, Gor niġind yimb bi minim nup anġep Asaya nup gos ñek, minim tikiy anġgak:

8-9 ‘Biynimb guniy yip yesek nep Gor biyomb chin; chinup tep gip apay. Ak minim nep apay; yip gosimb ma niġbay. Gor minim tep ak anġñispun anġgiy, minim kiyk key gok nep anġñimbay anġgak.’ ”

Tap Biynimb Gek Gach Gip Gok
(Mak 7:14-23)

¹⁰ Jiysis kun anġgiy, biynimb mindeyak gok anġgek maġ siġak apeyak anġgak, “Minim anġniġ gispiyn ak niġrep ginimimb! ¹¹ Biynimb gok tap monmon okok ñimbey, simbwur namb kuyip biyaġ amiy gach ma gip; namb kiyk biyaġ gos timey niġbay ak mey gach sek mindpay anġgak.”

¹² Pen Jiysis binuk gok apiy nup anġyak, “Bi Peresiy gok, minim apan ak niġey kuyip miluk yowip ak niġban?” ¹³ Anġeyak anġgak, “Ak minim ma mindip. Bapiy semb biyoġ tap yiġ nuk ma yimimb gok junj sek piġiyjiw diyokniġgamb. ¹⁴ Bi kun gok windin koy! Bi windin koy bap, bi windin koy bap nup poġind dand amiy, omiġal giy kaw miġgan ak apyap pikniġgayr anġgak.”

¹⁵ Jiysis kun angek, Piyta angak, “Minim kun giy paydon ay apan kiñiñ ak, chinup angnëy niñun angak.”

¹⁶⁻¹⁷ Angek angak, “Kiyk ma niñbay rek, nimb kunep ma niñbim? Niñim! Tap yerip yerip monmon ñimbay gok, Gor niñek, minim ma mindip. Ak yikop ñimbiy, simb kiy yokpay. ¹⁸ Namb kiyk biyañ gos timey niñbay ak gek mey, gach sek mindipay. ¹⁹ Gos kiyk key niñiy: biynimb pikay, biyn siy bi siy giy, tap okok siy diy, tom giy, biynimb anggiwiy gipay. ²⁰ Gipay kun ak mey, Gor niñek timey yimb gip; pen tap ñiñning, ñin ñiñg ma ayokiy monmon ñimbay ak; Gor niñek minim ma mindip angak.”

*Biyn Keynan Nimb Bap Jiysis Nup Pisnep
Chingak
(Mak 7:24-30)*

²¹ Jiysis miñmon Genesaret kun ak kirgiy, miñmon yomb Taya sek, Saydon sek amnak. ²² Am kun okok mindek, biyn Keynan nimb bap miñmon kun ak mindek ak apiy, Jiysis nup angak, “Biyomb. Depiyt Ñinuk! Yip simb niñnimin. Pañ yip ak kichekiy ambañ ayek, mindrep ma yimb gip angak.”

²³ Angek, Jiysis pen ma yimb angak. Pen binuk gok apiy nup angyak, “Biyn biy chinup kisen giyiñg, kilpul nep anqip. Nup angyokan angyak.”

²⁴ Angeyak angak, “Gor yip yokek Jiwda biynimb Gor nup kirpay gok kuyip diyn angyiy winik angak.” ²⁵ Kun angek, biyn Jiwda mer kun ak, ap Jiysis mindek kiñiñ siñak kongim yimiy angak, “Biyomb! Yip simb niñnimin angak.”

²⁶ Angek angak, “Keñmanġiy ñapan chin ñinjun ak, yenen di kayn gok mokjun?”

²⁷ Angek biyn kun ak angak, “Biyomb. Niñind apan ak pen; kayn gok nop kiyk apyong tap ñinyakniñ, day day boñg molik okok yowip gok nep ñimbay angak.”

²⁸ Angek Jiysis angak, “Gor nup gosimb niñiy apan ak, apan rek giniñgamb angak.” Kun angakniñ, kichekiy ak won kun anep panuk nup kirgiy mis amnak.

Jiysis Biynimb Kuñaynep Gek Suñ Ayak

²⁹ Jiysis andkind Galiyliy chemb gol taw akdon ken amiy, mak ak kuyongiy am dum biyon bisgak.

³⁰ Bisiñg mindakniñ, biynimb tiwin yomb gok keykey biynimb tomb timey gak gok, windin koy gak gok, minim ma angyiñgipay gok, ñin tomb tind mand gak gok, tap yerip yerip gak gok mañgiysek dand apiy Jiysis mindek tomb anġin siñak ayakniñ, kuyip gek suñ ayak. ³¹ Kun gek, biynimb kun gok niñiy wal angyiñg angyak, “Chin Yisrel biynimb Gor chin ak tep yimb. Biynimb windin koy gok gek niñsipay; biynimb minim ma apay gok gek minim aspay; biynimb ñin tomb timey gak gok gek tañgrop gispay anġiy,” yimb nup dand aranyak.

Jiysis Bi Pow Tawsin Rek Tap Ñek Ñinyak (Mak 8:1-10)

³² Jiysis binuk onep wimiñgan ak kuyip angek apeyak angak, “Biynimb guniy kuyip simb niñsipiyn. Ñin omiñal nokom yand yip nep mindpay ak pen, kuyip tap ñen ñiñniñgiy ak ma

mindip. Kuyip yikop angen amey, kinjenamb okok windin mayn apek, apyap pikningambay angak.”

³³ Angek binuk gok angyak, “Miñmon biynimb kuñay ma mindpay namb kun akniy, keñmangiy akay nimb piyow niñiy dapiy, biynimb kuñaynep kun guniy ñon ñiningambay?” ³⁴ Angeyak Jiysis angak, “Biret nimb yerip yerip mindip?” ³⁵ Angek angyak, “Biret onep ar ak mindiy, pis sikoy gunap sek mindip angyak.” Angeyak, Jiysis biynimb gok kuyip angek, man ar kun sinak bisgiyak. ³⁶ Bisgiyakniñ, biret onep ar ak diy, piys sikoy gok diy, Gor nup tep angiy, tipanjiy binuk gok kuyip ñek, kiyk diy biynimb gok kuyip bilok ñiyak. ³⁷ Ñeyak, ñimb gey gey tapin ayek, day day kirgiyak gok, binuk gok wand onep ar ak diy, yingey, pisnep arachakak.

³⁸ Biynimb tap ñinyak kun gok, biyn gok sek ñapan sikoy gok sek mer; bi gok nep mey, pow tawsin rek annak.

³⁹ Pen kun giy tap ñimbiy, Jiysis kuyip angyokek amniyakniñ, nuk bot diy, miñmon Makadan pis biym amiy, miñmon namb kun okok annak.

16

Tap Mageprek Bap Gey, Chin Niñun Angyak (Mak 8:11-13; Luk 12:54-56)

¹ Bi Peresiy gunap, bi Sanjiwsiy gunap Jiysis yergonimun nup anjjiwjun angiy, ap nup angyak, “Nand kiyñ yomb key yimb mindpiyn apan ak, tap mageprek bap semb biyon genimin, niñind apan angiy niñun angyak.”

² Angeyak kuyip angak, “Pumb sanjind amiy, likañ likañ pikakniñ, ‘Miñmon tikrep giniñgamb apim.’ ³ Miñmon yowakniñ, semb biyoñ gach giy, likañ likañ gakniñ, ‘Ak miñmon pikniñg gisap apim.’ Kun giy niñrep gipim ak pen; Gor kun giy rek gip, kun giy rek giniñg gisap angyi, gos ak ma niñbim. ⁴ Nimb biynimb miñiy mindpim gok, mindrep ma giy, Gor nup gosimb ak ma nep niñbim. Tap mageprek bap gey niñun apim ak, yand gen ma niñniñgambim. Bi Jona nup gak rek yip gek niñniñg niñniñgambim angak.” Jiysis kun angyi, kuyip kirgiy wikan bap amnak.

Minim Kiyk Angñimbay Ak Ma Dinimimb Angiy Paydoñ Ay Angak
(Mak 8:14-21)

⁵ Jiysis binuk gok bot diy, pis bindoñ amiy niñyak: biret gok sakiy giy dand ma amniyak. ⁶ Kun ak mey, kisen Jiysis kuyip bi Peresiy gok sek, bi Sanjiwsiy gok sek yiys kuyip ak asikrep ginimimb angek, ⁷ kiyk key angnin angnin giy angyak, “Chin biret ak dand ma opun ak mey, kun asap akan angyak.”

⁸⁻⁹ Pen Jiysis angyak kun ak key niñiy angak, “Nimb yenen biret ma dand opun angyi anğ amiy apiy gispim? Yand Gor Ñinuk. Yerer giniñg giniñgayn gos ak ma niñbim? Pen bi payp tawsin rek mindeyak ñin ak, biret onep mamind ak diy, tipang ñenik, ñimb dand doñwiw geyak; wand yerip yerip yingem arachakak? ¹⁰ “Pen kisen bi pow tawsin rek mindyakniñ, biret onep ar ak ñenik, ñimb dand doñwiw geyak, wand yerip yerip yingem arachakak? ¹¹ Ñin kun ak nimb

key mindiy biret wand yipik ak pen, paydon ay anğambiy ak ma niñiy, yip biret nen asap apim. Biret nen ma aspiyn. Bi Peresiy gok sek, bi Sanjiwsiy gok sek yiys kiyk ak nimbip dinimuj rek ayip anğiy aspiyn.”¹² Kun anğek niñyak, tap yiys biret sek aypay ak ma anğak: bi Peresiy gok sek, bi Sanjiwsiy gok sek minim anğñimbay gok ma niñnimimb anğiy anğak.

*Piyta Anğak, Nand Kiyñ Yomb Gor Ñinuk Yimb
(Mak 8:27-30; Luk 9:18-21)*

¹³ Kisen Jiysis binuk gok yip miñmon Siysariya-Piyliypay namb ak tanğyñg, kuyip anğak, “Biynimb okok yip bi an apay?”

¹⁴ Anğek binuk gok anğyak, “Gunap Jon bi ñiñg pikñemb ak apay; gunap Yilayja apay; gunap Jeriymaya apay. Gunap pen, bi Gor minim anğep gunap apay anğyak.”

¹⁵ Anğeyak Jiysis kuyip anğak, “Nimb key pen, yip an anğiy niñbim?”

¹⁶ Anğek binuk Saymon Piyta anğak, “Nand bi kiyñ yomb key yimb Gor biynimb gek kim mindpay ak Ñinuk anğak.”

¹⁷ Anğek Jiysis anğak, “Saymon Jona ñinuk. Nand gos niñban kun ak, key okok nimb ma wip; Bapiy semb biyon anep nip gos tep ñek niñban.

¹⁸ “Piyta. Nand bi kamb rek kilis timey giy apan kun ak, tep apan. Biynimb yand diniñgayn gok mey kun ak rek. Seytan ap kuyip yergenñgamb; yip ma kirginiñgambay.

¹⁹ “Biynimb Gor miñmon amniñgambay kiywur ak nip ñiniñgayn. Ñen nand lum ar biy mindiy, miñ ar akay niñey yipund

ma gek mer angningamban ak, Gor kunep angningamb. Pen miñ ar akay niñey yipund gek, yaw angningamban ak, Gor kunep angningamb angak.”

²⁰ Jiysis kun angyi binuk gok kuyip angak, “Biynimb gok kuyip, yip bi kiyñ yomb key yimb mey kun ak angyi, ma angnimimb angak.”

Jiysis Kumiy Tikjakningayn Angak
(Mak 8:31–9:1; Luk 9:22-27)

²¹ Ñin namb kun siñak Jiysis binuk gok kuyip, biynimb gunap nup timey giningambay rek misen angyi angak, “Kisen Jerusalem amen, bi minim tungasikep gok diy, bi low tiysa gok diy, bi Gor nup tap simbonjep yomb gok diy, yip yiwur ñiy pikayningambay ak pen; ñin ominjal nokom mindiy tip ak tikjakningayn angak.”

²² Kun angek Piyta, Jiysis nup dand gol siñak amiy, minim yiñ rek angyi angak, “Minim kun ak tep ma apan. Gor nip kond mindek, kun ma ginimuñ angak.”

²³ Angek, Jiysis pen Piyta nup angak, “Seytan. Yip kirgiy amnon! Yip yenen mer angyi aspan? Gor gos niñimb rek ma niñban; biynimb gos niñbay rek nep niñiy aspan angak.”

²⁴ Kun angyi binuk gok kuyip angak, “Biynimb an yip ker mindniñ ginimuñ ak; tap man ar biy gos yomb niñbay ak kirgiy, pumbnamb kisyimken yip kisen giy; miker yomb dep akan kumemb gos ak sakiy giy, yip chingiy nep tanjeningiy. ²⁵ Biynimb Jiysis nup diy mindon tep ma giningamb angyi niñningambay gok, pisnep apyap pikningambay; pen biynimb nup

diy mindon chinup yerginingamb ak, minim ma mindip angningambay gok kuyip den perper mindeningambay.

²⁶ “Biynimb tap man ar biy dun angyi gey amningamb gok, gos yomb kiyk ak ar kun anep ameningamb mey; perper ma mindeningambay. Akan Gor nup tap kun gok tawiy, kilis diningambay? Mer yimb! ²⁷ “Kisen Bapiy minim ak diy, enjol gok yip, andkind winingayn ñin ak, biynimb mindrep giningambay gok key ay, biynimb mindrep ma giningambay gok key ay giningayn. ²⁸ “Nimbip niñind yimb aspiyn: biynimb mindpim guniy gunap kim mindpikniñ, Bi bap Ñinuk biynimb diy kond mindeningamb ñin ak apek niñningambim angak.”

17

Jiysis Wak Nuk Ak Key Yimb Ayak (Mak 9:2-13; Luk 9:28-36)

¹ Jiysis minim kun ak angyi, ñin onep kangol ak mindiy; Piyta, Jemis, Jemis numam Jon ak, kuyip yakam poñind, dum yiy akyon bap amiy, key mindeyak. ² Mindyakniñ, Jiysis wak nup ak key yimb ay, jomluk ak pumb rek niñiy, chech nuk ak ñiñakol yimb gak. ³ Kun gakniñ niñyak: bi Gor minim angep nind kumrik Mosis yip Yilayja yip, ap Jiysis yip minim anğ minderik. ⁴ Kiyk niñiy, Piyta Jiysis nup angak, “Biyomb! Chin biy mindpun ak, tep yimb mindpun. Nand yaw angey ker, korip bandak band omiñal nokom ginjun. Nip bap, Mosis nup bap, Yilayja nup bap angak.”

⁵ Kun angakniņ, semb tund yimb ak apiy, kuyip maņgiysek yiwgak. Yiwiņg dakniņ, minim bap semb namb kun ak nimb angak, “Ñi mapin yand biy, yip tep yimb gip. Minim yerip yerip aņgnimur ak, niņdinimimb angak.”

⁶ Minim kun ak kun giy angek niņiy, Jiysis binuk gok gos kuņay niņiy pirikiy, apyap koņgim yimiy, jomluk kiyk ak man akyan ken ay mindeyak.

⁷ Jiysis ap kuyip diniņiy angak, “Ma piriknimimb. Tikjakim!” ⁸ Angek tikjakiy niņyak, nuk nep mindek.

⁹ Pen mak ak kuyangiying, Jiysis kuyip angak, “Miņiy yerer gamb niņbim kun ak biynimb gok kuyip ma aņgñinimimb. Kisen kumiy tikjaken mey, biynimb okok kuyip aņgñinimimb angak.”

¹⁰ Angek nup angyak, “Bi low tiysa gok yenen, Yilayja nind apeniņgamb; kisen Kiyņ yomb key yimb ak mankumb biy winiņgamb apay?”

¹¹ Angeyak angak, “Niņind apay. Minim kun ak mindip. ‘Yilayja nind apiy kuyip aņgrop gek, kisen Kiyņ yomb key yimb ak winiņgamb angyak.’

¹² Pen niņim: Yilayja owak ak pen, apek nup ma niņyak. Gos kiyk key niņyak rek nup timey giyak. Bi bap Ñinuk ak nup kunep giniņgambay angak.”

¹³ Kun angek, binuk gok niņyak; Yilayja angak kun ak, Jon bi ñiņg pikñemb ak nup nep angak.

Jiysis Ñi Kichekiy Ambaņ Ayak Bap Gek Suņ Ayak

(Mak 9:14-29; Luk 9:37-42)

¹⁴ Pen kiyk giw biyaņ amjakiy niņyak biynimb kuņaynep mindeyak. Bi bap biynimb mindeyak namb kun animb ap Jiysis mindek siņak koņgim

yimiy angak, ¹⁵ “Biyomb! Ñi yip ak simb niñnimin. Nup sakiy ayek mindrep ma gip. Per am mon yinimb namb okok sek, ñiñg namb okok sek gi dam pikip. ¹⁶ Nup dand binak gok mindambay ak amen, nup gi mer niñiy kirpay angak.”

¹⁷ Angek Jiysis angak, “Nimb biynimb miñiy ñin biy mindpim gok, Gor nup gosimb ma niñiy mindrep ma gipim. Minek akay niñiy key giniñgambim. Minim per angen niñbim ak, yergiy minim kil sek angnim?” ¹⁸ Kun angiy angek dand apeyak, kichekiy nup amban ayak ak angyokek; won anep suñ ayak.

¹⁹ Kun gek, binuk gok Jiysis mindek ak apiy, kiyk nep mindyñg nup angniniy angyak, “Yergek kichekiy amban ayak kun ak, angyok mer niñiy kirpun?”

²⁰ Angeyak angak, “Gor gek mis amniñgamb angiy, gos kilis giy ma niñbim ak mey kun gip. Pen niñim! Gos nimb ak mon mastet yin mañgiy sikoy mindip rek ak niñiy, niñwos giniñgambim ak; tap yerip okok angem, angniniñgambim rek giniñgamb. Miñmon yirik biy liñg siñbindoñ amnoñ angeniñgambim, Gor gek amniñgamb. ²¹ [Pen kichekiy amban ayip kun ak, yikop angyokep rek ma ayip. Tap keñmañgiy kirgiy Gor nup angnin mindiy mey, angyokpay angak.”]

*Jiysis Kumiy Tikjakniñgayn Angiy Tip Ak Angak
(Mak 9:30-32; Luk 9:43-45)*

²² Jiysis binuk gok, miñmon Galiyliy ap nan-geyak, kuyip angak, “Mañ mindip: Bi bap Ñinuk nup dand amiy, biynimb gunap kuyip ñeniñgambay, ²³ nup pisnep pikayey

kumningamb ak pen; ñin omiñal nokom mindiy, tip ak tikjakningamb angak.”

Kun angek, binuk gok nup simb ninjy, gos kunjay yimb ninjak.

Jiysis Gor Anjninjep Korip Ak Takes Pikak

²⁴ Pen kisen Jiysis binuk gok yip miñmon Kapaniyam ameyak, bi Gor anjninjep korip takes dep gok apiy, Piyta nup angyak, “Tiysa nimbik ak takes pikip sek?” ²⁵ Angeyak angak, “Yaw! Nuk takes pikip sek angak.” Piyta pen kun angyi korip mingan amek, Jiysis nup anjninjiy angak, “Gos nand yerip niñban? Gapman biyomb gok, takes maniy akay nimb dipay? Biynimb miñmon kiyk key gok nimb dipay akan, biynimb par okok nimb dipay angak?”

²⁶ Kun angek Piyta angak, “Biynimb par okok nimb dipay angak.” Angek Jiysis angak, “Bi kiyk key gok takes ma pikpay ak pen; ²⁷ chin ma pikoningambun; kuyip miluk yowningamb rek ayip. Nand wik ak dam ñiñg biyan yokiy piys nind diningamban ak, meñg minim ak tunglakiy niñningamban; maniy mangiy won bap mindeningamb. Diy dam takes chirminjay ak ñinimin angak.” Angek mey, am angak rek gak.

18

Biyomb Mindon Angiy Penpen Angyak (Mak 9:33-37; Luk 9:46-48)

¹ Jiysis binuk gok apiy nup angyak, “Biynimb Gor diy kond mindip gok, an yomb yimb rek mindip?” ² Angeyak Jiysis ñapan sikoy bap suk angek apek, di windin yirik ar kuyip siñak jakñek

mindakniņ angak, ³ “Nimbip niņind yimb aspiyn! Yimb yomb dun anġiy niņbim ak kirgiy ñapan sikoy siskoy diy mindpay rek mindem mey; Gor nimbip dinimuņ rek ayniņgamb. ⁴ Kun ak biynimb yimb yomb diniņg ñapan sikoy biy rek mindiy mey, biynimb nuk diy kond mindeniņgamb namb ak biynimb yomb rek mindeniņgambay. ⁵ Pen biynimb yip gosimb niņiy, ñapan sikoy biy rek direp giniņgambay gok; kuyip nep mer, yip sek direp giniņgambay.

Biynimb Nup Kisen Nep Gos Niņbay Gok Kuyip Tap Timey Gi Yombay
(Mak 9:42-48; Luk 17:1-2)

⁶ “Pen biynimb gunap biynimb yip gos kilis giy ma niņbay bap gey apyap pikniņgamb ak, timey yimb giniņgambay. Kuyip tiwniņg dam ñiņg yomb ak yokey ñiņg ñimbiy kumbiyap ak girep gipyap. Yenen: kim mindiy timey giniņgambay kun rek yiwur yomb yimb diniņgambay.

⁷ “Biynimb mankumb biy mindpay gok miker yimb giniņgamb. Miñ timey ar ak giy, biynimb gunap kuyip gos ñey, ar kun ak giy apyap pikpay ak, timey yimb gip. Miñ ar kun ak; nind giyiņgipay, miñiy gipay, kisen kunep giniņgambay. Pen biynimb miñ ar kun ak gi yombay gok yiwur yomb yimb diniņgambay.

⁸ “Ñin akaņ, tomb kind nimb bap tap siy tap timey gep rek ayonimuņ; kind kun ak timbrikyoknimimb. Kun giy mey, tap siy tap timey gep ar ak kirgiy, permindep ak diniņgambim. Pen mindrep ma giy, tap siy tap timey gep ar

ak gi dand amiy, mon per yin mindip ak amningambim.

⁹ “Pen windin ninjy tap siy tap timey gep rek ayonimun, windin piskind kun ak tungjiwyoknimimb. Kun giy perper mindenimimb rek ayningamb. Pen mer ak; tap siy tap timey gi mindiy miñmon Hel, mon key yinjap ak amningambim.

*Kanj Siyysiyp Kurgak Angiy Paydon Ay Angak
(Luk 15:3-7)*

¹⁰ “Ninrep ginimimb. ‘Ñapan sikoy gok tap yikop angiy gos ak ma ninnimimb. Gor kuyip ninmindiy, enjol kuyip gok angek, am windin yirik ar nup ak mindyng opay. ¹¹ [Bi bap Ñinuk lum biy wak ak biynimb Nop ker ma mindpay gok kuyip dinyng owak.]

¹² “Bi bap kanj siyysiyp nuk ñin jiwiy onep mamind ak rek mindeningamb. Pen nokom bap kurgeningamb nuk yerer giningamb? Gunap kuyip kirgek tap kaskas ñinyakniñ, nokom kurginingamb anup piyowek amningamb. ¹³ Nimbip ninind aspiyn. Am piyow girangrang diy, miñmiñ yimb giningamb. Kanj nuk ninjek tep gip rek ma giningamb; kanj nuk kurgak piyow ninningamb anup ninjek tep kun ak key yimb giningamb. ¹⁴ Kun ak rek, Bapiy chin semb biyon mindip ak, ñapan sikoy nuk bap ma kurginimun angiy ninimb.

Mam Ay Gok Kuyip Angrep Ginimimb Angak

¹⁵ “Biynimb Gor nup chingey mam ay angingambim gok, bap nimbip timey gonimun;

am nund yip key mindiy, tap ginimuj kun ak misenj angnimimb. Kun giy angem nindek mey, namam nanay nimbik yimb mindeningamb. ¹⁶ Pen ma nindek; am biynimb nokom akan ominal rek ponind amiy ninmindyakniñ, minim angnimiy. ¹⁷ Pen kun gem ma yimb ninndonimuj; biynimb lotiw opay rek mangiyseñ ninmindyakniñ angnimin. Pen ma ninndonimuj, biynimb tap siy tap timey gipay gok kuyip gipim rek ak ginimimb.

¹⁸ “Kun ak nimbip ninind aspiyn. Minim kun ak rek man ar biy tungasik ay, mer angeningambim, Gor nuk semb biyon mindiy, kunep mer angeningamb; pen yaw angeningambim, nuk kunep yaw angeningamb.

¹⁹ “Ninind yimb aspiyn. Biynimb ominal mankumb biy mindiy, minim anj ar nokom ay, Gor nup angnineningayr; Bapiy semb biyon mindip ak angningayr rek giningamb. ²⁰ Pen biynimb ominal akan, ominal nokom rek, gos yip ninij, ap nan-geningambay, yand namb kuyip okok wopsakiy mindeningayn angak.”

Bi Wonj Giñemb Tep Mer

²¹ Piyta Jiysis mindek man sijak apiy angak, “Biyomb! Mam gunap yip ñin yerip yerip rek timey gey kuyip ninij kirginim? Ñin onep ar ak rek akan?” ²² Angek Jiysis angak, “Yand nip, ñin onep ar rek ma angningayn; ñin jiwiy ñin jiwiy onep ar ak rek angningayn.” ²³ Mam gunap nimbip timey gey, ninij ma kirginingambim ak, minim mindeningamb. Pen Gor nuk giningamb ak; kesim angning gspiyn biy rek. ²⁴⁻²⁵ Biyomb ak, bi nup wonj giyak gok, tap day yip gok

pen ñim angek, bi tap day nuk maniy yir ñin jiwiy kuñay yimb nep mindek bap nup dand wiyak. Pen bi kun ak tap day yomb yimb mindek, pen ñinimuj rek ma ayak. Kun gek biyomb ak niñiy, binuk gunap kuyip angak, ‘Gip kun ak nup diy; biyn ñapan, tap nuk yerip yerip mindip gok mañgiysek diy, dam maker ayem taweniñgiy, maniy kun ak dap yip ñinimimb angak.’ ²⁶ Kun angek bi kun ak pen; kongim yimiy, jiy kuyangiy, biyomb anup angak, ‘Nand yip simb niñiy kond mindenimin; tap day nak kun ak mañgiysek day pañgniñgayn angak.’ ²⁷ Angek, biyomb ak nup simb niñiy, tap day nuk kun ak kirgak.

²⁸ “Kun giy kirgakniñ, nuk pen amiy niñak; binuk yip wong giyিংgiyir ak ap mindek. Niñiy nup kuñam chichiy diy angak, ‘Nip maniy yir nokom bap ñinik ak, yip pen ñan angak.’ ²⁹ Angek binuk yip wong giyিংgiyir kun ak kongim yimiy, jiy kuyangiy angak, ‘Yip simb niñiy kond mindenimin; tap day nak kun ak, mañgiysek day pañgniñgayn angak.’ ³⁰ Angek bi kun ak minim nup ak ma niñiy angak, ‘Nip dam kalambis ayeniñgayn, tap day kun ak day pañgiy nep mey, mis amniñgamban angiy,’ nup dam kalambis ayak. ³¹ Kun gek binuk yip wong giyিংgiyay gok kuyip simbwur timey gek, am biyomb kiyk anup minim kun ak anğñiyak. ³² Anğñeyak, biyomb ak, binuk kun anup suk angek apek angak, ‘Nand bi timey yimb. Yip siy anğamban, nip simb niñiy tap day yand nip mindip ak kirpiyn. ³³ Pen yenen, bi yip wong giyir anup simb niñiy, ma kirpan? ³⁴ Nup pen yenen dam kalambis ay, bi kalambis

kond mindip anup apan, “Nup kalambis ayey, yiwur gaksiñ mindiy, tap day yip ak day pañgiy nep mis amningamb apan” aᅅgak.’

“Bi kun ak, binuk yip wong giyিংgiyir anup, simb ma niᅅak ak mey; biyomb ak, bi kun anup dam kalambis ayak. ³⁵ Nimb mam gunap kuyip kunep geniᅅgambim, Bapiy semb biyoᅅ mindip ak, nimbip pen kunep giniᅅgamb. Kun ak kuyip simb yimb niᅅiy, nimbip timey gipay ak niᅅiy kirginimimb aᅅgak.”

19

Biyn Diniᅅ Pisnep Diniᅅiy (Mak 10:1-12; Luk 16:18)

¹ Jiysis minim kun ak aᅅgiwiyy, miᅅmon Galiyliy kirgiy; miᅅmon Jiwdiya Joden ᅅiᅅ kind akdon ken amnak. ² Amek biynimb kuᅅay yimb nep nup kisen geyak, biynimb tap gak gok kuyip gek suᅅ ayak.

³ Pen bi Peresiy gok, nup aᅅgniᅅon yerip rek aᅅgnimuᅅ aᅅgiy, apiy aᅅgyak, “Low chin ak, biyn ak tap sikoy bap girep ma gek, nup aᅅgyokniᅅ aᅅgyokniᅅgambun akan; nand yerip gos niᅅban?”

⁴ Aᅅgey Jiysis aᅅgak, “Baybol buk tikiyak ak nimb ma niᅅbim? Miᅅmon alwol gayak ᅅin ak, bi bap biyn bap gayak. ⁵ Gor aᅅgak ‘Ar kun ak mey bi gok, nop nonim yip mindiy, biyn diyiᅅ kuyip kirgiy kiykber jimᅅiy kiner mumbwak nokom yimb ayip aᅅgak.’ ⁶ Kun ak Gor aᅅgek mumbwak kiyk nokom aᅅniᅅgamb kun ak, bi gunap tikjakiy kuyip aᅅ tuᅅgasik keykey ma aᅅniᅅgiy aᅅgak.”

⁷ Jiysis kun angek, bi Peresiy gok nup angyak, “Pen yenen Mosis minim bap tikiy angak, ‘Biyn angyokning; biyn biy pisnep kirsipiyn angyi, minj band bap tikñiy angyoknimimb angak?’ ”

⁸ Angeyak Jiysis angak, “Nimb biynimb mangyisek, minim kun ak ma niñdiyngipim ak mey, Mosis kun angak. Pen Gor biynimb gayak ñin ak kun ma giyngipay. ⁹ Nimbip aspiyn; bi an biynuk bi bap yip di ger mer; yikop nep angyokiy, biyn kisen diniñgamb ak; Gor niñek timey yimb giniñgamb angak.”

¹⁰ Angek binuk gok angyak, “Bi gok biyn diy yikop kirginiñgiy rek ma ayip ak, biyn ma diniñgiy ak tep rek ayip angyak.”

¹¹ Angeyak Jiysis angak, “Bi mangyisek yikop mindeniñgiy rek ma ayip. Gor biynimb yikop mindeniñgiy angyi angyak gok nep, yikop mindeniñgiy rek ayip. ¹² Bi gunap walak dey mey, biyn ma dipay. Gunap ma ayek mey ma dipay. Gunap Gor biynimb diy kond mindeniñgamb wonj ak gun angyi, ma dipay. Pen minim apim kun ak, biynimb diniñg giniñgiy gok, diniñgiy angak.”

*Jiysis Ñapan Ñañ Gok Kuyip Jun Diniñak
(Mak 10:13-16; Luk 18:15-17)*

¹³ Biynimb gok Jiysis ñapan chinup gok ñin jun ar biyon diniñan angyi, dand apeyak, binuk gok kuyip niñchikiy angyak. ¹⁴ Kun angeyak Jiysis pen ñapan kun gok suk angek wiyakniñ, binuk gok kuyip angak, “Kuyip yenen anj gipim! Ñapan sikoy gok kirgem yip ker wiyan. Gor biynimb diy kond mindeniñgamb gok mey, ñapan sikoy kun

gok rek angak.” ¹⁵ Kun angyiy, ñin nuk ak ñapan sikoy kun gok jun ar ak ay, kuyip bilesiym giy, miñmon wikan bap amnak.

*Bi Tap Kunaynep Mindek Bap
(Mak 10:17-31; Luk 18:18-20)*

¹⁶ Bi bap Jiysis mindek ak apiy angak, “Tiysa. Yand tap yerip tep ak giy, Gor yip dek perper mindeningayn?”

¹⁷ Angek Jiysis angak, “Yenen yip tap yerip tep, tap yerip timey angyiy angninban? Gor nokom mey bi tep. Pen perper mindenim angyiy, low minim angyiy tikyak gok ma timbriknimin angak.”

¹⁸ Angek angak, “Low ar akay rek aspan?” Angek Jiysis angak, “Chip ma ñanngnimimb. Biyn siy bi siy ma ginimimb. Tap siy ma dinimimb. Yesek ma angnimimb. ¹⁹ Nap nanim minim angningiy rek ninjiy kindik ginimimb. Biynimb gunap kuyip, nimb key wasemb aypim rek ginimimb angak.”

²⁰ Kun angek, bi paranj kun ak angak, “Low minim gok mangyisek ninjipiyn. Pen tap yerip ak giy, Gor yip dek perper mindeningayn angak.”

²¹ Angek Jiysis angak, “Mindrep yimb giyn angyiy, tap nak gok mangyisek yokiy maniy diy, biynimb yimgeprek gok kuyip ñiy mey, mind tep gep nand ak mindeningamb Gor miñmon biyon. Pen apiyn rek giy apiy, yand yip tanjonjur angak.”

²² Angek, tap nuk kunay mindek rek, minim kun ak ninjiy, gos kunay ninjiyng amnak.

²³ Pen nuk kun giy amnakniñ, Jiysis binuk gok kuyip angak, “Yand nimbip ninjind yimb aspiyn.

Biynimb maniy tap kiyk kuḡay mindeningamb gok, Gor nup kosyam gosimb niḡey, kuyip diy kond mindeningamb. ²⁴ Kanj kamel gok, ñiw lekpay miḡan ak amning amningambay; pen biynimb tap kuḡay mindip gok, Gor nup kosyam gos niḡey, kuyip diy kond mindeningamb angak.”

²⁵ Jiysis binuk gok minim kun ak niḡiy, gos yomb niḡiy angyak, “Aspan kun ak, biynimb yerip rek gok Gor diy kond mindeningamb?”

²⁶ Anḡeyak Jiysis kuyip niḡying angak, “Biynimb gok key giḡiḡiy rek ma ayniḡamb; Gor nep mey yerer giḡiḡiy giḡiḡamb angak.”

²⁷ Jiysis kun anḡek, Piyta angak, “Niḡan! Tap chin gok maḡiysek kirḡiy, nand yip nep chinḡiy tapun ak; chin pen tap yerip diniḡambun?”

²⁸ Anḡek Jiysis angak, “Yand nimbip aspiyn; Bi bap Ñinuk ñin kisen ak mokyan ñiluk giy apiy, biynimb maḡiysek kond mindeningamb. Ñin kun ak mey, nimb bi yip kisen giḡiḡambim gok kunep anḡen Yisrel biynimb kiḡiḡ onep wimiḡan ak kuyip kond mindeningambim.

²⁹ Biynimb yip gosimb niḡiy; numam nunay, nop nonim, korip wongday, tap yerip yerip okok kirḡiḡambay gok, Bapiy kuyip sakiy ma giḡiḡamb. Tap kun gok rek kuyip pen kuḡay yimb ñiy, gek perper mindeningambay.

³⁰ Biynimb kuḡaynep miḡiy yomb mindpay gok, sikoy tam okok mindeningambay; biynimb sikoy tam okok mindpay gok, biynimb yomb mindeningambay angak.”

20

Biynimb Miñ Wayn Woŋg Gipay Anġiy Paydon Ay Anġak

¹ Jiysis kun anġiy anġak, “Gor biynimb diy kond mindeniġamb ak, kesim ar biy rek mindip. Bi wayn woŋg nop bap, bi gunap am dand apen woŋg yip ak giyaŋ anġiy, kisyim tikjakiy, ² am bi gunap piyow niŋiy, nimbip maniy kun kun giy tawniġgayn anġiy, kiy yip minim anġ ar nokom ay, anġyokek am wayn woŋg nup ak gi mindeniġambay. ³ Pen pumb ak yep namb siġak araniġamb won ak, maker namb ak amiy niŋniġamb; bi gunap yikop mindeniġambay. ⁴ Kuyip niŋiy anġniġamb, ‘Nimb kunep am woŋg yip ak geniġambim; nimbip maniy ñimbay rek namb ak ñiniġgayn anġniġamb.’ ⁵ Anġek, am woŋg nup ak geniġambay. Pen pumb-namb yomb biyoŋ won ak sek, pumb kuyim giniġamb won ak sek minim kun ak nep anġiy, bi gunap sek dek, woŋg nup ak geniġambay. ⁶ Pumb saŋind amniġg giniġamb won ak, tip ak maker namb amiy niŋniġamb: bi gunap sek ap mindeniġambay mey; kuyip anġniġamb, ‘Nimb yenen ñin biy woŋg ma giy, yikop yimb mindpim?’ ⁷ Anġek, nup anġniġambay, ‘Bi bap chinup woŋg bap ma ñimb anġniġambay.’ Anġeniġambay anġniġamb, ‘Nimb kunep am wayn woŋg yip ak gem anġek;’ ⁸ am woŋg geniġambay. Duŋgep won ak, biyomb kuskus nuk anup anġniġamb, ‘Am bi woŋg yip gispay gok kuyip anġey apey; bi kisen opay gok maniy

kuyip ak nind ñiy, bi nind opay gok kuyip, kisen ñinimin angningamb.’

⁹ “Angek bi kuskus ak, bi kun gok kuyip suk angek apey, bi pumb pañind amnakniñ ap wong geningambay gok, ap maniy kiyk ak nind diniñgambay. ¹⁰ Pen kiyk kun giy diyakniñ, bi nind angek ap wong geningambay gok maniy yomb ak diniñgambun angningambay ak pen, kisen diying niñningambay maniy namb kun anep diniñgambay. ¹¹ Diy, day bi wayn wong nop nimb ak yip penpen angyi angningambay, ¹² ‘Chin yenen bi kisen opay gok maniy dipay rek nep dipun? Kisyim tikjakiy pumb sinjrimey niñakniñ, wong gon gon yiruk gip ak pen; bi ap sikoy won bap gambay gok, kuyip maniy ñimban rek nep chinup ñimban angningambay.’ ¹³ Angeningambay bi wongday nop nimb ak niñiy, bi kiyk bap nup angningamb, ‘Mam niñan! Nim-bip timey ma gipiyn; maniy ñiningayn apiyn rek ñimbiyn. ¹⁴⁻¹⁵ Bi kisen opay gok, bi nind opay gok yip andip andip ñining ñiningayn; ak tap yand. Kun ak bi gunap yergiy mer angningambay. Kuyip monmon ñimbiyn ak nimbip yenen miluk yowip. Maniy ñimbiyn ak dand korip nimbik amnim angningamb!’

¹⁶ Jiysis kesim kun ak anğ day jiwiy anğak, “Biynimb nind mindpay gok, kisen mindeningambay; biynimb kisen mindpay gok, nind mindeningambay anğak.”

*Jiysis Kumiy Tikjakningayn Angyi Tip Anğak
(Mak 10:32-34; Luk 18:31-34)*

17 Jiysis Jerusalem amyıng, kinjenamb okok binuk onep wımıngan ak kuyip dand gol okok amiy key mindyakniı angak, 18 “Niıjim! Chin Jerusalem amon, Bi bap Niınuk nup mimuıng giy, di biyomb Gor nup simbonıep gok sek, bi low tiysa gok sek niın ar kuyip ak ayeniıngambay, kiyk minim aıngiy aıngniıngambay ‘Bi biy nup pikayep aıngniıngambay.’ 19 Kun aıngiy, Jiwda kay kuyip niıeniıngambay, nup aıngjiwiı, tapin pikiy, dam mon kiros bak biyoı niıaıgbirikayey kumniıngamb ak pen; niın omiıal nokom mindiy, tip ak tik-jakniıngamb angak.”

*Jemis Yip Jon Yip Biyomb Mindniıng Gos Niırik
(Mak 10:35-45)*

20 Sebediy niınuk omiıal ak kuyip, nonim poıınd Jiysis mindek ak apiy, jun paıngiy angak, “Yand minim bap mindamb aswiın angak.”

Anıek Jiysis angak, “Minim kun ak yerip?”

21 Anıek angak, “Yip tep giniıngamb ak; kisen nand kiıyı yomb mindiy, biynimb kond min-denııngamban niın ak, niı yand omiıal ak bak nip siıak pis pis bisginiıngayr angak.”

22 Kun anıek Jiysis pen, yiwur diniıngamb rek paydoı ay angak, “Minim yip aıngniınbim ak, niıırep ma gipim. Nirmiııay niııng silik yand niııniıng gispiın ak kunep niııniıngayr?” Anıek, “Yaw! Niııniıngambur aıngrik.”

23 Anıerik angak, “Niııınd apiyr. Niııng silik niııniıng gispiın ak niııniıngayr ak pen, an aııınd pis, an yipund pis mindeniıngayr ak ma aııgayniıngayn; minim kun ak Bapiy minim nuk.

Binuk anğayip gok biyomb kun ak rek mindeniğambay anğak.”

²⁴ Binuk omiñal minim kun ak anğerik, binuk onep wanjrem ak niñiy, kuyip mamiymiñay minim yomb anğyak. ²⁵ Jiysis pen kuyip mañgiysek anğek apey anğak, “Biyomb miñmon okok, biynimb gok kuyip kond mindiy minim kilis giy anğey ñawil dipay ak niñbim. ²⁶ Pen kiyk gipay rek ma ginimimb. Bi nimb bap biyomb mindniğ ginimuñ ak, bi tam okok rek mindiy, nimbip gunap woñg giñinimuñ. ²⁷ Pen bi nimb bap, biyomb yimb mindniğ ginimuñ ak, bi sikoy tam okok rek mindiy, biynimb gok woñg giñinimuñ. ²⁸ Bi bap Ñinuk ak, woñg yip giyañ anğiy ma wak; biynimb gunap kuyip woñg giñi dand amiy, kisen tap siy tap timey gipay rek tip kuyip ak diy kumen kiyk kim amniñgiy anğiy awak anğak.”

Jiysis Gek Bi Windin Koy Gak Omiñal Ak Tip Niñrik

(Mak 10:46-52; Luk 18:35-43)

²⁹ Pen Jiysis dawin yomb Jeriykow kiring amnakniñ, biynimb kuñaynep kisen giyak. ³⁰ Bi windin koy omiñal ak lor gol siñak bisiñg mindrikniñ, Jiysis asaw anğey niñiy, meñg miñgan dand araniy anğrik, “Depiyt Ñinuk. Chirup simb niñnimin anğrik.”

³¹ Anğerik biynimb gok, kuyipmiñay niñchikiy anğiy, “Kilpul ma anğiy anğyak.” Kun anğeyak, minim kuyip ak ma diy, meñg miñgan dand araniy anğrik, “Depiyt Ñinuk! Chirup simb niñnimin anğrik.” ³² Kun anğer Jiysis ap minderik

siŋak aland giy, kuyipmiŋay aŋgak, “Chirup yer-
gaŋ aŋgiy, suk aspiyr?” ³³ Aŋgek aŋgrik, “Biyomb!
Chirup windin koy gip ak, gey niŋur aŋgrik.”
³⁴ Aŋgerik Jiysis kuyipmiŋay simb niŋiy, windin
kuyip ak dinieŋek, won kun anep suŋ ayek, nuk
amnakniŋ, kisen girik.

21

*Jiysis Nup Kiyŋ Chin Aŋgiy Dand Jerusalem
Amniyak*

(Mak 11:1-11; Luk 19:28-40; Jon 12:12-19)

¹ Jiysis binuk gok yip Jerusalem maŋ maŋ giy,
miŋmon sikoy Betpasiy, Oliyp dum maŋ siŋak am-
jakiy, binuk omiŋal aŋgyokiy aŋgak, ² “Nirmiŋay
miŋmon wikan bindoŋ amiy niŋningayr: doŋgiy
marip biynimb ma dand tapay bap nonim yip
tiwning ayey mindeningamb. Miŋ ak wisikiy
poŋind winimiyr. ³ Pen biynimb gunap apiy
yenen kanj doŋgiy chinup ak wisik dand amji-
piyr aŋgeningiy aŋgnimiyr, ‘Biyomb ak wonŋ min-
dek aŋgamb dining opur aŋger, yaw aŋgey
dand winingayr aŋgak.’” ⁴ Pen kuyipmiŋay yokek
dining amnirik kun ak, bi Gor minim aŋgep bap
giningamb aŋgiy tikak rek nep gak. Nuk aŋgak:

⁵ “Jerusalem biynimb kuyip aŋgnimimb, ‘Biyomb
nimb ak doŋgiy ar bisgiy nimbip ker asaw.
Nuk bi yikop rek bap doŋgiy ñiluk ar ak
bisgiy asaw aŋgnimimb’ aŋgak.”

⁶ Pen Jiysis binuk aŋgyokek amnirik omiŋal kun
ak, aŋgak aŋgak rek, ⁷ doŋgiy marip ak sek poŋind
aperik, binuk gok chech tuŋgasikiy, doŋgiy marip
ar ak ayeyak, ar kun ak bisgak. ⁸ Biynimb

kunaynep Biyomb asaw angyiy, chech paryomb kiyk aryon ay mindeyak gok tungasik kinjenram ak ayak. Gunap am minj kas mon kas okok timbrik dapiy ayak. ⁹ Pen nup pinjy kus kus giy amying angyak:

“Depiyt tikek, tik dand amiy tikip ak owip biy. Ninim! Gor nup yokek owip. Gor nup tep aspun angyak!”

¹⁰ Jiysis Jerusalem amjakakniņ, biynimb gok anğ amiy apiy giy angyak, “Bi kun ak an angyak.”

¹¹ Anğeyak, biynimb Jiysis yip wiyak gok angyak, “Bi biy mey Jiysis; bi Gor minim anğep Nasaret Galiyliy propens nimb ak angyak.”

Jiysis Biynimb Gor Anğniņep Korip Biysniys Geyak Gok, Yuk Mis Yokak

(Mak 11:15-19; Luk 19:45-48; Jon 2:13-22)

¹² Jiysis Gor anğniņep korip miņgan biyan amiy: biynimb tap maker ay geyak gok, kuyip maņgiysek yukyokiy, bonğ band maniy ay yimjik geyak gok tungandikiy, bi yakir yokying cheya bising mindeyak gok tungandikiy gak. ¹³ Kun giying, kuyip anğ giy anğak, “Baybol buk tikyak ak, Gor anğak, ‘Korip yand ak yip anğniņep.’ Pen nimb gispim ak, bi tap siydep kapkap weying mindpay korip bap rek ayip anğak.”

¹⁴ Pen Jiysis Gor anğniņep korip miņgan kun ak mindakniņ, biynimb windin koy giy, tomb timey giy gak gunap apeyak, kuyip gek suņ ayak.

¹⁵ Nuk tap mageprek gek, ñapan sikoy gok suk angying angyak, “Depiyt Ninuk. Tap mageprek gipan! Wis-ey! angyak.” Pen kiyk kun anğeyak, bi Gor nup tap simbonğep yomb gok sek, bi low tiysa

gok sek, kuyip miluk yimb yapek angyak, ¹⁶ “Nip aspay ak niņsipan? Angey kirgiyan angyak.” Angeyak Jiysis angak, “Aspay ak niņsipiyn ak pen; ñapan ñaņ gok kuyip gos tep ñen, yimb yip dand araniņgambay angyi tikyak ak ma niņbim?”

¹⁷ Kun angyi, kuyip kirgiy, am miñmon sikoy Beteniy kinak.

*Jiysis Mon Kiyaw Bind Ak Angek Milip Gak
(Mak 11:12-14, 20-24)*

¹⁸ Minek Jiysis andkind Jerusalem winiņg, kin-jeņnamb okok apek yiwan gek, ¹⁹ kinjeņram gol siņak mon kiyaw bind bap niņiy kiñiņ siņak amiy niņak: maņgiy ma piyak; kas gok nep mindek. Kun gek angak, “Mon bind biy kisen maņgiy ma yimb piyningamb angak.” Kun angakniņ, day kiyaw bind kun ak milip gak. ²⁰ Binuk gok niņiy, wal angyi angyak, “Yergiy mon kun biy kasek milip gisap?” ²¹ Angeyak Jiysis kuyip angak, “Pen niņim! Chin angon kunep ginimuņ angyi, gos okok ma niņnimimb; Bapiy yomb nuk giniņgamb angyi, gos nokom niņem, giniņgamb. Pen kun anep mer; miñmon dum biy liņg ñiņg yomb namb siņak amnaņ angem, gek amniņgamb. ²² Gor chinup direp giniņgamb angyi angnieņem, angnieņgambim rek giniņgamb angak.”

*Nip An Angek Kun Girapan
(Mak 11:27-33; Luk 20:1-8)*

²³ Jiysis Gor angnieņep korip ak amiy, biynimb gok kuyip minim angnakniņ, bi Gor nup sim-bonņep yomb gok sek, bi minim tunğasikep gok

sek apiy, nup angyak, “Nip an kun ginimin, kun ginimin angek, girapan?”

²⁴ Angeyak Jiysis pen angak, “Nimbip minim bap angnjen, yip angñem, pen an angek girapiyn ak, nimbip angñiningayn. ²⁵ Jon biynimb gok kuyip ap ñing pikñak ak, gos nuk key niñiy gak akan, Gor angek ap kun gak?” Jiysis kun angek, kiyk key angnij angnij giy angyak, “Chin Gor yokek ap gak angoningambun; chinup angningamb, ‘Kun ak Jon anjip ak yenen ma niñdipim angningamb.’ ²⁶ Pen Jon gos nuk key niñiy ap gak angoningambun; biynimb gok Jon bi Gor minim angñemb apay rek chinup kuñay angningambay angyak.” ²⁷ Kun angyi Jiysis nup angyak, “Chin ma yimb niñbun angyak.” Angeyak kuyip angak, “Yip ma angñimbim rek yand pen, an angek ap gispiyn ak nimbip ma angñiningayn angak.”

Bi Mamiyminay Angiy Paydon Ay Angak.

²⁸ “Pen nimb yerip gos niñbim? Bi bap ñinuk omiñal mindeningamb. Ñinuk nind ak nup miñiy wayn wonj ak am gey angek, ²⁹ ma am giningayn angyi, kisen pen gos andikiy niñiy, am wayn wonj ak geningamb. ³⁰ Nop pen am ñi kisen anup kunep angek, yaw giningayn angningamb ak pen, ma am giningamb. ³¹ Pen ñi omiñal kun ak, an nop angningamb rek niñdiningamb?” Angek Ji-wda biyomb kun gok angyak, “Ñinuk nind ak nop angningamb rek giningamb angyak.” Angeyak Jiysis angak,” Nimbip niñind aspiyn: nimb yikop mindpikniñ bi takes diy maniy yesek gunap dipay

gok sek, kinjenram biyn gok sek Gor biynimb diy kond mindeningamb kiñiñ ak mindonjun angyi, nimbip tawsak aysipay. ³² Jon bi ñiñg pikñiemb ak apiy nimbip, suñ mindeningambim minim ar ak angyiñyngip ak pen; kindik ma gipik. Bi takes diy maniy yesek gunap dipay gok sek, biyn way siy dipay gok sek minim kun ak niñiy kindik giyak. Kiyk giyak kun ak niñiy, nimb yenen gos kisenimb bap niñiy, Jon nup minim ak ma dipik.

Jiwda Biynimb Sisker Giyak Ar Ak Paydon Ay Angak

(Mak 12:1-12; Luk 20:9-19)

³³ Jiysis angak “Miñiy minim paydon ay bap sek angyning gispiyn. Bi mankumb nop nimb bap miñ wayn wonğ ak gi yimiy wariy giy, miñ mangyi piksimbjakep kiwok bap gayningamb. Gay, miñ mangyi ak ap siy ñiñningiy rek ayip ak niñmindenjun angyi, korip paryomb yiy akyon bap giy; bi gunap kuyip miñ wonğ yip ak kond mindenimimb; kisen piy pik gek, yip gunap nimb gunap dinimimb angyi, miñmon paryomb okok amningamb. ³⁴ Miñ mangyi ak pik gakniñ, binuk gok kuyip, yip gunap am dand wim angek, ³⁵ kiyk amjakey, bi wayn wonğ gi mindeningambay gok tikjakiy, bi bap nup gamb pikningambay; bap nup kamb jiw pikningambay, bap nup pisnep pikayey kumningamb. ³⁶ Kun gey bi miñ wayn wonğ nop nimb kun ak, bi tapin kaw bap pen angyokningamb. Angyokek ameningambay, bi miñ wayn wonğ geningambay gok, kuyip kunep giningambay. ³⁷ Kun gey, bi wayn wonğ nop nimb ak, Niyand ak yoken mey, minim nup

ak niñningambay angyiy, angyokek amningamb.
³⁸ Amjakek, bi wayn wong gi mindeningambay gok nup niñiy, kiyk key angingambay, ‘Bi wong nop nimb ñinuk ak asaw biy. Nop tip ak dingingisap rek nup pikayon kumek, kisen tap wong guniy mangyisek dingingambun angingambay.’
³⁹ Kun angyiy, nup dand wongday gol okok amiy, pisnep pikayningambay.

⁴⁰ “Kun geningambay, kisen bi wongday nop nimb ak apiy, kuyip yerer giningamb angak.”

⁴¹ Angek Jiwda kay angyak, “Bi timey giningambay kun gok kuyip geningamb, yiwur yomb yimb diy kumingambay. Kisen pen biynimb tep gunap diy, kuyip miñ wayn wong nup dayeningamb, wong kun ak giningambay. Miñ mangyiy pik giningamb ñin ak, nup rek ak jiw dam ñiningambay angyak.”

⁴² Angeyak Jiysis angak “Ak niñind apim. Baybol buk minim tikyak ak niñbim rek ayip. Tikiy angyak;

‘Bi korip gep gok kamb ma dinjun angyiy kirgiyak ak; miñiy korip sap namb biyan rek ak mindip. Gor kun gek niñon, tep yimb gip angyak.’

⁴³ “Korip sap namb biyan nup ma dipim kun ak, Gor nimbip Jiwda kirgiy, biynimb key okok nimb tap nup ñemb rek mindeningambay gok kuyip diy kond mindeningamb. ⁴⁴ Biynimb kamb ar kun ak apyap pikningambay gok kuyip tapin nep pikningamb; biynimb kamb kun ak punjiw apyapiy aybirikningamb gok, pisnep piksimb-jakningamb angak.”

⁴⁵ Bi Gor nup simbongep yomb gok sek bi Peresiy gok sek, Jiysis minim paydon ayak kun ak kuyip nep angek, ⁴⁶ nup miñ ayun angyi gos niñyak ak pen; biynimb gok Jiysis nup bi Gor minim angep angyak ak niñiy, chinup kunay angningambay angyi, nup tap bap ma giyak.

22

Gor Biynimb Diy Kond Mindeningamb Ak, Kesim Ar Biy Rek Mindip

¹ Jiysis tip ak paydon ay angak, ² “Gor biynimb diy kond mindeningamb minim ak aspiyn biy rek:

“Bi kiñ bap ñinuk ak biyn dining gek, tap yomb ñiñning, keñmangyi dap nan-giy, ³ binuk gunap angyokiy, biynimb angaynik gok am angem apey, tap yomb ak ñiñun. Angek am biynimb kun gok kuyip angningambay ak pen; kiyk kirginingambay. ⁴ Kun gey binuk gunap pen tip ak angyokiy angningamb, ‘Nimb am biynimb kun gok kuyip angnimimb, “Biyomb ak, makaw yomb gunap, marip gunap pikay, tap okok mangyisek moka giy, winingiy angyip angnimimb!” ’ ⁵ Kun angek kiyk am angeningambay, minim kuyip ak diyokningambay. Gunap tap wonng kiyk okok amningambay. Gunap maniy wonng kiyk ak geningambay. ⁶ Pen gunap, kiñ bi nup gok gi timey giy, pikayey kumningambay.

⁷ “Kun gey, kiñ niñek simbwur nup ak timey gek, amiybi nuk gok angyokek, am biynimb timey giningambay kun gok kuyip pikaydiy, korip kuyip gok dangyijiw pikey amningamb. ⁸ Pen bi nup wonng giñemb gok kuyip angningamb,

‘Keñmanǵiy tap gok daǵiy nan-gipun ak pen; biynimb nind suk aǵnik gok ma opay. ⁹ Kun ak nimb am kinjeŋ tam okok mindiy, biynimb niŋnimimb okok kuyip monmon poŋind apem tap yomb ñinjun aǵniŋgamb.’ ¹⁰ Kun aŋgek binuk gok am kinjeŋ tam okok mindiy, biynimb timey giniŋgambay gok, biynimb tep giniŋgambay gok monmon poŋind apey; biyn diy tap yomb ñiŋniŋgambay korip miŋgan kun ak timbik giy yimb aǵiy mindeniŋgamb.

¹¹ “Bi kiyŋ ak pen; biynimb opay kun gok niŋiyn aǵiy, korip miŋgan biyaŋ amiy niŋniŋgamb: bi bap chech ay korip miŋgan kun biyaŋ owep ak ay ma mindeniŋgamb. ¹² Kun gek nup aǵniŋgamb ‘Buŋgiy! Yenen, biyn diy tap ñiŋniŋgamb chech aypay ak ay mer; yikop nep ap mindpan?’ Aŋgek bi kun ak pen minim bap ma aŋgeniŋgamb, ¹³ bi kiyŋ ak binuk gok kuyip aǵniŋgamb, ‘Bi biy ñin tomb nup gok tiwniŋgrimbikiy, dam kisyim owip namb akyaŋ diyokem, biynimb mindpay kun gok yip meŋg kamb siwbirikiy, siy aŋg mindeniŋgiy aǵniŋgamb.’”

¹⁴ Jiysis paydoŋ ayak minim kun ak aŋgdiy, kuyip aŋgak, “Gor biynimb kuŋaynep suk aŋgip ak pen; maŋgiysek ma diniŋgamb. Biynimb gunap nep diniŋgamb aŋgak.”

Gapman Biyomb Siysa Nup Takes Ñemb Akan Aŋgak

(Mak 12:13-17; Luk 20:20-26)

¹⁵ Pen bi Peresiy gok, Jiysis nup minim yerip ak aŋgon, pen aŋgek niŋiy, nup dam miñ ayjun aŋgiy, minim aŋgniŋ aŋgniŋ giy, ¹⁶ bi kiyk key

gunap, Herot binuk gunap yokey, Jiysis mindek ak amiy angyak, “Nand bi minim niñind yimb nep apan. Bi gunap niñiy ma pirikpan, Gor angyip rek nep niñiy biynimb angnimban. ¹⁷ Kun ak nand gos yerip niñban? Chin Yisrel biynimb gok, Siysa biyomb miñmon Rom nimb anup takes pikep akan ma pikep?” ¹⁸ Angeyak Jiysis minim yesek angyak kun ak niñiy angak, “Yip yenen nembnemb giying ap kun giy angninbim? ¹⁹ Takes pikpay maniy bap ñem niñiyn angak.” Angek nup maniy won bap dap ñeyak niñiy, ²⁰ kuyip angak, “Maniy won kun biy an kawnan ak sek, yimb ak sek mindip?” ²¹ Angek angyak, “Ak biyomb Siysa mindip angyak.” Angeyak Jiysis kuyip angak, “Kun ak Siysa yip ginimimb angyip gok, nup ginimimb; Gor yip ginimimb angyiy niñimb gok, nup ginimimb angak.” ²² Kun angek kiyk gos kunay niñiy, nup kirgiy amniyak.

Kumiy Tip Tikjakpay Akan Angyiy, Jiysis Nup Angninyak

(Mak 12:18-27; Luk 20:27-40)

²³ Ñin kun anep, Sanjiwsiy bi gunap Jiysis mindek ak wiyak. Sanjiwsiy biynimb gok biynimb kumiy tip ma tikjakpay apay ak mey, ²⁴ Jiysis mindek ak apiy angyak, “Tiysa. Mosis angak, ‘Bi bap biyn diy, ñapan tikiy mer, yikop kumeningamb, numam bap biyn kun ak diy, ñapan nup gok angyiy tikningamb angak.’ ²⁵⁻²⁸ Kun ak, bi kiñiñ sek onep ar ak mindeningambay. Numam nind ak biyn diy, ñapan tikiy mer yikop kumningamb. Kun gek, numam namb ak pen, biyn kun anep diy, ñapan tikiy mer, yikop kumningamb. Kun

anep gi dam dam, numam onep ar ak, mangiysek ñapan tikiy mer; yikop nep kumningambay. Pen biyn ak kunep kumningamb. Kun ak biynimb kumbay gok tikjakningambay ñin ak, biyn kun ak an diningamb?”

²⁹ Angeyak Jiysis kuyip pen angak, “Nimb Baybol buk minim ak ma niñiy, Gor gip rek ma niñiy gipim ak mey, yesek angyi apim, ‘Biynimb gok kumiy ma tikjakningambay apim.’ ³⁰ Pen tikjakningambay ñin ak, biyn gok bi ma diningambay bi gok biyn ma diningambay; enjol semb biyon gok mindpay rek ak yikop mindeningambay.

³¹ “Nimb biynimb kumiy ma tikjakpay apim ak, Baybol buk minim tikyak gunap ma niñbim rek ayip. ³² Gor angak, ‘Yand Gor yikop bap mer: Ebrahim, Aysek, Jekop Gor kiyk mey, yand mindpiyn angak.’ Biynimb pisnep kumbiyap ak, Gor yergiy bi nind kumyak kun gok bi yand apkop. Bi kumey komyak kun gok, kim mindpay ak mey; kuyip angak, ‘Gor kiyk yand mindpiyn angak.’”

³³ Jiysis minim kun ak angek, biynimb mindeyak gok niñey kuyip tep yimb gak.

Low Yomb Yimb Ak
(*Mak 12:28-31; Luk 10:25-28*)

³⁴ Jiysis minim kun ak angrep gek, Sanjiwsiy bi gok minim bap pen angningiy rek ma ayak. Pen bi Peresiy gunap, Jiysis angak minim kun ak niñiy, mindek ak wiyak. ³⁵ Bi kiyk low niñrep gak bap Jiysis yerip rek angnimun angyi angak, ³⁶ “Tiysa. Gor low ayak minim ak, minim ar akay nup, minim yomb yimb mindip?”

³⁷ Angek Jiysis angak, “‘Gos timund nand ak mangiysek Gor ker amek, nup wasemb yimb aynimin.’ ³⁸ Minim yomb yimb mey kun ak. ³⁹ Minim yomb bap mey; ‘Nand key wasemb ayan rek biynimb gunap kuyip, wasemb aynimin.’ ⁴⁰ Gor low minim Mosis tikak gok sek, bi minim nup angep gunap tikyak gok sek mangiysek, minim junj yomb yimb mey ominal kun ak nep angak.”

Jiysis Angak Bi Kiyη Yomb Key Yimb Apim Ak An Angak

(Mak 12:35-37; Luk 20:41-44)

⁴¹ Peresiy kay ap nan-giy mindyakniη, Jiysis kuyip minim bap angninij angak, ⁴² “Nimb Kiyη yomb key yimb ak nup yerip gos niηbim? Nup an ñinuk angiy niηbim?”

Angek, “Depiyt ñinuk angyak.”

⁴³ Angey Jiysis angak, “Niηind apim ak pen, Gor Kawnan ak Depiyt nup gos ñakniη, nuk Kiyη yomb chin anup ‘Biyomb yand’ angak. Minim angak kun ak, Baybol buk tikiy angyak ak niηbim. Depiyt angak:

⁴⁴ ‘Gor Biyomb yip anup minim angay anqip, “Nand kund bak yip ak mindiy mey; yand gen biynimb nip alemb alemb ñimbay gok kuyip, tomb beη okok tawbirikniηgamban anqip” angak.’

⁴⁵ Depiyt angak kun ak nimb yenen apim, ‘Depiyt tikek, tik dand amiy, bi kiyη yomb key yimb ak nup tikpay apim.’ Pen Depiyt Biyomb yimb nuk ak mey, kiyη yomb key yimb apkip ak tep angak.”

⁴⁶ Jiysis minim nuk ak angrep gek, kiyk nup pen

aņgņiņgiy rek ma ayek mey, kisen nup minim kun gok rek gunap sek ma aņgņiņyak.

23

*Bi Peresiy Gok Sek, Bi Low Tiysa Gok Sek
(Mak 12:38-39; Luk 11:43, 46; Luk 20:45-46)*

¹ Kisen ñin bap, Jiysis binuk gok sek, biynimb yikop gunap sek kuyip minim aņgiy aņgak, ²⁻³ “Bi low tiysa gok sek, bi Peresiy gok sek minim kilrimey aņgñimbay ar ak ma ginimimb; Mosis wosrey aņgak rek aņgñimbay ak nep ginimimb. ⁴ Minim kilrimey apay ak wand miker yomb gok rek biynimb gok kuyip gom ñimbay ak pen; kuyip simb niņiy ma tuņgasik dipay. ⁵ Chinup niņyaņ aņgiy, Baybol buk tikyak minim gunap di jun-chenę biyoņ akaņ, ñin kind okok aybirikiy tapay. Gor binuk mey gok aņyaņ aņgiy, chech paryomb miñ daywur sek tep gok aypay. ⁶ Lotiw akaņ, tap yomb ñimbay namb ak amių, biyomb bispay cheya ar ak nep bispay. ⁷ Biynimb kuņay mindpay namb okok amon, tiysa aswan-ey aņgeų, chinup tep gaņ aņgiy niņbay.

⁸ “Pen nimb mam kiñiņ nokom mindpim rek, nimbip tiysa ma aņgņiņgiy. Tiysa nimb ak, nokom bap nep mindip. ⁹ Man ar bių, bi gunap kuyip ‘Bapių’ ma aņgnimimb. Nap nimbik nokom yimb ak mindip; semb biyoņ. ¹⁰ Nimbip biyomb chin ma aņgņiņgiy. Biyomb nimbik ak mey, Kiyņ yomb anep. ¹¹ Nimb biyomb yimb mindniņę ginimimb ak; bi woņę giñemb rek ak mindenimimb. ¹² Biynimb yimb kiyk key dand araniņgambay gok, yimb kuyip yowniņgamb: pen

biynimb yimb ma dand araniᅅgambay gok, yimb yomb diniᅅgambay.

Biynimb Tep Mindpun Anᅅiy Pen Mindrep Ma Gipay Gok

¹³ “Nimb low tiysa gok sek, Peresiy gok sek nimbip minim yomb mindip rek, nimbip simb niᅅsipyin. Nimb key Gor biynimb diy kond mindeniᅅgamb miᅅᅅan ak ma amiy, biynimb amniᅅᅅ gipay gok kuyip kinjeᅅ tikpim.

¹⁴ “Nimb low tiysa gok sek, Peresiy gok sek minim yomb yimb mindip rek, nimbip simb niᅅsipyin. Nimb biyn palpal korip tap kuyip gok siy diy apiy, gipun kun ak niᅅniᅅgambay anᅅiy, Gor nup minim paryomb yesek gok nep anᅅniᅅbim. Gipim kun ak, yiwur yomb yimb ak nimbip giniᅅgamb.

¹⁵ “Nimb low tiysa gok sek, Peresiy gok sek minim yomb yimb mindip rek, nimbip simb niᅅsipyin. Nimb yesek yimb gipim! Biynimb gok minim chinup ak niᅅiy kisen giyaᅅ anᅅiy, miᅅmon okok piyow taᅅiy, gunap niᅅiy anᅅrep gem, nimb rek mer; Seytan biynimb nuk yipund giy yimb aypay.

¹⁶ “Biynimb gok kuyip Gor kinjeᅅ ar ak yomrep gipun apim ak pen; nimb bi windin koy ma niᅅbim. Gipim kun ak, minim yomb yimb mindip; nimbip simb niᅅsipyin. Biynimb gok kuyip minim anᅅᅅiy apim, ‘Gor anᅅniᅅep korip mindip rek, niᅅind apun anᅅiy minim anᅅay, kisen minim kun ak kirginiᅅᅅ kirginiᅅgambun. Pen tap gol diy giyak korip miᅅᅅan akyaᅅ mindip gok, yimb anᅅyiᅅᅅ minim anᅅay, giniᅅgambun

apim.’ ¹⁷ Nimb bi windin koy yimb. Yesek anġiy, ‘Gor anġniġep korip ak tap yimb mer, tap gol diy gipay gok mey tap yimb apim.’

¹⁸ “Minim bap kunep niġrep ma giy, biynimb gok kuyip anġniġiy anġiy, ‘Gor kamb bind nuk mindip rek niġind aspun anġiy, minim anġay giniġgambun ak, yikop minim anġayniġgambun; kisen gos bap niġiy, minim anġay anġnuk kun ak kirginiġ kirginiġgambun. Pen tap Gor nup simbongipay gok mindip rek niġind aspun anġiy, kisen gos bap key niġiy key ginjun rek ma ayniġgamb; apun rek nep giniġgambun apim.’

¹⁹ Nimb biynimb gos timund ma ayak gok. Tap yerip yomb? Tap pik Gor nup simbongipay gok yomb akan; kamb bind suġ-tep nup tap pik simbongipay ak yomb? Omiġal giy tap yomb yimb! ²⁰ Kamb bind mindip rek niġind apun anġniġgambun ak; tap danġiypay ar kun ak sek anġniġgambun. ²¹ Pen Gor anġniġep korip mindip rek niġind apun anġniġgambun ak; korip nuk ak nup sek anġniġgambun. ²² Semb biyoġ mindip rek niġind apun anġniġgambun ak; miġmon nuk ak, nup sek anġniġgambun. Minim kilis kun ak rek anġiy, kisen kirgep rek ma ayniġgamb.

²³ “Nimb low tiysa gok sek, Peresiy gok sek minim yomb mindip rek, nimbip simb niġsipyin. Minim biynimb gunap kuyip anġniġbim gok nimb key ma gipim. Sinimb silik, tap monmon woġgday jakip ak niġem tap yimb rek ayek, niġ panġem wanġrem ak amek, Gor nup nokom bap niġun anġiy per opriy niġbim. Tap sikoy sikoy gok per kun gipim ak pen; yenen minim junj yimb ak

kun ma gipim. Biynimb gok kuyip timey ginimun miñ ar ak ma ginimimb; kuyip simb niñiy yipund ginimun ar ak ginimimb. ²⁴ Biynimb gok kuyip kinjeñ yomun apim ak pen; nimb key biynimb windin koy. Tap achimb gok niñem tap yimb rek ayip ak pen; tap misen mindip gok ma niñbim.

²⁵ “Nimb low tiysa gok sek, Peresiy gok sek minim yomb mindip rek, nimbip simb niñsipyin. Piler kap nimb gok rek mis okok ken ñiñg ayokrep gipim ak pen; namb biyañ tap siy tap timey gach ak aranjakiy mindip. ²⁶ Nimb Peresiy biynimb gok gos timund ma ayak. Piler kap nimb gok miñgan akyañ nind wasyim gi tep gem mey; mis okok ken kunep mind tep giniñgamb.

²⁷ “Nimb bi low tiysa gok sek, Peresiy gok sek minim yomb mindip rek, nimbip simb niñsipyin. Chip kamb miñgan okok komiy, kinjeñ giñiy, pen tund ak pikey, biynimb niñey tep mindip ak pen; miñgan akyañ kuy timey apyñg mindip. ²⁸ Kun ak rek meñg miñgan nimb ak mindip.

²⁹ “Pen nimb bi low tiysa gok sek, Peresiy gok sek minim yomb mindip rek, nimbip simb niñsipyin. Nimb bi minim ñiñg nep pikpim ak, nimbip yiwur yomb yimb giniñgamb. Bi Gor minim anğep wosrey ñanğey komyak kaw ar ak, girep giyñg apim, ³⁰ ‘Apis basind sikop giyak rek, chin kuyip ma ñapnup apim.’ ³¹ Pen apim kun ak; bi Gor minim anğep gok kuyip pikayñgipay kind ak mindpun anğiy apim. ³² Nimb miñ key ar ak ma gipim; kiyk giyak rek gipim. ³³ Siyñ saraw rek giranğ giranğ, kisen Gor biynimb kor giy, mon key yinğap yokniñgamb ñin ak, yergiy pirik key

okok amningambim? Mer yimb! Kinjen nimb bap ma mindeningamb.

³⁴ “Kun ak nimbip aspiyn: Gor angak, ‘Yand bi Gor minim an gep gunap, bi ni nrep gipay gunap, bi tiysa gunap yoken nimbip ker apeningambay, gunap pik ayningambim; gunap mon bak biyon nangbirikningambim, gunap lotiw korip nimbik mi n gan ak pikningambim, gunap pirik amniyakni n, mi n mon okok okok yuk yokningambim angak.’ ³⁵ Gor angak kun ak rek gipik ak mey; Gor bi ynimb su n tep nup gok wosrey nangey wip rek minim yomb ak diningambim. Andam n inuk Ebol nup nind ki n in gi nangiy, nang dand apiy nang dand apiy, kisen Berekaya n inuk Sekaraya nup, Gor nup angnep korip ak bindo n, kamb diy giyak bind ak bindo n mindakni n, namb si n ak nangpikayak. ³⁶ Gipim kun ak, miker yomb ak nimbip Ji wda kay mi n iy mindpim gok ker and-kind winingamb angak.”

*Jiysis Jerusalem Ni nek Simb Gek Siy Angak
(Luk 13:34-35)*

³⁷ “Jerusalem bi ynimb simb gip yand guniy. Bi Gor minim an gep gok kuyip yoken korip mi n mon nimbip ak apey, kamb diy pernep pikaypim. Nimbip kakaruk nonim n iluk gok kuyip gipay rek, dam pil mi n gan yand okok ayni ng gipi yn ak pen; yip ni n iy kirpim. ³⁸ Mi n iy Gor yip ma mindeningambim; Gor angnep korip nimbik mindip ak pen; keynep mindeningambim. ³⁹ Yip ma yimb ni n ningambim; Gor ki yn yomb chinup an giy yokip biy, tep yimb yokek wip angningambim n in anep mey, yip tip ak ni n ningambim angak.”

24

Gor Anjñep Korip Tunj Waningningambay Angak

(Mak 13:1-2; Luk 21:5-6)

¹ Jiysis Gor anjñep korip ak kirgiy mis anakniñ, binuk gok nup angyak, “Gor anjñep korip tep guniy niñan angyak.” ² Angeyak kuyip angak, “Nimb tap kun gok manjiysek niñiy aspiñ ak pen; yand nimbip niñind yimb aspiyn; kisen ap korip kun ak tunj waningeningambay, kamb bap kamb bap ar ak ma mindeningamb angak.”

Mindrep Ma Giningambay

(Mak 13:3-13; Luk 21:7-19)

³ Jiysis am Oliyp dum bising mindakniñ, binuk gok apiy, nup kapkap anjñiy angyak, “Gor anjñep korip tunj waningningambay apan ak, minek akay rek kun giningambay? Chin tap yerip ak gek niñiy anjningambun, Jiysis man asaw; miñmon biy manjiysek kurginingamb anjiy niñningambun angyak.”

⁴ Angeyak Jiysis angak, “Niñrep yimb ginimimb. Biynimb gunap nimbip tom giningambay.

⁵ Bi kunjaynep apiy, biynimb gok kuyip tom giy, yimb yip ak diy yand nep Krays anjningambay.

⁶ Man okok penpen gey giw angek niñningambim; paryomb okok penpen gey minim anep apek niñningambim. Kun gek niñiy, ñin kisen ak wining gisap anjiy ma piriknimimb. Ak yikop penpen ñanjningambay. Ñin kun ak kisen winingamb. ⁷ Biynimb wikan gunap tikjakiy, biynimb wikan gunap yip penpen giningambay.

Miñmon okok mañgiysek monmon apiy, yiwan yomb sikerek apiy giniñgamb. ⁸ Kun geniñgamb nimbip biyn ñapan ñiñimb rek ak gek, mañ mindip añgiy niñningambim.

⁹ “Biynimb yand mindeniñgambim rek, biynimb miñmon okok mañgiysek nimbip yiruk niñiy, dam kalambis ay, gi timey giy, pisnep pik ayniñgambay. ¹⁰ Ñin kun ak, biynimb kuñaynep Gor nup gos ak kirgiy, numiy numam kiyk key gok yiruk niñiy, di bi ñañgep gok ñin ar ak ayniñgambay. ¹¹ Pen kuñaynep, chin biynimb Gor minim aņgep aņgiy, biynimb gok kuyip tom giniñgambay. ¹² Miñ timey ar ak gey gey, biynimb mañgiysek rek gos ar kun ak niñiy; wasemb ayep ar ak sakiy giniñgambay. ¹³ Pen biynimb Gor nup chiñgiy, wasemb ayiņ nep mindeniñgambay gok, dand amek perper mindeniñgambay. ¹⁴ Pen Gor biynimb diy kond mindeniñgamb minim tep ak, miñmon okok mañgiysek aņgñey amdeniñgamb nep, ñin kisen kun ak winiñgamb.

Bi Bap Gor Aņgniņep Korip Ak Timey Yimb Giniñgamb

(Mak 13:14-23; Luk 21:20-24)

¹⁵ “Pen bi Gor minim aņgep Daniyel wosrey aņgak rek ak giniñgamb. Nuk aņgak, ‘Gor aņgniņep korip, nup tap simboņgiPAY tip siņak, tap asik timey yimb bap dayeniñgambay niñningambim aņgak.’ Minim kun biy riyt giniñgambim gok niñnimimb. ¹⁶ Nimb Jiwda biynimb, tap timey kun ak niñiy, kasek pirik yirik okok amnimimb. ¹⁷ Biynimb korip aryoņ mindeniñgiy gok, tap chin gunap dun aņgiy, andkind

korip miŋgan ma amniŋgiy. ¹⁸ Biynimb wonŋday okok taŋgeniŋgiy gok, chech chin gok dun aŋgiy, andkind korip ma amniŋgiy. Kasek pirik amnimimb. ¹⁹ Biyn ñapan koŋgiy sek mindeniŋgambay gok, biyn ñapan ŋaŋ dand taŋgeniŋgambay gok kosyam yimb amniŋgambay.

²⁰ “Giniŋgamb kun ak, Gor nup aŋgniŋey, yombip ñin ak ma ginimuŋ. Lotiw ñin nimb ak ma ginimuŋ. ²¹ Yenen, wosrey miñmon alwol gayak ñin ak tikiy, mind dand apiy miñiy mindpun ñin biy, timey kun ak rek ma gak. Kisen kunep timey kun ak rek ma giniŋgamb. ²² Yikop ak per gek, biynimb maŋgiysek kumdipyap. Pen Biyomb ak biynimb nuk diniŋgamb gok kuyip simb niŋiy mer aŋgek mey, per ma giniŋgamb.

²³ “Ñin kun ak biynimb gunap nimbip Kiyŋ yomb key yimb ak mindip biy, mindip bindoŋ aŋgey, niŋind apay aŋgiy gos ak ma niŋnimimb. ²⁴ Bi gunap Gor biynimb aŋgayak nuk gok kuyip diniŋg yesek aŋgiy yand mey Krays; yand mey bi Gor minim aŋgep ak aŋgiy, tap mageprek gunap giniŋgambay. Kun ak niŋrep ginimimb. ²⁵ Tap yerip yerip kisen giniŋgamb ak, nimbip aŋgñispiyn ak mey; niŋyiŋg mindenimimb.

²⁶ “Biynimb gunap Kiyŋ yomb key yimb ak ap mindip miñmon nep namb okok aŋgey, niŋniŋg ma amnimimb. Pen ap weyiŋg mindip akniy aŋgey, niŋind apay aŋgiy ma niŋnimimb. ²⁷ Bi bap Ñinuk winiŋgamb ñin ak, añiñak diy, kasin maŋgiy bol ak, day biym nimb day binenŋ amimb rek ak gakniŋ winiŋgamb. ²⁸ Miñ miŋgan mon miŋgan,

kamb miŋgan okok ma kun giniŋgamb; misen nep giniŋgamb.

Bi Bap Ñinuk Winiŋgamb
(Mak 13:24-27; Luk 21:25-28)

²⁹ “Pen miker yomb kun ak gi tikdakniŋ, pumb ak kisyim apiy takin ak melik ma giniŋgamb. Gap gok semb biyoŋ nimb puŋgiw yowniŋgamb. Kun gakniŋ tap semb ar biyoŋ gok, okok nimb okok nimb giniŋgamb. ³⁰ Ñin kun ak, Bi bap Ñinuk winiŋg gakniŋ, semb ar biyoŋ key ayek, biynimb miñmon okok keykey mindpay rek niŋiy, siy aŋginiŋgambay. Nuk Nop kilis ak diy, melik yomb sek, semb sek awakniŋ niŋniŋgambay. ³¹ Biykul yomb aŋgakniŋ, enjol nuk gok aŋgek, biynimb nuk diniŋgayn aŋgiy niŋayak gok diniŋg, mankumb biy ayak rek kind kind amiy diy, dand nup ker winiŋgambay.

³² “Nimb niŋbim. Mon gok silup ay wos gakniŋ, pumb ayniŋ gisap aŋgiy niŋbim. ³³ Kun ak rek, kisen tap apiyn gok gakniŋ, “Jiysis winiŋgamb ñin ak miñiy maŋ yimb asaw; won ñap mindiy, apchakniŋgamb aŋgiy niŋniŋgambim. ³⁴ Biynimb miñiy mindpay gok ma kumniŋgambay, kim mindyakniŋ, tap kun gok maŋgiysek giniŋgamb. ³⁵ Semb ar biyoŋ sek, mankumb biy sek kurginiŋgamb; minim yand ak perper mindeniŋgamb.

Ñin Akay Winiŋgayn Ak Ma Niŋbim Aŋgak
(Mak 13:32-37; Luk 17:26-30, 34-36)

³⁶ Won akay rek, ñin akay rek winiᅇgayn ak, biynimb ma niᅇbay: enjol gok ma niᅇbay; yand kunep ma niᅇbiyn; Bapiy nuk nep niᅇimb.

³⁷ “Pen andkind winiᅇgayn ñin ak, Nowa mindek ñin ak, gi mindyiᅇgipay rek nep gi mindeniᅇgambay. ³⁸ Nowa mindek ñin kun ak, ñiᅇg ak biynimb gok kuyip ma yiw gak won ak; biyn bi diyiᅇg, tap ñimbyiᅇg gi mindyakniᅇ, Nowa siyip miᅇgan ak amek, ñiᅇg ap kuyip maᅇgiysek yiw gak. ³⁹ Pen kiyk tap bap giniᅇgamb aᅇgiy am niᅇyak; ñiᅇg ak kuyip yiw gakniᅇ nep niᅇyak. Bi bap Ñinuk winiᅇgamb minek ak, kun ak rek nep gi mindyakniᅇ, winiᅇgamb. ⁴⁰ Ñin kun ak, bi omiᅇal woiᅇgday okok, woiᅇg gi mindeniᅇgayr ak; bap diy, bap kirginiᅇgamb. ⁴¹ Pen biyn omiᅇal palaw giniᅇg, wiyt maᅇgiy piksimbjakyiᅇg gi mindeniᅇgayr; bap diy, bap kirginiᅇgamb.

⁴² “Kun ak Bi bap Ñinuk winiᅇgamb ñin ak ma niᅇbim rek, niᅇrep giyiᅇg mindenimimb. ⁴³ Bi korip nop nimb ak bi tap siydep gok asway aᅇgiy, niᅇmindek, tap nup gok ma siy dipay. ⁴⁴ Kun ak rek nimb minj moka giy mindenimimb. Mer ak: Bi bap Ñinuk ma asaw aᅇgiy, sakiy sakiy giy mindeniᅇgambim ñin ak winiᅇgamb.

Woiᅇg Tep Gipay, Timey Gipay, Aᅇgak
(Luk 12:14-48)

⁴⁵ “Biyomb bap kinjeᅇ amniᅇg giy, bi nup direp giniᅇgamb ak nup aᅇgniᅇgamb, ‘Bi woiᅇg yip giᅇimbay gunap kuyip kond mindiy, tap keᅇmaᅇgiy kuyip gok bilok ñirep giyiᅇg mindenimin aᅇgiy,” aᅇgay amniᅇgamb. ⁴⁶ Kisen andkind

apiy angningamb rek gek ninjiy, nup di tep yimb giningamb. ⁴⁷ Ninjind yimb aspiyn: nup angek tap nuk gok mangiysek kond mindeningamb.

⁴⁸ Pen binuk angayningamb ak mind dand amiy mindrep ma giy, biyomb ak miñiy ma winingamb angiy, ⁴⁹ biynimb wong giñemb gunap kuyip tapin pikiy, am bi ñiñg ñimbiy sakiy aypay gok yip wop-sakiy, tap yomb ñimb gi mindeningamb. ⁵⁰ Pen biyomb kasek ma winingamb angiy, monmon gi mindeningamb ñin ak apiy, ⁵¹ nup gi timey yimb giy, biynimb tap siy tap timey wey weygiy gi mindpay gok yip angayeningamb; am menng siwbirikiy, siy angmindingamb.

25

Pañ Piñ Onep Wanjrem Angiy Paydon Ay Angak

¹ “Gor biynimb diy kond mindeningamb ñin kun ak; kesim diniñg gispiyn biy rek giningamb. Biyomb bap biyn diniñg gek, tap yomb ñiñning biyn piñ onep wanjrem ak lam keykey diy dand amningambay. ² Biyn piñ kun gok, onep mamind ak gos tep niñningambay; onep mamind ak gos niñrep ma giningambay. ³ Niñrep ma giningambay kun gok, lam dangiyep wel gunap sek dand ma amningambay. ⁴ Pen biyn piñ gos niñrep giningambay gok, lam diy, lam dangiyep wel gunap botol miñgan ak pangiy, dand amningambay. ⁵ Pen biyn piñ kun gok kiyk mangiysek amjakiy, kond mindey mindey, bi biyn diniñg giningamb ak kasek ma apeningamb mey, wisin apek kinamningambay.

6 “Pen kisyimnamb yomb biyan, biynimb gunap suk angyi angningambay, ‘Bi biyn dinary gisap ak asaw. Nup am kinjenamb ak niy, ponind owim angningambay.’⁷ Kun angningambay, biyn tiwin onep wanjrem kun ak mangyisek tikjakiy, lam wiyk kiyk gok girep giningambay.⁸ Kun giy biyn gos niyrep ma giningambay tiwin ak, biyn gos niyrep giningambay tiwin ak kuyip angningambay, ‘Lam chin gok sungning gisap ak; wel nimb gok chinup gunap ñim angningambay.’⁹ Angey biyn gos niyrep giningambay tiwin ak angningambay, ‘Mer! Wel kun gok, nimbip gunap ñiy, chin gunap dinjun rek ma ayip. Nimb stowa amiy, nimbik gok key tawim angningambay.’¹⁰ Kun angningambay wel tawning stowa amningambay won ak, bi biyn dinary giningamb ak apchakeningamb. Biyn gos niyrep giningambay tiwin ak, bi kun ak yip korip miñgan ameningambay; nuk kinjen giñiningamb.¹¹ Kisen pen biyn piñ gos niyrep ma giningambay tiwin ak apchakiy angningambay, ‘Biyomb! Biyomb! Chinup kinjen ak yikan angningambay.’¹² Angey, biyomb biyn nuk dinarygamb ñin kun ak angningamb, ‘Yand nimbip ma niybiyn angningamb.’¹³ Kun ak nimb Biyomb ak ñin akay akan, won akay winingamb ak ma niybim rek, minj moka giy mindenimimb.

*Biyomb Bap Binuk Gok Kuyip Maniy Ñak Angyi
Paydon Ay Angak
(Luk 19:11-27)*

14 “Pen kesim dining gispiyn biy rek giningamb. Biyomb bap miñmon paryomb okok amning, bi wonḡ nup giñiningambay gok kuyip suk anḡek apey, tap gok kond mindeyaḡ anḡiy, kuyip ñiningamb. 15-16 Binuk kun gok, wonḡ keykey giningambay rek niḡiy, maniy bilokiy, bi bap nup payp tawsin ñiningamb, bap nup tiw tawsin ñiningamb, bap nup wan tawsin ñiningamb. Ñiy, nuk am okok mindakniḡ, bi payp tawsin diningamb ak maniy kun ak diy, sikyim gi dand amiy apiy giy, maniy siyñiḡ payp tawsin diningamb. 17 Bi tiw tawsin diningamb ak kunep, sikyim gi dand amiy apiy giy, maniy siyñiḡ tiw tawsin diningamb. 18 Pen bi maniy wan tawsin diningamb ak, dand amiy, kaw tikiy lum ñiningamb.

19 “Kisen mind dand amiy, biyomb kiyk ak andkind apiy, maniy ñimbiyn kun ak yerer gipay anḡiy, kuyip anḡniḡningamb. 20 Anḡniḡek, bi payp tawsin diningamb ak, maniy nuk ak ñiy anḡniḡningamb, ‘Biyomb niḡan! Yip maniy payp tawsin nep ñinak ak pen, yand maniy kun ak di, sikyim gi andik mandik giy, pen payp tawsin siyñiḡ dipiyn anḡniḡningamb.’ 21 Anḡek, biyomb ak pen anḡniḡningamb, ‘Tep. Nand bi wonḡ tep giñimban. Tap sikoy ak kun gipan ak, nip anḡen tap yomb gok kond mindeningamban. Ap korip yip ak miñmiñ yimb giyiḡ mindenimin anḡniḡningamb.’

22 “Bi maniy tiw tawsin diningamb ak kunep maniy nuk ak dap ñiy anḡniḡningamb, ‘Biyomb. Yip tiw tawsin nep ñinak ak pen, yand maniy kun ak

diy, sikyim gi andik mandik giy, maniy siyniñ tiw tawsin dipiyn aňningamb.’

²³ “Aňgek, biyomb ak aňningamb, ‘Tep. Nand bi woňg tep giñimban ak mey; kun gipan. Tap sikoy ak kun gipan ak, nip aňgen tap yomb gok kond mindeniňgamban. Ap korip yip ak miñmiñ yimb giyiňg mindenimin aňningamb.’

²⁴ “Pen bi maniy wan tawsin diniňgamb ak dap ñiy aňningamb, ‘Biyomb. Yand nip niňbiyn; nand bi kalrimey yimb. Biynimb nak gunap woňg wariy kiyk gipay gok nand yikop pipañg dapiy ñimban. ²⁵ Nand kun gipan rek, yand pirikiy, maniy ñinak ak dand amiy, kaw tikiy lum ñen mindyňgip ak, miñiy dand aswiyn aňningamb.’

²⁶ “Aňgek biyomb ak aňningamb, ‘Nand bi timey woňg magep bap. Yand biynimb gunap woňg gipay gok nep dapiy ñimben niňban kun ak; ²⁷ yenen maniy yip biy dam pasbuk ayey, miñiy apiy maniy siyniñ gunap sek ma dipiyn?’

²⁸ Kun aňgiy, binuk gunap kuyip aňningamb, ‘Kun gip ak, maniy wan tawsin kun ak jiw diy, bi payp tawsin ñinik ak nup ñinimimb. ²⁹ Per apun rek: Biynimb gin yimb gok kuyip gunap sek ñey mindrep giniňgambay; pen biynimb gin mer gok, kuyip siskoy nind aňgayak ak piliňg dey, yikop yimb mindeniňgambay. ³⁰ Kun ak bi woňg ma gip kun anup kisyim yomb wip mis ar akyañ yokem, biynimb meňg siwbirikiy, siy aňgmindpay gok yip siy aňg minden aňningamb’ aňgak.”

Kor Yomb Kisen Ak

³¹ Bi bap Ñinuk kiyñ yomb mindiy winiňgamb ñin ak, enjol gok yip maňgiysekiy, nuk siya

kiyŋ ar ak bisgek, ³² biynimb miñmon okok keykey mindpay rek, ap windin yirik ar nup siŋak nan-geniŋgambay, kuyip bilok pis ak key, pis ak key ayniŋgamb. Bi kanj siypsiyp meymey mokep gok, siypsiyp gok wikan bap tuŋgasik ay, meymey gok wikan bap key tuŋgasik ay gipay rek ak giniŋgamb. ³³ Biynimb siypsiyp rek mindpay gok niŋiy, ñin yipund kind ak ayniŋgamb; biynimb meymey rek mindpay gok niŋiy, ñin aŋind kind ak ayniŋgamb. ³⁴ Nuk kiyŋ yomb ak mey, biynimb tep gok kuyip aŋgniŋgamb, ‘Bapiy nimbip niŋimb. Wosrey nuk miñmon alwol gayak ñin ak, tip nimbip gayak ak mey, apiy tip tep kun ak dim. ³⁵ Yenen: yip yiwan gek, tap keñmaŋgiy ñimbim. Ñiŋg nen gek, ñiŋg ñimbim. Miñmon par okok nimb apen, yip aŋgdiy di korip nimbik ak aypim. ³⁶ Chech ma mindek, yip chech ak ñimbim. Yip tap gek, niŋmindrep gipim. Kalambis minden, yip ap niŋbim aŋgniŋgamb.’

³⁷ “Kun aŋgeniŋgamb, biynimb tep gok nup pen aŋgniŋgambay, ‘Biyomb. ñin akay nip yiwan gek keñmaŋgiy ñimbun? Ñin akay ñiŋg nen gek, nip ñiŋg ñimbun? ³⁸ Ñin akay par okok nimb apey, nip aŋgdiy dam korip chin ak aypun. Ñin akay chech ak ma mindek, nip chech ñimbun? ³⁹ Ñin akay tap gek akaŋ, kalambis mindey, nip am niŋbun?’

⁴⁰ “Aŋgeniŋgambay, kiyŋ yomb ak aŋgniŋgamb, ‘Mam yip yikop gunap kuyip girep gipim ak mey, yip girep gipim aŋgniŋgamb.’ ⁴¹ Kuyip kun aŋgiy, biynimb aŋind kind okok ken mindeniŋgambay gok kuyip aŋgniŋgamb, ‘Bapiy Gor Seytan nup sek, Seytan enjol nuk gok sek kuyip yiwur gakniŋ

mindeyan angyiy, tip mon key yinjap bap gayak. Nimb biynimb timey yiwur yomb diniņgambim gok, yip kirgiy, mon key yinjap kun ak amnimimb.

⁴² “Yenen: yip yiwan gek, tap keñmangyiy ma ñimbik. Ñiņg nen gek, ñiņg ma ñimbik. ⁴³ Par okok nimb apen, yip ma angdipik. Chech ma mindek; yip ma ñimbik. Yip tap gak ñin ak akan, kalambis mindenik ñin ak, yip ma ap niņbik anğniņgamb.’

⁴⁴ “Anğeniņgamb, nup anğniņgambay, ‘Biyomb. Ñin akay yiwan mindenak nip keñmangyiy ma ñinuk? Ñin akay ñiņg nen gek nip ñiņg ma ñinuk? Ñin akay okok nimb apey nip ma angdinuk? Ñin akay chech nip ma mindek, nip ma ñinuk? Ñin akay tap gek akan, kalambis mindenak, nip ma am niņnuk?’

⁴⁵ “Kun anğeniņgambay, kiyn ak anğniņgamb, ‘Nimb mam yip yikop gok kuyip direp ma gipik rek mey, yip sek gipik anğniņgamb.’ ⁴⁶ Kun angyiy, kuyip anğyokek am tip pernep yiwur gakniņ mindeniņgambay ak amniņgambay. Pen biynimb tep nuk gok angek, perper mindeniņgambay tip ak amniņgambay anğak.”

26

Jiysis Nup Ñanğjun Angyiy, Minim Kapkap Anğayak

(Mak 14:1-2; Luk 22:1-2; Jon 11:45-53)

¹ Jiysis minim kun ak angyiy, binuk onep wimiņgan ak kuyip anğak, ² “Nimb niņbim: ñin omiņal mindiy, Pasopa ñin yomb ak miņiy angyiy, ap nan-giy mindeniņgambay. Pen kiyk kun giy

ap nan-giy, yip di gapman biyomb gok kuyip ñiy angningambay, ‘Nup mon kiros bak biyan ñangbiriknimimb angningambay’ angak.”

³ Pen bi Gor nup tap simbonjep yomb gok sek, bi minim tungasikep gok sek ap Gor nup simbonjep biyomb yimb Kayapas korip ak nan-giy, ⁴ Jiysis nup yerer giy, ñangayjun angiy, minim angay geyak. ⁵ Pen, “Pasopa ñin biy kun gon, biynimb kunaynep ap mindpay gok penpen giningiy rek ayip. Kun ak miñiy kirgiy, ñin bap nup pikayjun angyak.”

Biy Bap Jiysis Nup Jun Wel Ayñak
(Mak 14:3-9; Jon 12:1-8)

⁶⁻⁷ Jiysis miñmon Beteniy mindiy, Saymon bi soysek korip ak am tap ñimbeyak. Ñinyakniñ, biyn bap wel kuyrep, maniy yomb tawpay ak, botol sek dand apiy, Jiysis nup jun dum ak songak. ⁸⁻⁹ Songek, Jiysis binuk gok simbwur kuyip ak timey gek angyak, “Wel kun ak dand amiy maniy yomb diy, biynimb tap ma mindip gok kuyip ñemb rek ak pen, yenen yikop songip angyak.”

¹⁰ Minim kun ak angeyak Jiysis niñiy kuyip angak, “Nuk yip girep yimb gip; yenen kun as-pim? ¹¹ Biynimb tap ma mindip gok yip per mindeningambim yand yip per ma mindoningambun. ¹² Biynimb komning; wel ayñiy dam kombay rek ak yip ayñisap. ¹³ Pen niñind yimb as-piyn! Kisen miñmon okok mangiysek, minim yip ak angniyiñg, biyn ak Jiysis nup wel ayñak angiy nup kesim diyiñg, gak kun ak niñnep mindeningambay angak.”

*Jiwdas Jiysis Nup Mimunġ Gak
(Mak 14:10-11; Luk 22:3-6)*

¹⁴ Ñin kun ak, Jiysis binuk Jiwdas Yiskariyot; Jiysis nup kayn gi dand amen pik ayniġiy aġiy, Gor nup tap simboġ ħiyiġipay biyomb gok kuyip niġniġ amnak. ¹⁵ Amiy aġgak, “Jiysis nup kayn gi dand apiy nimbip ħeniġayn, yip tap yerip ħiniġambim?” Aġgek nup maniy siylpa ħin jiwiy andikiy anep ar ak ħiyak. ¹⁶ Ñeyak Jiwdas pen yerip giy kuyip aġgen, Jiysis nup ap dand amniġiy aġiy, gos ak niġak.

*Jiysis Binuk Gok Yip Pasopa Tap Ñiġak
(Mak 14:12-21; Luk 22:7-14, 21-23; Jon 13:21-30)*

¹⁷ Kisen Pasopa wiyk ak kiġiġ gi gakniġ, binuk gok Jiysis mindek ak apiy aġyak, “Ñin Pasopa siypsiyp ħiluk pikħiġniġambun ak maġ mindip. Kun ak chin korip akay amiy tap ħiġniġambun gok gayrep ġinjun aġyak.” ¹⁸ Aġgeyak kuyip aġgak, “Nimb dawin yomb ak amiy bi bap nup aġniġiy aġnimimb, ‘Tiysa aġip ħin yand ak maġ mindip ak mey, bi yand gok yip siypsiyp ħiluk pik daġiy ħiġniġambun korip nund ak aġip’ aġnimimb.”

¹⁹ Jiysis kun aġgek binuk gok aġgak rek niġiy, am siypsiyp kun ak korip miġan kun ak pik daġiy gayrep geyak. ²⁰ Duġep won ak binuk onep wiġan ak yip bisġiy, ²¹ tap ħimbyiġ aġgak, “Yand nimbip niġind yimb aspiyn. Bi chin yip tap ħimbsipun biy, bap yip kayn gi dand amniġamb aġgak.”

²² Angek binuk gok gos yomb ninjy, nokom nokom nup angninjing angyak, “Biyomb! Yip ma apan rek?”

²³ Angeyak angak, “Bi yand yip piler nokom ñimbsipur ak yip kayn gi dand amningamb.

²⁴ Baybol buk ak wosrey angyi tikyak rek, yip kayn gi dand amiy, pikayey kumningayn ak pen; bi yip kayn gi dand amningamb anup simb ninjipiyn. Nonim nup ma tikpikop ak tep. Pen tikek, mindyng kun giningamb ak, kisen yiwur yomb yimb ak diningamb angak.”

²⁵ Angek binuk Jiwdas nup kayn gining gak ak angak, “Tiysa. Yip ma apan rek?” Angek angak, “Mey nip aspiyn angak.”

Jiysis Binuk Gok Kuyip Biret Wayn Ñak

(Mak 14:22-26; Luk 22:15-20; 1 Kor 11:23-25)

²⁶ Tap ñimb mindyng Jiysis biret ak diy, Gor nup tep angyi, tipang kuyip ñiyng angak, “Diy ñinim. Ak mumbwak yand rek angak.”

²⁷ Kun angyi, ñing wayn kap ak kunep diy, Gor nup tep angyi, kuyip ñiyng angak, “Nimb mangysek ñinimimb. ²⁸ Ñing biy mey, likañ yand biynimb kunaynep kuyip nen yowningamb rek nimbip ñispiyn. Likañ yand yowningamb kun ak mey; Gor tap siy tap timey gipay gok ninjy kirginingayn angak minim ak wos amningamb angak.”

²⁹ Kun angyi angak, “Yand nimbip ninjind aspiyn. Wayn ñing biy miñiy gunap sek ma ñinjingayn. Kisen Gor biynimb diy kond mindeningamb ñin ak, nimb yip wayn ñing kisenimb ak ñinjingayn angak.” ³⁰ Kun angyi binuk gok

yip lotiw kamep bap angying, miñmon Oliyp dum amniyak.

Jiysis Piyta Nup, Bi Kun Ak Ma Niñbiyn Anğningamban Anğak

(Mak 14:27-31; Luk 22:31-34; Jon 13:36-38)

³¹ Jiysis kuyip anğak, “Gor anğak rek Baybol buk ak tikiy anğyak:

‘Yand bi kanj siypsiyp mokep ak nup pik ayen, kanj siypsiyp gok mañgiysek pirik amningambay anğyak.’

Anğyak kun ak mey, mindak maynamb biyañ nimb mañgiysek yip kirgiy, pirik amningambim.

³² Pen yand kumiy tikjakiy, miñmon Galiyliy nind ameningayn; nimb kisen ninimimb anğak.”

³³ Anğek Piyta anğak, “Bi mañgiysek nip kirgiy kund ñningambay rek ayip; yand kun ma giningayn anğak.”

³⁴ Anğek Jiysis anğak, “Niñind apiyn: kisyimnamb biyañ kakaruk suk ma anğningamb won ak, Bi kun anup ma niñbiyn anğiy, won ominal nokom anğningamban anğak.”

³⁵ Anğek Piyta kilis timey giy anğak, “Yip pikayning pikayningambay ak pen; Jiysis bi yand mer anğiy ma anğningayn anğak.” Jiysis binuk gunap kunep Piyta anğak rek nep anğyak.

Jiysis Nop Nup Anğniñ Mindek

(Mak 14:32-42; Luk 22:39-46)

³⁶ Jiysis binuk gok yip miñmon Getsemeniy amiy, binuk gunap kuyip anğak, “Nimb biy bising mindenimimb. Yand siñbindoñ amiy, Bapiy nup anğniñ mindeningayn anğak.” ³⁷ Kun anğiy Piyta

nup poñind, Sebediy ñinuk Jemis yip Jon kuyip poñind sandak. Amyiñg, Jiysis nuk gos yomb niñiy, ³⁸ kuyip yakam angak, “Mindmangiy yip piñiyñiy nep aysap ak kumnim rek ayip. Biy mindiy, yip kond mindenimimb angak.”

³⁹ Kun angiy, kuyip kun siñak angay, nuk yep kondon siñak amiy, jiy kuyangiy, jomluk ak di man biyañ ay, Gor nup angniñiy angak, “Bapiy. Tap yip giniñg gisap kun ak mer angiy ker, mer angnimin; pen yand gos niñbiyn ar ak ma ginimin; gos nand key niñban rek ginimin angak.”

⁴⁰ Kun angiy andkind apiy niñak: binuk gok kineyak; Piyta nup angak, “Won bap yenen yand yip niñmindiy ma kinjipim? ⁴¹ Timey ginjun rek ayip angiy, Gor nup angniñyñg mindenimimb. Gos nimbik ak ginimimb rek ayip ak pen; mumbwak anep mawses gip angak.”

⁴² Jiysis kun angiy, tip am Nop nup angniñiy angak, “Tap yip giniñg gisap ak, kirgep rek ma mindip monmon gan; gos nak angak.” ⁴³ Kun angiy, tip ak andkind apiy niñak: binuk gok ma niñmindeyak, wisin kineyak.

⁴⁴ Pen nuk andkind amiy, Nop nup nind angniñak rek nep tip ak angniñiy, ⁴⁵⁻⁴⁶ andkind apiy, binuk gok kuyip angak, “Nimbip mawses gek kin mindpim? Tikjakem amnun. Niñim! Bi yip mimuñg niñimb ak, bi tap siy tap timey gipay gok kuyip ñiyn angiy poñind asaw biy angak.”

*Jiwdas Jiysis Nup Kayn Gi Dand Amnak
(Mak 14:43-50; Luk 22:47-53; Jon 18:3-12)*

⁴⁷ Minim angakniñ, Jiwdas nuk, bi Gor nup simbongep yomb gok sek, Jiwda kanjsol gok sek

nup angyak rek, bi kiyk kuṇaynep dand owak. Kiyk baynat gunap, kur gunap diy dand sesek wiyak. ⁴⁸ Jiwdas kuyip anḡay anḡak, “Yand bi bap nup am diy, kaykol ginikniṅ anḡnimimb; Jiysis mey ak anḡiy, nup dinimimb anḡak.” ⁴⁹ Anḡak rek Jiysis mindek ak apchakiy, mindpan anḡiy, nup kaykol gak.

⁵⁰ Kun gek Jiysis anḡak, “Bunḡiy. Giniṅ gispan kun ak kasek gan anḡak.”

Angek, bi Jiwdas yip wiyak gok Jiysis nup chichiy diyak. ⁵¹ Pen nup kun giy diyakniṅ, Jiysis binuk bap baynat ak lipiṅ diy, bi Gor nup simbongep yomb yimb wong giñiyiṅgip anup timund piskind ak pisnep timbrik yokak. ⁵² Kun gek Jiysis nup anḡak, “Ñayip baynat ak dipan okok tip ak liṅgey amnan. Biynimb ñayip baynat diy penpen gipay gok, ar kun ak nep kumbay. ⁵³ Yand ‘Bapiy ak-ey!’ anḡembinip, nuk enjol tiwin keykey onep wimiṅan ak rek yokek, ap yip kond mindembiyap. ⁵⁴ Pen wosrey Baybol buk ak tikiy; yip kun kun giy kumniṅgamb anḡyak ak mey, kun ginimuṅ. Yand ar bap key geniṅgayn yipund ma giniṅgamb anḡak.”

⁵⁵ Pen bi nup diniṅ wiyak kun gok kuyip anḡak, “Yand per am Gor anḡniṅep korip ak bisgiy, biynimb gok kuyip minim anḡñimbiyn ak pen, yip ma dipim. Miñiy pen baynat sek, kur sek dand apiy, bi tap siydep rek ak yip dipim. ⁵⁶ Pen gipim kun ak, bi Gor minim anḡep gok giniṅgamb anḡyak rek nep gipim anḡak.”

Won kun ak Jiysis binuk gok maṅgiysek nup kirgiy, pirik amniyak.

Jiysis Nup Kor Giyak
(Mak 14:53-65; Luk 22:54-55, 63-71; Jon 18:13-14, 19-24)

⁵⁷ Pen bi low tiysa gok sek, bi Jiwda kanjsol gok sek ap nan-gi mindeyak Kayapas bi Gor nup simbongep yomb yimb korip ak mey; Jiysis nup chichiy diy, dand korip kun ak amniyak.

⁵⁸ Pen Piyta kindik kindik amiy, korip mis ar ak mindiy, Gor angninep korip poliys gok yip bisgiy, yerip rek giningambay angyi ninmindek.

⁵⁹⁻⁶⁰ Bi Gor nup simbongep yomb gok sek, bi kanjsol yikop gok sek angyak, “Chin bi minim yesek angningiy gunap kuyip angninon, kiyk minim bap angey, yipund giy mindek, minim kiñij mey ak angyi, Jiysis nup pikayjun angyak.” Kun angyak ak pen, minim kun ak keykey amek kiñij ninij nup pikayningiy rek bap ma mindek.

⁶¹ Pen bi omiñal apiy angrik, “Bi kun biy, ‘Gor angninep korip ak timbrikyokem, ñin omiñal nokom mindiy, tip ak giningayn angak’ angrik.”

⁶² Kun angerik, bi Gor nup simbongep yomb yimb ak, Jiysis nup angak, “Minim nip apay ak; pen ma angningamban?” ⁶³ Angek, Jiysis pen minim bap ma yimb angak. Kun gek, bi Gor nup simbongep biyomb yimb ak angak, “Miñiy kor mindpun biy, yesek ma angnimin. Gor Biyomb gek perper mindpay ak kunep ninmindip. Kun ak chinup yipund giy angnimin. Nand Gor Ñinuk Kiyñ yomb key yimb ak akan?” ⁶⁴ Angek Jiysis angak, “Mey apan ak. Nimb mangiysek ninim! Yand nimbip aspiyn: yand Gor ñin yipund kind okok

mindiy, semb ar biyon nimb lum biy apeningayn niñningambim angak.”

⁶⁵ Jiysis kun angak, bi Gor nup simbongep yomb ak, yenen kun angip angiy, chech nuk gok key tungralikiyng angak, “Nuk Gor nup yimb ak dand apyapying asap! Kun ak biynimb gunap ma angninjun. Nuk timey gip rek misen angip. ⁶⁶ Akan nimb gos yerip niñbim?” Angak angyak, “Mey angip ak nen; kumnimun angyak.”

⁶⁷ Kun angiy, nup jomluk okok kiñuk giñiy, pikying giyak. Gunap weygiy, mikem nup okok piksil giying angyak, ⁶⁸ “Nand Kiyñ yomb key yimb tap okok mangiysek niñban ak; an nip piksap ak, chinup angey niñun angyak.”

⁶⁹ Pen Piyta korgep korip mis ar biyan bising mindek ak mey, bi Gor nup simbongep yomb yimb anup wonng giñiyngip pañ ak apiy, nup angak, “Nand Jiysis bi Galiyliy nimb ak yip mindambiy angak.”

⁷⁰ Angak, Piyta biynimb gok mangiysek niñmindyakniñ angak, “Minim nand aspan ak yand ma niñbiyn angak.” ⁷¹ Kun angiy, tikjakiy, am kinjenrumb siñak mindakniñ, biyn korip kun ak wonng giyingip bap ap nup niñiy, bi mindeyak gok kuyip angak, “Nuk bi Jiysis Nasaret nimb ak yip minder niñbiyn angak.” ⁷² Angak, Piyta anng silokiy angak, “Yand niñind yimb apiyn! Bi apim kun ak yand ma yimb niñbiyn angak.”

⁷³ Sikoy won bap mindiy, bi Piyta yip jak mindeyak gok nup angyak, “Niñind nep apun. Nand bi kiyk bap. Meng mingan kiyk apay rek apan angyak.”

⁷⁴ Anǵeyak, Piyta minim kasek anǵiy anǵak, “Yand nimbip niñind yimb apiyn! Bi nimb apim kun ak yand ma yimb niñbiyn anǵak.” Kun anǵakniñ day kakaruk ak suk anǵek, ⁷⁵ Piyta Jiysis minim nup anǵak ak niñyiñg gospar ayak. Yenen: Jiysis anǵak, “Kakaruk ma anǵniñgamb won ak yand nup ma niñbiyn anǵiy, won omiñal nokom anǵniñgamban anǵak.” Gos kun ak niñiy mey gospar ay, mis amiy siy yomb anǵak.

27

Jiysis Nup Dam Gapman Biyomb Anup Ñiyak (Mak 15:1; Luk 23:1-2; Jon 18:28-32)

¹ Miñmon yowakniñ, bi Gor nup simbonǵep yomb gok sek, bi minim tunǵasikep yikop gok sek minim anǵniñ anǵniñ giy Jiysis nup pikayun anǵiy, ² nup miñ ay dand amiy, gapman biyomb Paylat nup ñiyak.

Jiwdas Kumak (Ap 1:18-19)

³ Pen Jiysis nup kor giy, pikayniñg geyak niñiy, Jiwdas, yenen Jiysis nup mimunǵ niñbiyn anǵiy, maniy dak ak, bi Gor nup simbonǵep yomb gok sek, biyomb yikop gok sek kuyip jiw dam ñiniñg, Gor anǵniñep korip ak amnak. ⁴ Amiy, maniy kun ak kuyip ñiyiñg anǵak, “Jiysis timey ma gip ak pen, nup mimunǵ niñbiyn rek mindak kumniñgamb anǵak.” Anǵek kiyk anǵyak, “Ak tap chin mer. Nak keynep kun gipan anǵyak.” ⁵ Anǵeyak, maniy ñiyak ak Gor anǵniñep korip miñgan ak diyokiy, am miñ ñiñak.

⁶ Bi Gor nup simbonjep yomb gok maniy kun ak diy angyak, “Maniy kun biy, bi pikayun angyiy mimung ginuk ak mey, opriyn ñinjun rek ma ayip angyak.” ⁷ Kun angyiy, minim angnin angnin giy, bi par okok nimb ap biy kumey dam komjun miñmon wikan bap tawun angyiy, am man yingiy sinjey tiyn giyingipay miñmon wikan ak tawyak. ⁸ Tawiy, miñmon wikan kun biy, mimung pinijy ñimbun maniy ak diy tawnuk ak mey; yimb ‘Likañsek’ angnun angyak. Miñiy kunep miñmon wikan kun ak, yimb ‘Likañsek’ apay.

⁹ Pen kiyk mankumb tawyak kun ak, bi Gor minim anjep Jeriymaya nind angyiy tikak rek nep giyak. Nuk tikiy angak:

“Kiyk maniy ñin jiwiy andikiy onep ar ak, Jiwda biynimb mimung pinijyñinuk maniy ak angyiy, ¹⁰ dand amiy, miñmon man yingiy sinjey tiyn giyingipay wikan ak tawningambay. Biyomb ak yip giningambay angyiy angak rek nep giyak.”

Biyomb Paylat Jiysis Nup Angninjak
(Mak 15:2-5; Luk 23:3-5; Jon 18:33-38)

¹¹ Jiysis nup dand gapman biyomb Paylat mindak ak amniyaknin, Paylat, Jiysis nup angak, “Nand Jiwda kay kiyn yomb kiyk ak mindpan?” Anjek Jiysis angak, “Mey apan ak angak.” ¹² Pen bi Gor nup simbonjep yomb gok sek, bi kanjsol yikop gok sek nup minim gunap anjeyak, nuk pen minim bap ma nep angak. ¹³ Kun gek, gapman biyomb Paylat angak, “Minim keykey angyiy nip kor gispay ak ma ninban?” ¹⁴ Anjek,

Jiysis nup minim bap ma angek, Paylat gos kuṅay yimb niṅak.

¹⁵⁻¹⁹ Pen Paylat kiṅ bispay siya ar ak biṅing mindakniṅ, biynuk minim bap angek apek angak, “Yand maynamb wisin niṅbiyn: Bi kor gispim ak bi tep. Nup minim yiñ ma angnimin. Yand wisin niṅbiyn kun ak, gos kuṅay niṅsipiyn angak.” Minim kun ak Paylat nuk nep niṅiy angak, Jiysis tap bap ma gak, biyomb guniy nup yikop milik niṅiy dand opay. Kun ak kinjeṅ yerip ak piyow niṅiy nup angyoken amnaṅ angyi, gos ak niṅak.

Pen Rom gapman biyomb gok per simiy ak simiy ak Jiwda kay biret yiys sek ma ñimbay ñin yomb ak, kuyip kalambis bi bap key angninyingipay ak, yikop wisik yokyingip. Ñin kun ak, Jiwda kay bi kiyk niṅrep giyingipay bap ap kalambis mindek. Yimb nuk ak Barabas. Kun ak biynimb kuṅaynep ap nan-geyak Paylat angak, “Bi nimbip akay yikop angyoknim? Jiysis, Kiṅ yomb key yimb apay ak akan, Barabas nup angak.” ²⁰ Angek bi Gor nup tap simbongep yomb gok sek, bi kanjsol yikop gok sek biynimb gok kuyip angyak, “Gapman biyomb Paylat nup angenimimb, Barabas nup wisik yokiy, Jiysis nup mon kiros bak biyon ñanṅbirik ayningiy angyak.”

²¹ Kun ak kisen gapman biyomb ak kuyip angak, “Bi ominal biy, an nup rek nimbip wisik yoknim?” Angek angyak, “Barabas nup wisik yokninin angyak.”

²² Angeyak Paylat angak, “Kun apim ak, Jiysis Kiṅ yomb key yimb apay ak nup yerginim?”

Angek, kiyk maŋgiysek angyak, “Nup mon bak biyoŋ ñaŋgbiriknimimb angyak.”

²³ Angeyak gapman biyomb Paylat angak, “Yenen? Nuk tap yerip ak timey gak?” Pen minim angak ak ma niŋiy, minim dand araniy angyak, “Nup mon kiros bak biyoŋ ñaŋgrimbik aynimimb! Nup mon kiros bak biyoŋ ñaŋgrimbik aynimimb angyak.”

²⁴ Angeyak minim gunap sek angen penpen giniŋgiy rek ayip angyi, Paylat ñiŋ diy ñin ayokyiŋg kuyip angak, “Jiysis nup pikayning gispim ak, minim kun ak yip ma winiŋgamb; nimbi key andkind winiŋgamb angak.”

²⁵ Angek angyak, “Ak chip nambinj chin key. Minim kun ak, chin sek, ñapan chin gok sek niŋniŋgambun angyak.”

²⁶ Kun angeyak, Paylat kuyip Barabas nup wisik yokiy, Jiysis nup miñ diy pikiy, mon kiros bak biyoŋ ñaŋgbirik ayaŋ angyi, amiybi gok kuyip yomak.

²⁷ Amiybi yomb gok nup diy, dand korip yomb kiyk ak amiy, amiybi yikop gok kuyip maŋgiysek suk angey, ²⁸ ap nan-giy, chech nup ak tunjjiwiŋ chech likañ biyomb yimbay rek bap dand apiy nup yimñiyak. ²⁹ Yimñiy miñ ñiwñiw sek gok dand apiy, kiŋ kay aypay arband rek bap giy, nup ayñiyiŋg, biyomb gok kur kunep dipay angyi, gamil par bap di Jiysis nup ñin yipund kind ak ñiy, ap nup koŋgim yimiy, angyiwiŋg angyak, “Jiwda kiŋ kiyk biy per mindonimuŋ angyak.” ³⁰ Kun angyi, nup kiñuk giy, gamil kur kun ak jiw diy, nup jun dum biyoŋ pikyak. ³¹ Nup kun giy gi

timey giy, chech likañ ayñiyak ak tunḡasikyokiy, chech nuk gok key ayñiy, nup mon kiros bak biyoñ ñaḡbirik ayoñing, poñind amniyak.

*Jiysis Nup Mon Kiros Bak Biyoñ Ñaḡbirik Ayak
(Mak 15:21-32; Luk 23:26-43; Jon 19:17-27)*

³² Kinjeḡnamb okok dand amyoñing niñyak, bi bap Sayriyniy nimb apek. Yimb nuk ak Saymon. Nup namb pikiy, kilis giy aḡyak, “Jiysis nup ñaḡbirik ayoñingambun mon kiros biy dand amnoñ aḡyak.” ³³ Aḡgey dakniñ, miñmon Golgota dum amniyak. Golgota kun ak, chip jun dum apay.

³⁴ Pen dum kun ak amjakiy, amiybi gok malasin silik bap diy, wayn ñiñg ak diy, sesek tunḡandik mandik giy, Jiysis nup ñeyak, nuk ñimb niñiy kirkak. ³⁵ Nup mon kiros bak biyoñ ñaḡbirik ay, chech nup gok bilok keykey diñing, sandiw rek giy diyak. ³⁶ Diy mey, nup mon ñaḡbirikyak kiñiñ siñak bisgiy niñmindeyak.

³⁷ Nup ñaḡbirikiy, kiros bak biyoñ yimb tikay aḡyak, “Jiwda kay Kiyñ yomb kiyk ak aḡyak.”

³⁸ Pen Jiysis nup ñaḡbirik ay, bi tap siydep omiñal ak, bap ñin yipund pis ak, bap aḡind pis ak, ñaḡbirik ayak. ³⁹⁻⁴⁰ Biynimb kinjeḡram aran apyan geyak gok, jun gormar giy, nup aḡjiwiyy aḡyak, “Nand Gor Ñinuk rek! Gor aḡniñep korip ak timbrikyokiy, ñin omiñal nokom mindiy tip ak gi diñingamban ak mey; mon kiros bak biyoñ kirkiy apey chin niñun aḡyak.”

⁴¹ Bi Gor nup simboḡgep yomb gok, bi low tiysa gok, bi kanjsol yikop gok sek kunep; nup aḡjiwiyy aḡyak, ⁴² “Biynimb gunap kuyip gamb

kim ambay ak pen, nuk key kun ginimun rek ma ayip. Yisrel, Kiyŋ yomb chin ak, mon kiros bak biyoŋ kirgiy man ar biy apey, niŋind aŋgip aŋgiy niŋjun. ⁴³ Nuk Gor nup gosimb niŋiy, yand Gor Ñinuk aŋgip ak, miñiy ap Ñinuk nup diyokek chin niŋun aŋgyak.” ⁴⁴ Bi tap siydep Jiysis yip ñaŋgrimbikyak omiŋal ak kunep, nup minim timey kun ak rek nep aŋgrik.

Jiysis Pisnep Kumak

(Mak 15:33-41; Luk 23:44-49; Jon 19:28-30)

⁴⁵ Ñin kun ak pumbnamb yomb yoŋ won ak, kisyim apiy mind dand amiy pumb kuyim gak won ak tip ak melik gak. ⁴⁶ Won kun ak Jiysis suk yomb aŋgiy aŋgak, “Yilay. Yilay, lema sambaktaniy aŋgak.” Aŋgak kun ak, “Gor Bapiy yomb. Gor Bapiy yomb. Yip yenen kirpan aŋgiy aŋgak.” ⁴⁷ Nuk kun giy suk yomb aŋgek, biynimb gunap maŋ kun siŋak mindeyak gok niŋiy aŋgyak, “Bi kun biy bi Gor minim aŋgep Yilayja nup suk asap aŋgyak.” ⁴⁸ Kun aŋgiy, bi bap am tap machres rek ayak band bap dand apiy, ñiŋg wayn silik ak tawiy, gamil kur par ak diy, kambis ñaŋgiy, ñen ñiŋaŋ aŋgiy ñak.

⁴⁹ Kun giy ñek, bi gunap aŋgyak, “Kapkap niŋmindon. Bi Yilayja apiy, nup diyokningamb akaŋ aŋgyak.” ⁵⁰ Aŋgiy, niŋmindyakniŋ, Jiysis suk yomb aŋgiy, aŋiŋ band mindek ak kurgak.

⁵¹ Won kun anep, chech paryomb Gor aŋgniŋep korip ñiluk miŋgan biyaŋ kinjeŋrumb pilgiyak ak, namb ak puŋgrik biyoŋ biyaŋ ay mindek. Kun gakniŋ, monmon diy, kamb gok puŋglakiy, ⁵² chip komyak kamb miŋgan pilgiyak

gok miŋgan yikiy, Gor biynimb nuk nind kumey komyak gok kuŋaynep gek, tip ak tikjakyak ak mey; ⁵³ Jiysis tikjakak ñin ak Jerusalem ameyak, biynimb kuŋaynep niŋyak.

⁵⁴ Pen monmon diy, yerer gak ak niŋiy amiybi yomb ak sek, binuk gok sek niŋiy aŋgyak, “Yaw-ey! Nuk Gor Ñinuk yimb aŋgyak.” ⁵⁵ Pen biyn kuŋaynep ap keykey siŋak mindiy niŋmindeyak. Biyn kun gok Jiysis nup kondiy, Galiyliy nimb wiyak. ⁵⁶ Biyn mindeyak kun gok bap Mariya Makdala; bap Jemis yip Josep yip nonim Mariya; bap Sebediy ñinuk omiŋal nonim ak.

*Jiysis Nup Kamb Miŋgan Ak Komyak
(Mak 15:42-47; Luk 23:50-55; Jon 19:38-42)*

⁵⁷⁻⁵⁸ Bi tap kuŋay mindek miñmon Armatiya nimb bap Jiysis kumek niŋiy, duŋgep won ak ap gapman biyomb Paylat nup Jiysis mumbwak ak dinim akan aŋgek, Paylat yaw aŋgiy, binuk gok kuyip aŋgek, nup ñiyak. Bi kun ak yimb nuk Josep. Nuk Jiysis binuk bap. ⁵⁹ Josep nup Jiysis mumbwak ak ñiyakniŋ, nuk chech tund tep ak diy, nup maŋgiysek pipkomiy, ⁶⁰ dam kamb miŋgan kisen nep, yip komniŋgambay aŋgiy aŋgek kiluk ayak miŋgan ak komiy, kamb yomb bap tuŋg milokek amek, kamb miŋgan ak pilgiy amnak.

⁶¹ Biyn yimb along Mariya omiŋal ak ap niŋmindrikniŋ, kun giy komak.

*Amiybi Gok Jiysis Nup Komyak Kamb Miŋgan
Ak Kond Mindeyak*

⁶² Jiysis kumek komyak ñin kun ak, bi Gor nup simbonjep yomb gok sek, Peresiy gok sek lotiw ñin ak toy angyi, tap dap nangingyak. Minek, gapman biyomb Paylat mindek ak amiy angyak, ⁶³ “Biyomb. Bi yesek anjep kun ak angak, ‘Yand kumiy, ñin omiñal nokom mindiy tikjakningayn angak.’” ⁶⁴ Kun ak bi gunap anjep, ñin omiñal nokom kawrumb ak kond mindeningiy. Mer ak binuk gok ap mumbwak nup ak siy dand amiy, biynimb okok kuyip yesek angyi angningambay, ‘Nuk tip ak tikjaki angningambay.’ Kun gey, minim yesek angyingipay ak sikoy rek ayningamb, kisen angningambay ak yomb yimb giningamb angyak.”

⁶⁵ Anjepyak Paylat kuyip angak, “Kun ak nimb amiybi kaw bap anjep gem, am kun siyak niñmindeningiy angak.” ⁶⁶ Anjek am kinjeñ pilgiyak kamb yomb ak wiren rek giy, amiybi kaw bap anjepyak am kun siyak niñmindeyak.

28

¹ Minek miñmon tikdam yokakniñ, biyn yimb along Mariya omiñal ak, Jiysis nup komyak ak niñning amnirik. ² Won kun ak enjol bap semb biyon nimb apiy, Jiysis nup komiy kamb pilgiyak ak, tungmilok gol okok yokiy, ar kun ak bisgakniñ, monmon yomb yimb ak owak. ³ Enjol kamb ar bisñg mindek kun ak, jomluk nuk ak ñiñakol giyñg mindek. Chech nuk ak, tund tep yimb ak ayak. ⁴ Pen amiybi niñmindeyak gok, nup niñy jel pirikiy, kin ambun tikiy mindeyak.

⁵ Pen enjol ak biyn omiḡal ak kuyip aḡgak, “Ma piriknimiyr! Yand niḡbiyn: nirmiḡay Jiysis bi mon kiros bak biyoḡ ḡaḡbirik ayak anup niḡraspiyr. ⁶ Nuk biy ma mindip. Nind aḡgak rek mindarik tip tikjakiy amimb. Apiy nup dayak ar ak niḡiy, ⁷ am binuk gok kuyip aḡgnimiyr, ‘Tip tikjakiy Galiyliy amimb aḡgnimiyr.’ Nimb biynimb nuk gok, nup niḡniḡgambim kun okok. Minim kun ak nep nimbip aḡḡniḡ aswiyn aḡgak.”

⁸ Kun aḡgek niḡiy, biyn omiḡal ak pirikrik ak pen; miḡmiḡ giyiḡ, binuk gok kuyip minim kun ak aḡniḡ kasek amnirik. ⁹ Kinjeḡnamb okok amnirikniḡ, Jiysis kuyipmiḡay namb pikiy, “Nir mindpiyr aḡgak.” Aḡgek, kiymiḡay ap koḡim yimiy, nup diniḡiy lotiw gerik, ¹⁰ kuyipmiḡay aḡgak, “Ma piriknimiyr! Yand Galiyliy amiḡpiyn ak; nir am mam yand gok kuyip aḡgnimiyr, ‘Nup am niḡnimimb miḡmon Galiyliy aḡgnimiyr’ aḡgak.”

Amiybi Gok Am Jiysis Tikjakak Rek Minim Ak Aḡgyak

¹¹ Biyn omiḡal ak, kinjeḡnamb okok amnirikniḡ, amiybi niḡmindeyak gok, dawin yomb Jerusalem amiy, bi Gor nup simboḡep yomb gok kuyip, Jiysis tikjakak minim ak aḡḡiyak.

¹² Aḡḡeyak, bi Gor nup simboḡep yomb gok, am bi kanjsol gunap yip, minim aḡ ar nokom ay apiy, amiybi kun gok kuyip maniy yomb ḡiy aḡgyak, ¹³ “Jiysis kun kun giy tikjakip aḡgiy ma aḡgnimimb. Pen aḡgnimimb, ‘Chin kinambun won ak binuk gok apiy, mumbwak nup ak siy

dand ambay angnimimb angak.’ ¹⁴ Kun gey, gapman biyomb ak minim kun ak ninjy angek, chin yip angoningambun; nimbip miker gunap ma ñiningamb angyak.”

¹⁵ Kun angey, amiybi gok maniy kun ak diy, am biyomb kun gok angyak rek nep angyak. Kiyk tom giy, Jiysis mumbwak nup ak, binuk gok siy dand ambay angeyak, miñiy Jiwda biynimb gok minim kun ak angying mindpay.

Jiysis Binuk Gok Nup Ninjyak

(Mak 16:14-18; Luk 24:36-49; Jon 20:19-23)

¹⁶ Jiysis binuk onep anqip ak Galiyliy amiy, kuyip nind angak dum ak amniyak. ¹⁷ Amiy Jiysis nup ninjy, lotiw giyak. Pen gunap ninindol giy angyak, “Ak Jiysis akan bi ak key angyak.”

¹⁸ Jiysis man sinak apiy, kuyip angak, “Bapiy yip angek mey, man ar biy kond mindiy, semb biyon kond mindiy gipiyn. ¹⁹ Kun ak nimb miñmon okok kind kind amiy, biynimb gok yip ker dinimimb. Diy, Bapiy Gor ker mindpay, Ñinuk ker mindpay, Kawnan nuk ak ker mindpay angiy, kuyip ñing pikñinimimb. ²⁰ Pikñiy, yand nimbip ginimimb angiy minim yerip yerip angnimbiyn ak mangiysek, kuyip angnirep gem ninjy kindik giningiy. Pen yand nimb yip nep mindiy, mind dand amiy, ñin kisen ak winingamb angak.”

CXXX

**Kalam Baybol Buk Gor minim nuk kisin
angayak
The New Testament in the Kalam Language of Papua
New Guinea
Nupela Testamen long tokples Kalam long Niugini**

copyright © 1992 Wycliffe Bible Translators, Inc.

Language: Kalam

Dialect: central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 11 Nov 2022 from source files dated 9 Oct 2020

1491c109-3ee2-5565-9b83-06c480168547